

Apozeliyara

Jizaazare Widaasadera

Apozeliyara Yigasangira.

1 ¹ A'mwe Tiyopilaazaigi, Bukuya piri' giminyina wi'na yavikarye. Jizaazai yuya yaka yuya wijiwaakina yaka yagaala yuya sa wi'na yavikarye. Jizaazai aayawidaasi yaka ² Sigunyavi ayina yilaawaka sanna wi'na yavikarye. Sinnawi sagaa' milaawiagaa' Jizaazalyi Kuryai Tewaanyai mwaaidori Jizaazai Widaasade Apozeliyaraavi kumire wawinya'na nayaa yijiwaaka' ata dahilakinikeraavi. ³ Sahwai balakegaa' sawita a'mweraare sivilatiraalya jinnadaa'nyi sahwai bada yuya diraginya yada kumi yuya tinna wangadivi' dara yawiresa' "O, nebulyasi. Sarena Jizaazai ayina damwaalika!" Sara yawireva kumi mwaaidivi' Gotiyai a'mweraavi maremwaalade'na widakelyira. ⁴ Pigaa' kumi yikabesagaa' wida' "Anga Jeruzaalemi myagalya'mapinera! Aawa. Nimwai gannya yangeri yihizaavade'na jemwaalyila! Gotiyai diraginna yihithake' nimi mena yihithe'na jemwaalyila!" ⁵ Joni Bavitaaziya Yadei aalyavi bavitaaziya yake' kiri' divi maalikegaa' bavitaaziya'bisa' Gotiyare Kuryai Tewaanyai sariminyi munyikaavi yunebanna wilamwaaina yihyatheihilyira," wida'.

Sigunyavina Jizaazari makilaawake'nesi.

(Maaki 16:19,20; Luki 24:50-53)

⁶ Sarevidaa'nyi pigaa' Apozeliyara yikabesagaa' Jizaazai mwaaidi'nyi kumi wide' "Naangeigi, dahaasagaa' Maremwaaide' Yizireliyainaavina ayina dinejaade'na daaka?" ⁷ Sara kude' wida' "Sare'na yima'nade'na myawipinera! Sariminyine'na mika! Nimwai sahwai sara yawirajai sagaasi yuyagaasi sagaa' wakadelyira. Sare'na gamire diraginya'na gawei yawi'manikesira. ⁸ Sa'na kiri' Kuryai Tewaanyai sariminyi bayihimwaaidozi diraginya naange' kihizaavoji Anga Jeruzaalemi dava Kwaaka Juthiya yuyabanna Kwaaka Sameriya yuyabanna Kwaakevaki

tiyawī anga yuya dawinna nīmīnyina pwaraavi duzalikurakyideihilyira.”
 9 Mi'na kuda' gamirera baihana'dapi Sigunyavineri makilaawina ya!
 Makidawadaa'nyi yiraaya' galayewaa'mwanna kya' tinna mwanganyage!
 10 Makidawadaa'nyi Sigunyavi tinna kuna wangadaapiji, yithaa,
 a'mweraai baazi'ma'nya yaaka baazi'ma'nagileraai kwaraayaba
 bima'nyina yagi. 11 Mi'na bima'nyina yagila widahi “Kwaaka Galili
 mwaalyaihi, saba daaveva Sigunyavi tinna be'na baihanakava? Sare'na
 simunya kwalaalya myawipinera! Sariminyabadaasi Sigunyavinei
 Jizaazari makimwaawikei sahwai Sigunyavi sara yimwaakabaabi' ayina
 walaabathelyira,” widahi.

Juthaazare wawinya' a'mwe mudikei maarake'nesi.

12 Sagaa' Mugunya Wolividaasi Jeruzaaleminera ayina wawe!. Mugunya
 sa' angeba esaba kilomitaaya piri' warikesi. (Jyuraavire Kwazaakevi
 kaanya wodivisabe.) 13 Wawesara Jeruzaalemi wileva ku'dikevi munyaba
 kigaa' aya mwaalesabanna yilaawe!. A'mwe sarajiya pwai Pitai, pwai
 Joni, pwai Jemizai, pwai Ediruyai, pwaraai Pilipiji Tomaazalyi, pwaraai
 Baatolomyulyi Matiyulyi, pwai Alipiyazare gawaali' Jemizai, pwai
 Saaimoni gannya kwaakevina yawi'dei (Selotiyai), pwai Jemizare
 gawaali' Juthaazai, sara yuyara mwaale!. 14 A'mwe sahwaraai a'mweji
 Maariyaa' Jizaazari ganaangesi gya'mweraji avaaizimunya yawireva
 yuyagaa' Gotiyari wija'na yikabadiwi' Gotiyari wide!.

15 Yirika sagaa' kwiya'mwera kwalaalyara yavinakera (120) yikabeva
 mwaaidapiyaraayawi tinnyawi Pitai daavaka yagaala widina ya!
 16 “Nya'mweihī, kigaakuna Kuryai Tewaanyai Ne Devitimi kujiwakyaa'
 Deviti sara yidayaa!. Sara yidayaake' nebulya' yunebanna yima'nya'ne'
 mena yima'na!. Juthaazai kyibwaridaakwa' a'mwera Jizaazari wila
 pwiyesai Juthaazarina nebulya' yima'na!. 17 Juthaazai nemijiyari Naangei
 dahilakakelyi. Nemiji gamiji avaiwawinya widaayo, Apozeliyaina,”
 wida' Pitai.

18 Kayaa'nanya'na yibwaridaakwia'ne'na Juthaazai nigwia tivikisa
 maarakenna wawinya piji' mube!. Sajiki walaraawaka gannya munya
 kayaaka yina yaka gannya li'gilya' mwasaba kabwalyara' sahwai bala!.
 19 Savina Jeruzaalemi mwaalyara yuyara kadika wi'neva wawinya saji'
 kunnya yagaala “Akelithaama,” wo'nike! “Wawinya tawanake!,” dinikesi.

20 Pitai wida! “Sare' dare'nesi. Bukuya Saamiya (Yiledaata) yida'nyina
 ‘Gamire ange' kune' yima'nana!

Savi a'mwera mulamwaalyi yipika!

Nabaai yagaala piri' yida'nika

‘Gotiyarina yade' a'mwe pwai yana!

21-22 Sara yida'nikevidaa'nyi Juthaazare wawinya yiya' pwai maarana!
 Sahwari kadahilakawaaji Naanga Jizaazai baryai dikaavake' tinna

wanganakelyi pwaraavi wijalikuraadeinera. Kigaa' nemijiyai Naanga Jizaazalyi kaanya yamaryori dahilakaana! Sinnawi Joni Bavitaaziya Yadei widakegaasi pigaasi Sigunyavi Jizaazari makyimwa'daawadikegaa'na nemijiyari dahilakaana!" ²³Pitai sara kuda' piba a'mwera a'mweraari wimwaaihe'. A'mwe pwai Baazavaazai Jozepiyai wo'nikai yaya piri' Jaazitazai wo'nikelyi. A'mwe pwai Mataayazai wo'nikelyi. ²⁴Wimwaaiheva dahilakya'na Naangeri wide' "Naangeigi, a'mwe yuyaraavire kuryaraji sidusaji yawi'mwaa. Sa'na, Naangeigi, a'mwe daraarina gawari dahilakaajiwona? ²⁵Sai Juthaazai githaayake' apozeliyare wawinya' yana! Juthaazai gimire wawinya' ya'mavaka gannya kayaa'nanyabanna wawaka. Wawinya sa' pwai yana!" ²⁶Mi'na wideva kirimire yaya yidaveva Mataayazare yaya' yida'nike' wanganeva dine' "Sare'na Mataayazai dahilakiwo. Jizaazai Widaasade atirai siviliridaasi pwaraalyai Apozeliyaraayaba wimwaaihiwo," dine'.

Kuryai Tewaanyai walaabake'nesi.

2 ¹Tika Munne Pedikoziyagaa' mena kavura' anga gavevina Jizaazari wi'nadivita yuyara yikabe'. ²Kyikabe' sigunyavidaa'nyi yihu'jake'bisa' yarai yaka anga yunevi buzaaimwaalesavi naanga ya' jaka sa'. ³Sara yakegaa' dara wangesa' "O, piwinna piwinna ditaalitabisa wawaka nemi yuyainaavi daneyime'niwaka!" ⁴Sara kade' Kuryai Tewaanyai kumire simunyangi yunebanna wilamwaalaka yagaala tewaanya' wija'na diraginna kujaava' Maaveraavire yagaala ge' ge' gaai wide'.

⁵Sagaa' Anga Jeruzaalemi Juyara ajimya yuyangiya gazavasavakidaasara mwaale'. Pwara Juyaraavire kiwinya limwadivisarera. ⁶Sahwara yihu'jake' kadika wi'neva kwala bwa'naanya yarai yi'bwa'naabina. Yarai yi'bwa'naabina yeva Jizaazarera ajimya yuyangiaraavire yagaala widadivisa'na kadika wi'neva yi gazaizai gannya yagaalya' wi'naka atika maru'na'na. ⁷Yuyara maru'na'divi' dine' "Niwaava, berivaka? A'mwe dara nemire yagaala ge ge nedivanigasara Kwaaka Galili mwaalyara yuyarera. Niwaava! ⁸Garanevaka? Nemi yuyainaavi gazaizai kadika dara wi'nivanike' 'Ai, nennya aangyagaala danedivanigava!' ⁹Sahwaina Kwaaka Paatiya mwaalyainaji Kwaaka Mithiya mwaalyainaji Kwaaka Yilaami mwaalyainaji Kwaaka Mezopotemya mwaalyainaji Kwaaka Juthiya mwaalyainaji Kwaaka Kapaathoziya mwaalyainaji Kwaaka Podaazi mwaalyainaji Kwaaka Eziya mwaalyainaji ¹⁰Kwaaka Piriziya mwaalyainaji Kwaaka Paabiliya mwaalyainaji Kwaaka Yizipi mwaalyainaji Kwaaka Livya Anga Saairini pimagi mwaalyainaji Anga Romi mwaalya pwainaji mwaaiho. ¹¹Nabaai Juyainaji Maaveina Juyaraavirebwi yadaanyainaji pwaina Ahu'manna Kiriti mwaalyainaji Kwaaka Areviya mwaalyainaji yuya saina

bamwaalona Gotiyai tewaanya yakenna nennya yagaalya nedivanigasa' kadika wi'nivanigone!" ¹² Simunya kwalaalya yawi'divi' atika maru'na'divi' yiwaara'ne! "Gara yiwaka?" ¹³ Sara kyiswaara'ne' kiri' pwara kadika wi'nya'ne! sinna tika wida'daasi birala wie! "Biyaaya naanga neva kunya maayara mwaaihava sara divanigasara."

Pitai widake'nesi.

¹⁴ Sagaa' Pitai Jizaazai Widaasadera atiraa'i sivilyiridaasi pwalyaraji daavaka kwala bwa'naanyavi yagaala naange' gaai wida' "Kwaaka Juthiya mwaalyaihilyi Anga Jeruzaalemi mwaalyaihilyi yuyaihi yihithiwija' kadika nayaa du'nyila! Nimore yagaalya' jawirila! ¹⁵ Sare' dare'nesi. Nyidiwaasa'na a'mwe dara biyaaya manyeva sidu'nakera mwaaiha'. Sawisaburi daaka! Sawisavi daaka! Mwanyavi naaini kilokiyagaa' biyaaya'na a'mwera kumaayara mwaaidivisara daaka! ¹⁶ Arikawi. Da' Gotiyari wi'nawijiwakyaakei Ne Joweli yidayaake' yima'nivani'. ¹⁷ Dara yida'nika

'Gotiyai dinikesira. Aayagaa' dara yideinyira,
Kilaa'naka yuyaraavina Ninnya Kuryari widingikideinyira.
Kujaava'muji Kuryai Tewaanyai kumire simunyangi kulamwaloji
Siriraavaangeji siribwaalivaangeraji niminyi
nyu'nawijiwaakipi'desira.

Sarimire miginyara se mwaryapiji a'mabaaitinna wangabi'derera.
Sarimire nera se warapiji waja ya'nipi'derera.

¹⁸ Yo, sagaa' Ninnya Kuryari widingikidengira,
Nyidaayadivita a'mweji a'mweraji samilika.
Kuryai mena kulamwaloji sagaa'

Niminyi nyu'napi pwaraavi wijiwaakipi'derera.

¹⁹ Munyaba sigunyavi diraginyangiji gengiji yideinyi.
Kwaakeba Kwaakevaki kujiwaaina'muji atika maru'napi'derera.
Tawesi dikesi jita naangesi wangabi'derera.

²⁰ Nyilyai mavuri yoji jihinyai yima'nadelyi.
Lawei wayaaka tawe'bi' yima'nadelyi sagaa'.
Kwanganapiri Naangere diraginyagaa' naangegaa' yima'nadehaaki.

²¹ Gazaizai gaimwange'na Naangeri jaka kadanganori
Naangei kavadaihasmaaraji Naangerei yima'nadelyi sahwai.'

Sara dinikesira.

²² Yizireliyareihi yagaala dangi kadika du'nyila! Gotiyai yawi'na 'A'mwera dara yawipi'de' "O, Gotiyai Naazareti mwaalyai Jizaazari widasawaabikei daaka!" ' Sara yawiraka gannya diraginya' sahwari kujaava' sai diraginyaji atika maru'nasa'neji wijiwaainya'neji yina ya'. Sara yada dava sariminyaba yadaasiya'na sahwaihi mena yawi'mwaasaihilyi. ²³ Kigaa' Gotiyai sidu'nakei diraginna yawiraka

'A'mweraavire kayaa'nanyanna Nyibwaalivaangei balade'na widaasideinyi.' Gotiyai sara dakei Jizaazari kyihimaarya' sarimi 'Aala!' dina yeva dinyina 'Yisaviri Gotiyare kiwinya maayara sahwari niliya tabika!' Dinyina kye' Romiyara sahwari tamaketa sarimire wawinyasira. ²⁴ Sarimi sara yesa' kiri' Gotiyai sari ayina yidikaava'. Jizaazai yuyagaa' baryai mwari kyadike'na gileangeba taanga kininnakeba padaihasamaa'na yaka yidikaava'. ²⁵ Sare' dare'nesi. Ne Deviti gaminyina yida'nika wijaa'

'Yuyagaa' sinnyimagi Naangei mwaaida wangadinyainyi.

Nimire aangasimagi mwaaide'na lika myiwineinyi.

Sai "Lika nyadikaji," diraginyainyi nyimwaa'ihiwa'.

²⁶ Savina nimire simunyavi yilaaya yadi

Nimire taalisasi yileyagaainakeinyi widadinyainyi.

Nimire kilaakeji' wakadehaa' Gotiyari yemwaalideziki.

²⁷ Gilaayaraavireba nimire kuryai myagalya'mayi jitheiginyi.

Jiwaalivaanga tewaanyainyire kilaakeji' bwia maburannejiki.

²⁸ Gaalyaburine tusanna nawi'nyina nyijiwainiwaana.

Niminyaba mwaaidinya'na yilaayabwi dinyeku'deinyira.'

Ne Deviti sara yida'nikesira.

²⁹ Nya'mweihi, Ne sinnawinyai Devitimina nayaa nebwina yihithima!

Deviti gaminyina myidayaa'. Aawa, sahwai kabala' kwakya' sai madikaayi yaa'. Madikaayi kyaa' dahaasagaa'na dava neminyaba gamire wakinikevi wangadaanyainera. ³⁰ Deviti piropetiyai Gotiyari wi'nawijiwakyaakei mena yawiryaa'. Gotiyai Devitimi yagaala diraginya' wijaa' 'Gimi kingiyaigi maremwaa'idinyabaabi' ginnyai a'mweraavi maremwaa'laderi wimwaa'ihidelyi.' ³¹ Sarevidaa'nyi yawiraka dara wanganyaake' 'O, Gotiyai sara yadei daaka!' Daka Kiraazitiyai baryai ayina dikaasa'na dinikesi.

'Gotiyai gilaayaraavireba myagalya'mayi yakelyi.

Gamire kilaaka bwia maburyakelyi.'

³² Sara dinike'na Gotiyai Jizaazari yidikaavakelyi a'mwe dai baryai. Kyidikaava' nemi yuyaina sahwari tinna wanganorina yihizalikurakivanigoinera. ³³ Sigunyavi Gotiyare aangasimagi diraginnakeba kamwaala' Gotiyai Ganimaangei sara widake' gannya Kuryai Tewaanyari sara kujaava' Jizaazai Kuryari yange'na neminyina yaasiwakevidaa'nyi sarimi kadika wi'nivanigasaji tinna wangamanigasaji Kuryai Tewaanyarina sara yivanikelyi. ³⁴ Sare' dare'nesi. Sigunyavi Jizaazai yilaawaka kiri' Ne Deviti yida'nika sahwai myilawiaa'. Aawa. Sinnawi Deviti dara wijaa'

'Naangei nimire Naangeri wida'

"Nimire aangasimagi dava mwaaida'gizi

³⁵ Gimire sivilyiraari yikamaangeraavi marulawakidehaa'nanyi.

Diraginaangeigi nimire nawi'nyaba gimwaaidehaa'nanyi.”³⁶ Ne Deviti sara dinikesira.

³⁶Sarevidaa'nyi Yizireliya yuyaihi nayaa jawiramaremwaalyila! Jizaazai darina yihithivanigori yisaviri niliya wiramesaihilyi. Sarimi sara yeta Naangeri Kiraazitiyari wimwaaiha' Gotiyai.” Pitai sara widakesi.

³⁷Savi a'mwera kadika wi'neva simunyangi kale naanga wiadaa'nyiyagaa' “We!” deva Pitariji Apozeliya pwaraaviji wide' “Nya'mweih, gara yaajiwo? We!”³⁸ Pitai wida' “Sarimijiya gazaizai kayaa'nanyabwi myanna! ‘Simunya mudike Gotiyarebwi yiwijainyi,’ kadapiji Kiraazitiya Jizaazare yayavina aalyavi bavitaaziya' kyihyawaaji sarinnya kayaa'nanyabwi Gotiyai marasi'nadelyi. Kamarasi'noji Gotiyare yangeri Kuryai Tewaanyari dimaaryideihilyi. Nabaai, Gotiyai dini' ‘Nimire Kuryari gizaavideinyi.’³⁹ Sare' dare'nesi. Yagaala yune naanga nebulya'na wija savi giminyinaji gimire kaimiraayaraavinaji menyawinyaraavinaji dinikesi. Yi gaminyawi nemire Gotiyai Naangei yuyaraavi jaka wijivwaramaarojiya sahwaravina gannya Kuryari wijaavadelyira.”

⁴⁰Pitai tewaanna widaka yagaala pini diraginna wijalikurakada widihaa'bwara' “A'mwe dahaasa dara kayaa'na yadivisaraavi kayaaka yoji giminyiji kayaaka nyihyadika! Gotiyari jaka duthana! Yihivadaihasamaarana!”⁴¹ Sarevidaa'nyi a'mwe gamire yagaala nayaa wi'nesaraavi Jizaazarera bavitaaziya yina ye'. Bavitaaziya yina kye' yirika sagaa' Naangei kurinaka kwala naanga 3,000 saraavi gannyaayawi ye'mwannawimwaaiha'.⁴² Sarera Widaasadera Gotiyare yagaala wijiwaakadivisagaa' kadika diraginna wi'nibainyina. Kadika wi'nibainadivi' yavada'galya'na yuyara nayaa dinyina yadivi' “Jizaazai neminyineba balakelyi,” dadivi' gave piba girikula gunyina, nadivi' yuyagaa' Gotiyari widadiviki.

Kiraazitiyareavirebwinesi.

⁴³A'mwe yuyara Gotiyarina lika ye'. Gotiyai gannya diraginya' Widaasaderaavina kujaava' kumi diraginyaji nawi'nya wijiwaainyaji kye' a'mwera atika maru'nareva lika ye'.⁴⁴ Lika yadaapiji wi'nadivisara avaaizimunya yawi'divi' kuna yikabadivi' Naangerina didivi' kumire wapaayaji gilyivisaji jaapaina yadivi' yanga yinyina.⁴⁵ Yanga yinyina yadivisara kumire kwaakeji gilyivisaji mubadivi' “Nigwimaayai damwaalika!” dadivi' nigwimaaya sahwaravini wimudaasakeraavi wimunna.⁴⁶ Wimunna yadivi' yirika gazarisariki Gotiyare Angevi kuna yikabadivi' yilaaya yadivi' kumire angengi girikula gunyina, namwaaina. Namwaaina yadivisara pwaraavina yawi'na yadivi' simunya yida'nanyangi yilaaya yadivi' wapaaya jaapalanamwaaina.⁴⁷ Jaapalanamwaaina yadivi' Gotiyarine yayavi munyaba makidivi'

a'mweji a'mweraji sa dinyina “Jizaazarera tewaanyarera.” Dinyina yadivi' yirika gazarisariki Naangei a'mweraaviji a'mwengiji padaihasamaa'da gannyaraayaba kusilaanyaraayaba wimwaaihada mwaale.

Sivila kayaa'nanyari yavada'galake'nesi.

3 ¹Pigaa' sawisiri tiri kilokiyagaa' Gotiyari wijahaa' Gotiyare Angevina Pitalyi Joniji wogi. ²Saba tikurya piri' “Tikurya Nawi'nyava,” wo'nikevi sivila kayaa'nanyai mudangegaa'daasi sarei yima'nakei mwaala'. Yuyagaa' tikurya savina pwara makabeva walamwaaihina yadivi' Gotiyare Angevi widaawadaapiyaraavi naanga yidaangadelyi nigwianna. ³Sarei mwaalaka dara wanganake' “O, a'mwe saraai duimanaabihila!” Daka wida' “A'mweraaihi, nigwia yanga dinyijaayila!” ⁴Tinna baihana'na yagila Pitai wida' “Tinna dinehwangana!” ⁵Sara kuda' sai yawi'na “Nigwia nyijaayikadera.” Yawi'na yaka tinna wanganna ya'. ⁶Wangadaasi Pitai wida' “Nimi nigwia aawa! Kiri' pibwi tewaanyabwi kininnakeinyi yanga gizaavima! Naazareti mwaalyai Kiraazitiya Jizaazare yayavina githima! Kaanya jamarya!” ⁷Mi'na widaka gamire aangasavi maaraka yiri'bwara'. Yiri'bwa'daasi gamire sivilyiraalyi naba'jangeraalyi diraginya yarai kyima'na' ⁸yiladikwosi'naawina yaka gannya sivilyiraalyi daavina yaka kaanya gaai yamarina ya'. Kaanya gaai yamaryaka Gotiyare Angevi Pitalyi Joniji saraalyi ye'mwannawilaka yamaryada dikwosi'nada Gotiyari yilaaya maryada mwaalina ya'. ⁹Mwaalina yaka kaanya yamaryada Gotiyari yilaaya maryadaasi a'mwera bwanganewa ¹⁰dara wanganesa' “Ai, a'mwe sai Tikurya Nawi'nyavi walamwaaina yada nigwianna nedadei daaka!” Sara deva sahwari yima'nakevina ni'nika yadivi' atika maru'na'na ye'.

Gotiyare Angevi Pitai widake'nanyira.

¹¹A'mwe sai Pitalyi Joniji saraari limwadaasi a'mwe yuyara atika maru'na'divi' kuminyawi yihuliviliyavina bina ye'. Gotiyare Angevi yihuliviliya sa' Solomonimire yihuliviliya' wo'nikesi. ¹²Bina kye' Pitai yuyaraavi tinna wanganaka wida' “Yizireliyahi, da'na atika baa'na maru'na'manigava? Baa'na nengamanigava? ‘Kirinnya diraginyasi tewaanyabulyi sasara yagila a'mwe dai kaanya yamaryaderi wimwaihiwaai,’ sara jawi'manigava! ¹³Aawa, davwina Eviraamiji Aazakiji Jaikopiji saraavire Gotiyai nemire sinnawinyaraavire Gotiyai gannya widaayadei, Jizaazari yidikaavaka gannyaba byaannakeri wimwaaihake'nesi. Sare'na yiwolya'nesi. Gannya widaayaderi Romiyaraavire kotiya'na sarimi makuna kye' a'mwe Paailati yihitha' ‘A'mwe tewaanya dari wila kulayaara'muji wawadelyi.’ ¹⁴Sara kyihitha' Paailatimyaba ‘Arikewinyi. Sahwai aala!’ widesaihilyi. Sahwai tewaanyai yida'maraangei nayaa yadei kiri' sarimi ‘Arikewinyi.

Balana! wideva Paailatimi wide! 'Sai balana! A'mwe pwari wilya! jaaka!' A'mwe sai kigaa! tamakakei kayaa'nanyalyi. ¹⁵ Sara widina yeva Gaalyaburine Aaya Kaavilyari Romiyaraavina wijaavina kye! tamakina ye! Mi'na tamakina kye! divi Gotiyai yidikaavake'na tinna wanganolyainaai savina yihizalukurakivanigo. ¹⁶ A'mwe dai Jizaazari limwagarakevina Jizaazare diraginya! sahwari yavada'gaimwa'. Yithaanyi, tinna wangamanigasasi siduta yawi'manigasasi a'mwei sivila tewaanyaraalyiyarina Jizaazai sara yiwa'. Naarimi dina 'Jizaazai diraginaangelyi,' dina yola Jizaazare yaya! a'mweri widina kyiwoi sariminyaba dai tewaanna mwaalikeliyi.

¹⁷ Nya'mweih, sariminyina yawi'mwa. 'Juyara siduta myawiri yeva Jizaazari kayaa'na ye! Sabaaibi! kumire a'mwe naangera sara ye!' nimi sara yawi'mwa. ¹⁸ Yesa'na sinnawi Gotiyai piropetiyara wi'nawijiwaakyaraavire maangengi wijaa'. Dara dini! 'Gotiyare Kiraaзитiyai, Gotiyai dahilakyaakeri daanga wivinadelyi.' Sara dinike'na Jizaazari sara tamake! Sare'na Gotiyare yagaala nebulya'na yakesira. ¹⁹ Sarevidaa'nyi dahaa' sarimire simunyawbi mudikebwi jawiramaarila! Dihinyiwannyila! Gotiyari kudapiji sahwai sarimire kayaa'nanya marasi'nade'nanyi. ²⁰ Marasi'noji gaminyabadaa'nyi tewaanyagasa sariminyi maryasaabathelyi. Nabaai sariminyina Gotiyai yawiraka sinnawi Kiraaзитiyari dahilakakeri maryasaabathelyira Jizaazai. ²¹ Kigaakuna Gotiyai piropetiya tewaanyaraavire maangengi wijaa'ke sara yida'nike'na 'Sigunyavi Jizaazai yemwaaladelyira.' kada' yuya mudike yavada'galojiyagaa'na walaabathelyira. ²² Jizaazari dahilakakerina Ne Mozizai yida'nika 'Nyidasaabakabaabi! Naangei sarimire Gotiyai sirya'mwerajiyari piropetiyari dahilakoji sariminyina widasaabathelyira. Sai Gotiyare yagaala yihithathelyi. Yuya sa mi'na kyihithozi kadika wi'napiji sara jideihilyi. ²³ Piropetiya sari kurinaka gazaizai kadika mu'nyi kyoji Gotiyare a'mweraayawidaasi Gotiyai mu'nyade sari jaapaina yoji kayaaka yigaladelyira.' ²⁴ Ne Mozizai sara yida'nikesi. Sara kyidava' Gotiyari wi'nawijiwaakadivita piropetiya A'mwe Saamyiweliji yuya diviyaraji sara yirika daryaavi dangina nejaa'. ²⁵ Gotiyai sara wijaa'ke nelimwagarake' piropetiya nejaata dinika sariminyinengira. Gotiyai Ne sinnawinyaraavi naanga wijaa'ke' nelimwagarake' sariminyine yagaalyasira. Yagaala sa! Gotiyai Eviraamimi wijaa' 'Gimire yisiwai tewaanna kyoji sare'na Kwaakevaki jilikaimiraaya yuyaraavina tewaanya naanga yanga wideinyi.' ²⁶ Savina Gotiyai gannya widaayaderi dahilakaka sinnawi sariminyawinna kudasaaba! Jizaazai yihithivani! 'Gazaigizaigi gimire kayaa'nanyabwi jahalya'maka!' Sara yihithivanike! Gotiyare diraginya! yihigaimwagozi tewaanya naanga yanga yihyadelyi." Pitai sara wida'.

Kaajoliyaraayaba Pitalyi Joniji widahilya'nesi.

4 ¹ Pitalyi Joniji saraai a'mweraavi kuna widadaakilyiyagaa' Gotiyarina mubithika yira'divisaraji Gotiyare Angevina

dameraavi maremwaaidelyi A'mwe Sazuziyaraji sara bina ye! ²Bina yeva sinna tika wida'daasiyara. Sahwara dinyina “Jizaazai balaka ayina dikaavakelyi,’ widivanigilya'na a'mwera simunya nyawipidika! ‘Sinnawi Jizaazai kadikaava' nemi kabalawaaji divi dikavaade'nanyi,’ nyawipidika!” Dinyina kye' sinna tika widavakerera. ³Sinna tika wida'daasi nyilyai walakyagaa' a'mwe naangera yawi'na yeva “Sawisavi kotiya' madaannera!” Pitalyi Joniji saraari wila pwiyeve dinyina “Sawisa'na kalavuzangevi wakawaaji mwananyi kotiya' yaana!” Dinyina yeva kalavuzavi wimwaaihina ye! ⁴Wimwaaihina kye' kiri' a'mwe kwalaalyara widahilyavi kadika wi'neva Jizaazari limwagare! Sagaa' a'mwe sara sahwari limwagesara kwala naanga naanga 5,000 mwaale!

⁵Mwanyagaa' Anga Jeruzaalemi saba Juyaraavi maremwaaidivisaraji a'mwe naangeraji Juyaraavire Kiwjaraji yikabina yina ye! ⁶Yikabina yina kye' Gotiyarina Yira'de Naangei Anaazalyi Kaayapaazalyi Joniji Alekizaadalyi Gotiyarina Yira'de Naangere jilikaimiraayaraji bamwaaina yina ye! ⁷Bamwaaina yina kye' tinnyaba Kaajoliyara Pitariji Jonimiji saraari wimwaaiheva yiwaarave! “Sa' gara yawaaihila? Be diraginyavaka? Kirimire jawaaihila sa' aarine yayavaka?” ⁸Sara kyiiwaarave' Pitari Kuryai Tewaanyai yunebanna wilamwaaidi'nyi wida' “Nemaremwaaidivisaihilyi a'mwe naangeihilyi saihi, ⁹sivila kayaa'nanyari tewaanya yike' gamire sivilyiraai tewaanyiraai yavada'galyawaaiholya'na danehithiwaava! ¹⁰Sa'na sarimi yuyaihilyi Yizireliya yuyaraji saihi dara yawipija' ‘Ai, Kiraazitiya Jizaazai Naazareti mwaalyare diraginya' kyawaali' a'mwe dai maamidaryai yima'naka neminyaba daa'manikei daaka!’ Yihithiwolyai Jizaazari yisaviri sarimi niliya karame' baryari Gotiyai ayina yidikaavakelyi. ¹¹Sahwarina dinike' ‘Silaangerina madivisaihi “Waryaanyasi,” dineva wasi'ne', Gotiyai simidaangeri nayaa marayilamwaaihakelyi.’

Sa' dinikesi sahwarina. ¹²Kayaa'nanyanna Jizaazai gavei nevadaahasamaa'delyi. Kwaaka yuyavaki aane pwai kwari Gotiyai madahilakyaka nemire kayaa'nanya wasi'nyaneri Jizaazari wimwaaiha'. Aane pwaina kwaina mi'. Sahwai gavelyira,” sara wida' Pitai.

¹³Kaajoliyara dara wanganesa' “Niwaava, Pitalyi Joniji saraai lika myivanigilyaraai daaka! Saraai a'mweraai nemire sikuliyavi myadisaraai daaka!” Deva atika maru'nare!. Atika maru'nareva dara yawiresa! “O, a'mwe saraai Jizaazalyi kaanya jamaryagila!” ¹⁴Sara deva Pitalyi Joniji saraaryaba a'mweri yavada'gainikeri wanganeva dinyina ye! “Tewaanyai mena daa'manike'na saraari maiyagaala aane piri' kiri' mudaanna!” ¹⁵Mi'na dinyina yeva “Mwasawinna dimwaalyila!” diraginna widina ye!. Mi'na widina kye' kwalyawe' Kaajoliyara dinyina ye!. ¹⁶Dinyina yadivi' pwara yiwaara'na yina ye! “A'mwe saraarina gara yaajiwona? Sare' dare'nesi. Jeruzaalemi dava yuyara mwaaihasara yawi'maniga'

'Saraai tewaanya' diraginya' yawaaihila.' Sara yawi'manigasa' majina 'Sa' nebulya' mika!' muji yaanneinera. ¹⁷Aawa. A'mweraayaba yuneba yagaala sa' nudipidika! Diraginna widaathera. Sahware yayavina a'mwe aane pwai kwari mujikanera! Savine'na mala nayihiramaadika!" ¹⁸Mi'na dineva saraari jaka widina kye' saraai ayina wiladaa'dakilyi widina ye! "A'mweraahi, yuyagaa' a'mweraavi Jizaazare yagaala mujikanera! Jizaazarina mujiwaakyikanera!"

¹⁹Saraavi Pitalyi Joniji ma'maaragi "Sarimi sahwaihi tewaanna jawibwaryila! Gotiyai kanengamani! Gotiyare yagaalya' yagalya'mavakwolyi sarimire yagaalya' yakade'na tewaanyabwi daaka! Gara jawiryijiwaava? ²⁰Sare' dare'nesi. Naarimi sahwainai tinna wanganolyaji kadika wi'nolyaji sangina widakajinaai wijalikurakakaneinaalyi." ²¹Sara kudahi Kaajoliyara diraginna ayina wideva "Newi'nakilyi yagaala sa' mujiwaakyikanera!" wide' "Dalyula!" Sahwara a'mweraavina lika yesare. A'mwera sivila kayaa'nanyai tewaanya yima'nake'na Gotiyarina "Byaannakela," dina ye'. Sara dina yadaapiji Kaajoliyara yawi'na kye' "Aane piri' kiri' mabiramaariwo. Maramaannera!" Pitariji Jonimiji saraari daanga muvinya'. ²²Sare' dare'nesi. A'mwe sai wijiwaainya' yima'naka sai tewaanna yavada'galagilyai miginyai mi'. Kwarama a'mweraare ata siviliraalya wavila'nikelyi sagaa'.

Jizaazari wi'nadivisara Gotiyari widesa'nesi.

²³Pitalyi Joniji ya'ma'na yagila kirimireraayawinna wilaawina yagila Gotiyarina mubithika yira'divita naangeraji a'mwe naangeraji widesa' widahi. ²⁴Kudahi yuyara simunya gavevi yawi'divi' Gotiyari wide' "Nemaremwaaidinyaigi Sigunyasi Kwaakevasi saalaalyasi sa wakaka yuya sangi mwaaihasaraaviji yuyangiji wakaginyaiginyira. ²⁵Kigaakuna gimire Kuryai Tewaanyai Ne sinnawinyai Devitimi simunya' wijaavina Kiraazitiyarina. Wijaavina kyaa' Deviti gimire widaayadei gimire yawisa'na pikarya dara yida'na

'Ajimyangiyaraavire sinna tika be'na widava?'

Kumire a'mwera kayaa'na be'na yawire?'

²⁶Kwaakevakire kingiyara malya' maryamihe'.

Maremwaaidivisara gaidaasa'na yikabeva dine'

"Naangeriji gamire Kiraazitiyariji yigalaana!"'

²⁷Sara yida'nike'na nebulya' dara yima'nakesi. Anga dava A'mwe Erotiyalyi A'mwe Podiyaaazai Paailatiji ajimya piningiyaraji Yizireliyaraji yikabeva Jizaazai gimire widaayadei dahilakaginyarina dinyina 'Tamakaana!' ²⁸Savine'na diraginaangeigi sahwaigi yawi'na 'Sara yideinyi.' Yawi'na yaginya' sara yikabeva kunnya simunya myawiryeva kiri' gimire simunya' sara yina ye'. ²⁹Naangeigi, maiyagaala

nemijiyaraari widiwaasa' dahaasagaa' yawira'gizi githayadaanyainaavi ginnya diraginya' kanejaava'gizi lika myadaa gimire yagaalya' widaathe'nanyira. ³⁰Ginnya diraginya' kanejaava'gizi nabalinkeraavi yavada'galawaaji nabaai githaayade tewaanyai Jizaazare yaya' widawaaji diraginyaji atika maru'narya'neji yaadeiginyi.” ³¹Gotiyari mi'na kude! Kurya Tewaanyai yina kya' angevi wilamwaaleta ange' yonyi yonyi yidaasi Kuryai Tewaanyai yuyaraavi yunebanna wilamwaaina yada diraginya wijaavina ya'. Wijaavina kya' Gotiyare yagaalya' diraginna widadivi' lika myesare.

Jizaazarera avaaizimunya yawiresa'nesi.

³²Jizaazari limwaga'divita yuyara simunya avaaalyasi kurya avaananyasi yawi'divi' yuyaraavi kale wiadaasi tewaanna mwaalina ye!. Pwai myawirina “Nimire piri' kiri' niminyinesi. Jizaazare pwaraavine' mika!” Aawa. Yuyara kunnya gilyivita yuya pwaraavinengira. ³³Yanga yinyina yadivi' Widaasadera a'mweraavi Naangei Jizaazai dikaavake'na diraginna wijalikurake!. Diraginna wijalikurakesa' Gotiyai Jizaazareraavi nayaa kamaremwaala' yanga gaimwangebwi kuminyi warakesi. ³⁴Sare' daresi. Nayaa mwaalina kye' wimudaasaka aane pwai kwai mamwaalya'. Sare' dare'nesi. Pwara nigwimaayaraavina yawi'na yeva wawinyangire kwiyakwaravaji angengire kwiyakwaravaji sara kunnya yaasadivi' nigwia makabina yeva ³⁵Widaasaderaavina wijaavina kye' Widaasadera nigwimaayaraavina wijaavina ye!. Wijaavesa'na nigwimaayara mamwaalye'.

³⁶Sagaa' savina Jozepiyai Ahu'manna Saaipiraazi mwaalyai sara ya'. Gami sare yisavaa' Livaayai wo'nikerina Widaasadera yaya mudike' Baanavaazai widesalyira. Baanavaazai yagaala sa' “Pwaraavina simunya diraginya yivaimwadelyi,” dinikesi. ³⁷Baanavaazai gannya wawinya' kininnakei savi yaasaka nigwia yuya makabina yaka Widaasaderaavi wijaava'.

Ananaayazalyi Sapaairasi sayorinesi.

5 ¹Baanavaazai sara kujaava' kiri' A'mwe Ananaayazai mwaala'. Sare balaange' Sapaaira' yaya' wo'nikesi. Sai mwaalaka kirimire wawinya piri' yaasaka ²gannya a'mwevi widina “Naariminyine nigwia pini wakaka!” Widina yaka Widaasaderaavi pini makuna yaka wijaavina. ³Sara wijaavina kya' Pitai wida' “Ananaayazai, Saataani kagithiwa' sara baa'na yiwaa? Kwaasi yagaala Kuryai Tewaanyari widiwaa 'Nimire wawinya' yaasiwe nigwia yuya warika!' Kwaasi yagaala sa' baa'na widiwaana? ⁴Sinnawi wawinya myaasiwaanyagaa' gimiresi. Yaasa yagina nigwia gimirengi. Ginnya sidusavi kwaasiya sarebwi baa'na widiwaana? A'mweraavi kwaasi yagaala majahi. Aawa. Gotiyari kwaasi

yagaala widiwaana.”⁵ Sara kuda' Ananaayazai kadika wi'nakegaa' balina yaka wala'na ya'. Wala'na yake'na kadika wi'nesara lika naanga yesa'nanyira. ⁶Baryai wala'na kya' miginyara daavina yeva gilaayari yivi'dibuya pwiya yeva makuna yeva likyirakina ye'.

⁷Divi maalikogaa' (3 aawaaya) gamire balaange' sa'na kadika mu'nyaka angevi wilina. ⁸Wilina kya' Pitai wida' “Nyidana! Kirinnya wawinya'na nigwia da yuya dama'mwaai?” A'mwe' wida' “Yo, yuyangira.” ⁹Sara widina kya' Pitai wida' “Sayo'hi avaa'ina baa'na yawi'mwaala? 'Naangere Kuryai navika mwaaladelyira,' dathiwaala? Yaamijiya'na dathiwaala? Yi'haa, gimire a'mweri likyirakiwaasaraavire sivilyangi tikuryaba du'niwaana! Sara gimakwalyipi'de'ginyira.” ¹⁰Mi'na kuda' sagaa' gamire sivilyaraaryaba yarai wala'na yaka balina ya'. Balina kya' miginyara dara wanganesa' “O, mena davaimwaka!” Sara deva makwalyuna yina yeva gamire kwalaangeryaba wilalikyirakina ye'. ¹¹Wilalikyirakina kye' Jizaazare kusilaanyaviya yuyaraji a'mwe pwara kadika wi'nesaraji Gotiyare diraginya' yawi'divi' lika dikwosi'na ye'.

Diraginyaji atika maru'nasaji sanginesi.

¹²A'mweraayaba Apozeliyara Jizaazai Widaasadera wijiwaainyaji atika maru'nasaji yina ye'. Sagaa' Gotiyare Angevi Solomonimire yihuliviliyavina Jizaazarera yikabina yadivisare. ¹³Yikabina yadivi' lika wiridaasi pwara kuminyabanna myikabi yina ye'. Kiri' a'mwera a'mwemilika dina “Sahwara a'mwe tewaanyarera.” ¹⁴Myikabi yina yadaapiji a'mwe pwara Jizaazarera yima'nyina ye'. Pigaa' pigaa' a'mwe kwara kwara a'mwe kini kini Naangeri wi'nesara Jizaazarera yima'nyina ye'. ¹⁵Widaasadera yesa'na tusangi nabalnakeraavi makwalyaabina yeva yi'binyangiji lamulyangiji wakina yeva a'ba yilawimwaa'hina ye'. A'mwera simunya yawi'na “Pitai kaanya kyamaryoji gamire a'mabaalyai nabalnakeraavi kima'bwa'nya yirina kyoji sahvara tewaanyara yima'nipi'derera,” yawi'na yeva sara yilawimwaa'hina yesarera. ¹⁶Anga Jeruzaalemi saba anga piningidaasi kwala naange' kunnya nabalnakeraaviji yimaka widivisaraaviji makabina kye' yuyara tewaanyaraavi yavada'gaina yina ye' Widaasadera.

Apozeliyaraavi kayaa'na yesa'nesira.

¹⁷Sagaa' Gotiyarina Mubithika Yira'de Naangelyi gamijiyara Jeruzaalemi mwaalyara Sazuziyaraji Widaasaderaavina sinna tika wida'daasi dinyina ye'. Mi'na dinyina yeva wina yeva ¹⁸Widaasaderaavi wila marapwiyina yeva a'mweraavine kalavuzangevi wimwaa'hina ye'. ¹⁹Wimwaa'hina kye' kiri' sawisavi Naangere ejeliyai mamaayai kalavuzangeviya kaanya' baasina yaka mwasawi kuminyi jiwaramakwalyina yaka wida' ²⁰“Gotiyare Angevina wawopiji saba

daavapiji a'mweraavi Gaala davwina duzila!" ²¹ Sara kuda' sahwara yawi'na "Yo, sara yaana!" yawi'na yeva yirikevi Gotiyare Angevi wilaawina yeva wijiwaakina ye'.

Gotiyarina Yira'de Naangelyi gamijiyaraji sara Juyaraavire a'mwe naangeraavina jivwaramakabina "A'mweihi, nemi Yizireliyaraavi Kaajoliyaina yikabaana!" Jivwaramakabina kye' yuyara mwaaleva kalavuzavi dameraavi widaase' "Davanna Jizaazare yagaala widadivisaraavi dimakabyila!" ²² Kudaase' pwara kaanna wina yeva dara wanganesa' "O, sahwara mamwaalyi jihava!" Deva Kaajoliyaraayawinna ayina waweva ²³ wide' "Kalavuzangevi yi'mavona dara wangamwo' 'Kaanya lokiya mena tih'i'nadi'nyi kaanyangyaba damera nayaa daavina jiwaava!' Sara dona kiri' nemi kaanya baasona dara wangamwo' 'Ai, pwara midaaka!' " ²⁴ Sara kude' Gotiyare Angevina dameraavi maremwaaidelyi Gotiyarine tamira'divita naangeraji kadika wi'neva yawi'na "Sahwara gava mwaaihava? Gawinneraavaka?" ²⁵ Yaamiji kuna yawi'daapiji pwai wilaabina yaka wida' "Yithaanyila! Dinyu'nyila! Sarimi a'mweraavi kalavuzangevi wimwaihyawaaahasara Gotiyare Angevi daa'divi' a'mweraavi wijiwaakivanigava." ²⁶ Sara kuda' Gotiyare Angevina dameraavi maremwaaidelyi gamire dameraji sara waweva kuminyi ayina makabina ye'. Damera Widaasaderaavi mala maramyi ye'. "A'mwera sila neminyina naneliwakipika!" deva mala maramyi ye'.

²⁷ Angevina kuminyi makulaabina yeva Kaajoliyaraayaba wimwaaihina ye'. Wimwaaihina kye' Gotiyarina Yira'de Naangei yiwaara'na ya' ²⁸ " 'A'mwe darina mujiwaakipinera!' diraginna diraginna yihithiwa'do kiri' gevwi gevwi yiwaasaihila. Be'nana? Jeruzaalemi yuneba a'mwe yuyara sarinnya wijiwaakyabwi kadika wi'niwaasaihilyira. Sabwina dina, 'Sai balake'na Kaajoliyara yesa'ne'. Gamire tawe' sahwaraavine tivikisa,' dathivaniga'?" ²⁹ Mi'na kuda' Pitalyi Widaasade pwaraji wide' "Gotiyai sara kanedozi sara yaanneinera. Gotiyarina a'mwera sara kanedapiji sara myaanneinera! ³⁰ Yisaviri sarimi Jizaazari niliya tamarimwina kye' mena kabala' Ne sinnawinyaraavire Gotiyai yidikaavakelyi. ³¹ Kwaihwainakei mena kamwaala' Gotiyai gannya aangasimagi diraginyaba wimwaaihina kya' sai maremwaaidei nabaai kayaa'nanyaburi padaihasamaa'dei yima'na. Kyima'na' Yizireliyaina 'Nennya kayaa'nanyaburina simunya mudikebwi yawiramaraana!' dawaaji Gotiyari ginyira'na kyawaaji nennya kayaa'nanya marasi'na neyadelyi. Sa' Gotiyai nayaa yawi'mani'. ³² Sangina nemi tinna wanganona nayaa yawirona yagaala sa wijalikurakivanigo. Nabaai, nebulya'na Kuryai Tewaanyai avaaaina wijalikurakivani'. Kuryai sari Gotiyai gannya yagaala mididivisara yuyaraavina yanga wijaavadelyi," wide'.

³³ Sa' Kaajoliyara kadika wi'neva sinna tika naanga wida'daasi dina "Saraavi tamakaana!" ³⁴ Sara dina kye' kiri' pwai Kaajoliyaraavi

tinnyaba daavina ya! Sai Periziyai Gameliyali wo'nikelyi. Juyaraavire Kiwinya wijiwaakaderina a'mwe yuyara simunya yawi'na "Sai Gotiyare kiwinya nayaa wijiwaakivanikelyi," yawi'na yeva gamire yaya' munyaba makilesalyi. ³⁵Sai daavina yaka wida' "A'mwe saraavi mwasawinna marakaana!" Kuda' Widaasadera mena kwalyawe! Kaajoliyaraavi wida' "A'mweihi, Yizireliyaihi, a'mwe daraavina jide'na nayaa jawirila! ³⁶Sare' dare'nesi. Kigaa' a'mwe pwai Tiyuthaazai baka widina 'A'mwe naangeinyira.' Widina kya' a'mwe kwalaalyara (400) gamiji gaidaa'na kye' kiri' aamiyara Romiyara Tiyuthaazari tamakina kye' piwinna piwinna gamire midinesara yiwinama'na yina yeva yimaanyina ye! ³⁷Yiwinama'na yina kye' divi Ga'maaniyara yaya maaresagaa' diviyai Juthaazai Galili mwaalyai 'A'mwe naangeinyi,' kuda' a'mwe kwala naanga midinaabina ye! Kwala naanga midinaabina kye' kiri' Juthaazari tamina kye' sai balina. Balina kya' piwinna piwinna gamire midinesaraavi tamayiwinasina ye! ³⁸Sara yesa'na yima'nike'na dahaa' yihithima! A'mwe daraavina myaanneine! Mwaabika! Kumire yawisaji wawinyaji a'mweraavireburidaasa sara yetabaabi' kayaaka yadengira. ³⁹Kiri' Gotiyareburidaasa kayaaka myigalyi yaadeinera. Dara nyawiraadika! 'O, nemi Gotiyari mala wiramwoina daaka!' " ⁴⁰Gameliyali sara widake' sara yina ye! Widaasaderaavi jaka wideva pwaraavi wide' "A'mweraavi wilyabaalyi duramyila!" Mena kurame' Kaajoliyara naanga widina "Jizaazari yaya'na yagaala mujiwaakyi jideihilyira." Widina yeva kumire angengi yaasina ye! ⁴¹Sarevidaa'nyi Kaajoliyaraayawidaasi sahwaru wina yeva dinyina "Gotiyai neminyina dara yawi'mwa' 'Sahwaru tewaanyara mwaaihasa'na Jizaazarine yayavina kayaa'na yipi'de' wi'nanyaraavi.' Sara daka diraginna nemwaaahiwakeina yilaaya yivanigoinera." ⁴²Sara dinyina yeva yirika gazagaasagaa' Gotiyare Angeviji a'mweraavire angengiji saba Kiraazitiya Jizaazarina yagaala tewaanya' kuna widadiviki. Neminyina Jizaazari Gotiyai dahilakake'na kuna wijiwaakadivikira.

Widaayadivita atina ata puridaasi pwaraalyaraavinesi.

6 ¹Divi yirika sangi Jizaazare mididivisara kwala naanga naanga yima'nadaapiyagaa' Girikiyagaala dadivisara Yiviruyagaala dadivisaraavina kinimyagaala dinyina ye! Girikiyagaala dadivisara dinesa'nanyi "Nigwimaayaraavi yanga wijaavadivisara, nemire sigiraayangi wapaaya maalika wijaavadivi' kiri' Yiviruyagaalya' dadivisangi naanga wijaavadivisarera." ²Sara didaapiji atiraai siviliyiridaasi pwaraalyara mididivita yuyaraavi jiwaramaa'na "Yuyaihi, jikabyila!" Jiwaramaa'na kye' yikabina kye' widina ye! "Gotiyare yagaalya' ya'mavaaja' yi'binyavi widayaade' wapaaya yanga wijavaade' yilaaya myivanigo. ³Aawa, nya'mweihi, nemire

wawinya naange! Gotiyare yagaalya widadaanya savina a'mwe ati ata puridaasi pwaraalyaraavi kadahilakapiji sahwaru wapaaya yange!na maremwaaibi'deraavi sara wimwaihaana! Sarimijiyaraavina 'A'mweraavi yunebanna Kuryai Tewaanyai wilamwaaidera sidu'nakera damwaihava! Sahwara a'mwe tewaanyarera,' jalikurakadivisaihi yawirapiji sahwaruavi dithahilakyila! ⁴Sara kyapiji yuyagaa' nemi sahwana Gotiyari wijavulyi Gotiyare yagaalya' widaayabulyi kuna yaadeinera." ⁵Widaasadera sara kude! yuya kwala naange' dinyina "Yo, tewaanyasira." Dinyina yeva Sitivenimi dahilake!. A'mwe sai Jizaazari yuna diraginna limwaga'delyi. Gamire simunyavi Kurya Tewaanyai yuna wilamwaaidera diraginna wimwaihakelyira. Sitivenimi dahilakeva Pilipimiji Pirokoraazalyi Naaikenaamiji Taamonimiji Paamenaazalyi Nikolaazalyi dahilakina ye!. Nikolaazai sai Anga Aadiyoki mwaalyalyi. Sinnawi sai Maavei mwaalaka divi Juyaraavirebwi wi'naka aayagaa' Jizaazari wi'nakelyira. ⁶Mi'na dahilakina Widaasaderaayawinna makabina kye! sahwaru Gotiyari wideva kumire wawinya'na diraginya wimwaihya'na kumire minyaginyangi ata dathiwanna yina ye!.

⁷Jeruzaalemi yunebanna Gotiyare yagaalya' kadika kuna wi'ne!. Kadika kuna wi'nadaapiji Jeruzaalemi mididivisara kwala naanga naanga yima'nyina ye!. Nabaai Gotiyarina mubithika yira'divita kwalaalyara Naangeri limwageva gamirebwi midinna ye!.

Sitivenimi wila pwiyesa'nesi.

⁸Sitivenimi yunebanna Gotiyare yanga gaimwangebulyi diraginyabulyi kininnakelyi. Sitiveni diraginaangei a'mweraayaba atika maru'nasa'neji wijiwaainya'ne diraginyaji yina ya!. ⁹Sara yaka yagaala widadaasi gamire yagaala sinna tike'na a'mwe pwara maanga wide!. Maanga widesara kigaa' Romiyaraavina kalavuziwawinya yesa' divi kalavuziwawinya yagalya'mave!. Yagalya'maveva dinyina "Nemi lotuanga mudikevina yikabaatheinera." Sara dinesara Anga Saairini mwaalyaraji Anga Alekizaadiriya mwaalyaraji sara yikabadivisarera. Sara maanga widadaapiji Juya pwara Kwaaka Siliziyadaasaraji Kwaaka Eziyadaasaraji sara Sitivenimi maanga widina ye!. ¹⁰Maanga widina kye! Kuryai Sitivenimina siduta naange! kujaava! Sitiveni diraginna widaka kumire yagaalya wavila'na ya!. ¹¹Wavila'na yake'na sinna tika wida'daasi pwaraavi kwaasi yagaala wija'na nigwia wijaavina kye! sahwaru kwaasi yagaala widina "A'mwe dai Sitiveni Ne Mozizarinaji Gotiyarinaji birala widadaasi kadika wi'niwoinera." ¹²Kwaasi yagaala widina widina kye! a'mweraji a'mwe naangeraji Kiwijaraji sinna tika davina ya!. Sinna tika davina yadaasi Sitivenimyawinna yarai bina yeva galalimwanna yeva Kaajoliyaraayabanna makuna ye!. ¹³Makuna yeva kwaasi yagaala wija'neraavi makulaabina kye! sara kwaasi yagaala widina "A'mwe dai

Gotiyare Anga tewaanya davinaji Ne Mozizare kiwinyavinaji birala widadelyira. ¹⁴Sare! dare'nesi. Kadika wi'nyina 'Jizaazai Naazareti mwaalyai Gotiyare Ange! wo'dalasi'na yoji Ne Mozizai kiwinyabulyiya nedinike maryovimaa'nadelyira,' sara kadika wi'niwo." ¹⁵Mi'na widina kye! Kaajoliyaraavireba walamwaaina yesara Sitivenimi baihana'na yeva dara wanganesa! "Ai, dare sinnya! Gotiyare mamaayare sinnya'bisa' dangamanigona byaanna yidaasi!"

Sitiveni widake'nesi.

7 ¹Gotiyarina Mubithika Yira'de Naangei Sitivenimi yiwaara'na ya! "Nediwaasa' giminyina nebulya'na dingaka?" ²Yiwaara'na kya! Sitiveni wida! "A'mwe naangeihi, nya'mweihi, dinyu'nyila! Gotiya byaannakei Kigaakuna Ne sinnawinya Eviraami Anga Aarani mamwalaawi yaakegaa! Kwaaka Mezopotemya kuna mwalyaakegaa! Eviraamimi yima'naabina yaka ³widina 'Ginnya kwaakeviji ginnyaraaviji ya'mava'gizi kwaaka piri! givwaridaakwidedvina diwodeiginyira.' ⁴Widina kyaa! savina Kwaaka Kaalithiyadaasi Eviraami ya'ma'na yaka Anga Aarani mwaalina. Mwaalina kya! Eviraamimi ganimaangei mena balyaakegaa! Gotiyai widina 'Givwaridaakwidewinna diwona!' Widina kya! kwaaka davaki sarimi mwaaihasawinna bina. ⁵Mi'na bina kya! sagaa! Gotiyai kwaaka yarai mujaayi yaa! Kwaaka naangeva! mujaayi, kwaaka maalikeji! yarai mujaayi yaakesira. Mujaayi yake! kiri! yune naanga nebulya'na widina 'Divi kwaaka davi kagizaava'muji gimire! diviyara gimireraavire! waragothesira.' Sagaa! Gotiyai yune naanga nebulya'na sara wijaaakegaa! Eviraami kaimiraavimaayai mwalyaakelyi. ⁶Gotiyai da! widina 'Menyaraavirewi gimirera mwaalina yapiji kalavuziwawinya' yipi'derera. Kalavuziwawinya' yadaapiji pwara kayaa'na yipi'derera. Kwarame naanga naanga (400) wavila'daawori kayaa'na mwaai'bi'derera. ⁷A'mwe anga naanga pimaginyara gimireraavi diraginna maremwaabi'deraavi maryawibwarideinyira. Sara kamaryawibwara'muji kwaaka savaki gimirera yagalya'ma'na yapiji dava bamwaaapiji yileyagaala nyidipi'devanyi.' ⁸Widina yaka yagaala piri! widina 'Nimire yagaalya'na giminyiji gimijiyaraaviji kilaakeji! davina jila!' Gotiyai sara widina kyaa! ganaange! Aazakimi maryaakegaa! yirika ati ata puridaasi daryaai dariki Eviraami gamire kilaakeji! davina. Mi'na davina kyaa! divi Aazaki gamirei Jaikopimire kilaakeji! davina kyaa! divi Jaikopi Ne sinnawinya atiraai sivila puridaasi pwaraalyaraavire kilaakeji! davina yaakebulyi Juyainaavirebwi.

⁹Ne sinnawinyaraavi kumire kuvigwaalaangei Jozepiyarina tiganaarya kyaa! sinna tika kudayaa! pwaraavi yaasina kyaa! sahwara Kwaaka Yizipina yaasiwa'wawinya'na makuna. Wi'na makuna kyaa! kiri! Gotiyai gamiji mwaalina. ¹⁰Mwaalina yaka Jozepiyari kayaa'na yaasagaa!

Gotiyai diraginna wimwaaihina yaa'. Kwaaka Yizipi maremwaaidei Peroyaryaba Jozepiyai daa'di'nyi Gotiyai tewaanna wina kyaa' Peroyai dara wanganyaake' 'Ai, a'mwe dai nawi'nyai sidu'nakei daaka!' Sara daka widina 'Niminyina Kwaaka Yizipi davakiji a'mweraaviji nyidaayadivisara nimore angevi mwaahasaraaviji dimaremwaala!' ¹¹Widina kyaa' Jozepiyai maremwaaidi'nyi Kwaaka Yizipiji Kwaaka Kenaaniji yuya sabanyaai mijika naange' yima'nyina. Mena yima'nyina kyaa' a'mwera mijika naanga wiadaa'nyi Ne sinnawinyara tika munne'na birina birina kyaa' mijika wina. ¹²Mijika wina kyaa' saggaa' Jozepiyari ganimaangei Jaikopi dara wi'nyaake' 'O, Kwaaka Yizipi wapaaya witizila darika!' Daka pigaa' gawaalivaangera Ne sinnawinyaraavi widaasina. ¹³Yizipina widaasina kyaa' ayina bina kyaa' pigasaai widaasina kyaa' Jozepiyai gya'mweraavi nayaa widina 'Jozepiyainyi. Sarinnya sirya'mweinyi.' 'Jozepiyainyi,' widina kyaa' Peroyai dara yawiryaa' 'Ai, Jozepiyare yisavaakiyara sara daaka!' ¹⁴Mi'na dina kyaa' Jozepiyai ganimaanga Jaikopimina yagaalya' widaasina 'Nimwai, Kwaaka Yizipi davanna gimiji gimore yuyaji saili divideihilyira.' Saggaa' Jaikopimire jilikaimiraaya 75 mwalyaasangira. ¹⁵Widaasina kyaa' Kwaaka Yizipi saba Jaikopi wina kyaa' divi saba gamiji Ne sinnawinyaraji balina. ¹⁶Balina kyaa' divi ayaba Anga Sikemi kumirera kumire yaginya makuna yeva simaangevi wakina yaa'. Simaange' kigaakuna Eviraami Yisavaakiya Emoyaraavi nigwia mubyaakesi.

¹⁷Gotiyai Eviraamimi yagaalya' wijaaka nebulya' yima'nya'na aya kigaa' yima'nyina kyaa' Kwaaka Yizipi nemirera kwala naanga naanga yarai yima'nyina. ¹⁸Yima'nyina kyaa' Kingiya gei Kwaaka Yizipi gaai maremwalyaakegaa'nanyi. Kingiyai sai Jozepiyarina myawiryaa'kelyi. ¹⁹Gaai maremwaaina yaka nemireraavi kwaasi yaka kayaa'na yina kyaa' Ne sinnawinyaraavi daanga naanga wina yadaasi Kingiyai widina 'A'mwemiliki, sarinnya a'mwe bwaranyaraavi kamaarapiji mwasawinna sahwaravi dimarasi'nyila baibizaraavi! Yarai dimarasi'nyila!' ²⁰Mena widina kyaa' saggaa' ganaange' Mozizari maarina. Mozizai bwaranya nawi'nyalyi. Mozizari maarina kyaa' lika yulyakina kyagi lawe dikaai diki ganimaangere angevi kave mwaalina. ²¹Kave mwaalina kyaa' gamire angevidaasi piwi wakina kyagi Kingiyai Peroyare garaavaange' maranganna yaka 'Ninnyalyira,' daka gannyari maremwaaina. ²²Maremwaaina yadisi Yizipi mwaalyaraavire siduta yuyabwi wijiwaakina kyaa' a'mwe naangei wawinya diraginya' yadei yima'nyina yaka yagaala nawi'nya' dadei yima'nyina yaakelyira.

²³Kwarame a'mweraare ata siviliraai Mozizari wavila'na kya' sai simunyavi yawi'na 'Peroyare angevi yuyagaa' namwaa'imudika! Ninnyara Yizireliyaraavi angyiri'maata yima!' dina yaka kaanna wina. ²⁴Kaanna wina yaka dara wanganake' 'O, Yizipi mwaalyai nimireri kayaa'na

jivanika!' Sara daka 'Padaihasamaasa'nana,' daka minya maaraka Yizipi mwaalyari tamakina. ²⁵ Wi'na tamakina yaka yawi'na 'Ninnya nya'mwera dara yawi'na "Gotiyai Mozizari yasaabina kyiwala' Mozizai nevadaihasamaaradelyira,'" Sara yawi'na kyaa' kiri' kumi gaminyina sara myawirina. ²⁶ Sara myawiri kyaa' mwanyavi Yizireliyaraai tannyina yadaakilyi Mozizai tinna wanganaka. 'Munya yirila diwagima!' daka widina 'A'mweraaihi, dinyu'nyi! Kirimidaraaihi mwaaihilya'na be'na tannivanigilyaraaihilaka?' ²⁷ Widina kyaa' pwai gya'mweri kayaa'na yakei Mozizari yitavaka yiwaara'na 'Nemaremwaaidinyaigi, kotiya' neyawibwarya'neigi aai githahilakakeiginaka! ²⁸ Wona Yizipi mwaalyari tamakyawaaihinyabaabi' dinyiramakijiwaana?' ²⁹ Yiwaara'na kyaa' Mozizai kadika sara wi'nyina yaka 'Yuyara sara wi'niwaasara daaka!' daka Kwaaka Yizipidaasi likaanya wina yaka maavewi Kwaaka Mithiyani mwaalina. Saba mwaalina yada kaimiraayaraari yawakinyina yaa'.

³⁰ Divi kwarama a'mweraare ata siviliraai wavila'na kya' a'mwe maayaba Mugunya Saainaaya simagi Mozizai mwaalina. Saba mwaalina yadi'nyi Gotiyare mamaayai ejeliyai walaabaka yisiki wilina kyaa' yisi' dika yidina yada ditaalita wanyina. ³¹ Ditaalita wanyina yadaa'nyi Mozizai tinna wanganaka ni'nika yaka dina 'Sa' beri' dingaka? Tinna nayaa wanganima!' dina yaka yisikyabanna kaanna wina. Kaanna wina yaka kiri' Naangere maanguraaya' kadika wi'nyina ³² 'Gimire Ne sinnawinyaraavire Gotiyainyira. Eviraamiji Aazakiji Jaikopiji saraavire Gotiyainyira.' Kadika sara wi'nyina yaka lika dikwosi'nya'nei bi'bita yina yaka yisiki tinna mwanganyina. ³³ Tinna mwanganyi kyaa' sagaa' Naangei widina 'Mwaaiheinyina kwaaka da' girikita maaya' warike'na kwaabizivilyawaari dilabwa'mwagakya! ³⁴ Kwaaka Yizipi nimore a'mweraavi daanga naanga wividaa'nyi wangamwa. "Aakai, aakai," jaka kadiwaa' kadika wi'niwa. Kadika wi'nena padaihasamaasa'na waimwaabe. Yarala! Sare'na Kwaaka Yizipina githaasideinyira.' Sara widina yaa' Gotiyai.

³⁵ Mozizai dari Yizireliyara birala wijaasalyi. 'Nemaremwaaidinyaigi kotiya' neyawibwarya'neigi aai githahilakakeiginaka!' yiwarayaasalyi. Sahwari Gotiyai widahilakaka widaasina ya'. Yizireliyaraavi maremwaaidei padaihasamaa'deri widaasina yaakelyi. Yisiki dika yidadaasi yisiki mamaayai wilamwalyaakei Mozizari wigaimwagyaakelyi. ³⁶ Gotiyai widaasina kyaa' Kwaaka Yizipidaasi Mozizai a'mweraavi jivwaramakabina. Kwarama a'mweraare sivilatiraalyagaa' Mozizai a'mweraavi wigaimwange'na atika maru'narya'neji wijiwaainyaji sa yina yaakelyi. Kwaaka Yizipi sabaji Saalaalya Wayaake' wo'nikebaji a'mwera maayaba kayaa'nanyabaji saba sara yina yaakelyi. ³⁷ Nabaai sai Yizireliyaraavi widina 'Gotiyai nyidasaabakabaabi' sarinnyai sirya'mwei piropetiyai Gotiyari

wi'nawijiwaakaderi sariminyina widasaabathelyi Gotiyai,' widina yaakelyi Mozizai. ³⁸Wawinya maayaba sai Gotiyare kusilaanyasi mwalyaakelyi. Saba Mugunya Saainaayavi ejeliyai widina kyaa' Mozizai Ne sinnawinyaraavi sara widina yaakelyi. Gotiyai yagaala gaalyabwine nejaaya'ne Mozizai wijaake neminyina dinikengira.

³⁹Ne sinnawinyara Mozizai wijaake' kadika mu'nyi, mamidinyi yaa'. Aawa. Gaminyi galazekivaina yevera kumire simunyangi yawi'na ye' 'Kwaaka Yizipi tewaanyabanna ayina wawaanneinera! We!!' ⁴⁰Yawi'na yina yeva Mozizai mugunyavi mwaalakegaa' A'mwe Eronimi widina 'Neminyine Naangei a'mwa'mweri kyavikarya'gizi A'mwa'mwei nejiwaramakwona! Sare' dare'nesi. Kwaaka Yizipidaasi Mozizai sai nejiwaramakabakei gawi mwaalika? Nemi myawiryiwona.' ⁴¹Sara widina yeva a'mwa'mwei bulimakaawoya diwinyari yavikaryeva yikunaabithika wijaaya'ne'na kwaasi naangeri widina 'Naangeigi, yikunaabithika da' giminyine' tamwona.' Widina yeva sahwaru yavikaryaasari yilaaya yina yadivi' tika munne nyina. ⁴²Tika munne nyina kyaa' Gotiyai kuminyi ginyiwanna yaka tewaanna myi yaka dina 'Kayaa'nanyara kwaasiya'na nyilyariji laweriji silingaaminaraaviji yilaaya yipika! Sara yilaaya yapiji waryaanyara yima'nipi'dere.' Gotiyai dina yaakabaabi' dividaasi Gotiyari wi'nawijiwaakyara pikarya yida'na 'Yizireliyahi, niminyine mika!

A'mwamaayaba kwarama potiyagaa'

Bulimakaawoyaraavi tameva manyijayaa'.

⁴³Kwaasi naangei Molokimine yivikanga' yikwa'divi'

Pwai Repaanimine silingaamina a'mwa'mwe' yikwa'divi'

A'mwa'mwe sa yavikaryeva yileyagaala widina yadivisaihilyi.

Sabwine'na Anga Bawiloni aagimagi menyabanna

yihimakudeihilyira.'

Sara dinikesi.

⁴⁴Dividaa'nyi a'mwamaayaba Ne sinnawinyara Gotiyai saraayaba mwaalake'ne jalikurakya'ne kwaabiyivikange' yavikarina. Gotiyai Mozizari sara wijaakabaabi' sara yavikaryaasasi. Gotiyai pikizaaya'bisa' wijiwaainyina yaake' Mozizai tinna wanganyaakabaabi' yavikaryaasasi. ⁴⁵Yavikarina kyaa' diviyara Ne sinnawinyara kwaabiyivikange' yikwawaabina. Saggaa' Gotiyai ajimya piningiyaraavi yirawaasina kyaa' diviyaraji Jozuwaasi sara Maaveraavire kwaaka maarina yaasara davanna Gotiyare kwaabiyivikange' yikwawaabina ye'. Yikwawaabina kyaa' kwaaka dava kuna wa'di'nyi Ne Deviti mwalyaakegaa'na. ⁴⁶Deviti mwaaidi'nyi Gotiyai wanganaka dina 'Deviti a'mwe tewaanyalyira.' Dina kyaa' Deviti Gotiyari yiwaara'na 'Jaikopimire Gotiyaigi, giminyina ange' madima! "Yo," kanyida'gizi madideinyira.' ⁴⁷Yiwaara'na kyaa' Gotiyai gevwi kyawiryaa' Gawaalivaanga Solomoni ange' gaminyina madina yaakelyi.

⁴⁸ Sa'na kiri' a'mwera angengi madivisangi Gotiyai Munya Ke'mwewinyai yuyaraaviji yuyangiji wavila'dei mamwaalyadelyi. Angengi mamwaalyade'na piropetiyai Gotiyari wi'nawijiwaakadei dinikabaaibisasi.

⁴⁹ Naangei dinikesi. Sigunya naangeba maremwaaidinyainyi. Kingiyare namwaalyisa'bisavi Sigunyavi walamwaaina yadinyainyi. Paihisa'bita Kwaaka maalika davaki maremwaaidinyainyi. Nimire sivila Kwaaka yuyavaki paihiremwaaidinyainyi. Nimi Naangeinyine ange' gara madivitaihilaka? Nawi'nyaba kwaamu' mwaalideva gava warika?

⁵⁰ Yuyangi kaavilyai aaihwilaka? Nimi sahwainyira! Sara dinikesi.

⁵¹ Ne sinnawinyarabisaihi Kurya Tewaanyai yihithada yuyagaa' wanganakina yadivisaihilyi. Sarinnyabwi diraginna yawi'divi' Gotiyarebwi navika yadivisaihilyi. Sarinnya yawita Maaveraavire yawi'divisaihilyi. Siryakwalaangera Gotiyare yagaala yuya pihadika yina yaatabaabi' sarimi sara yadivisaihilyi. ⁵² Sarimire Ne sinnawinyara Gotiyari wi'nawijiwaakade aane pwai kwari yuyagaa' kayaa'na yaasara midaa'! Sara kayaa'na yaasara Gotiyai widaasaderaavi tamakina ye'. Kigaakuna Gotiyarera widina 'Divi yida'maraangei Gotiyari widaayadei bathelyi.' Sara widina yaasaraavi sarimirera tamakina. Tamakina kyaa' Gotiyari widaayadei mena bina kya' sarimi kotiyavina makuna yeva sahwari kayaa'na tamakina yiwa'daa'. ⁵³ Gotiyare Kiwinya ejeliyara Gotiyai widaasadera kyihizaave' kiri' sabwi myivanigasaihilyira," sara wida' Sitiveni.

Sitivenimi silyaji livaramakesa'nesi.

⁵⁴ Kaajoliyara Sitiveni widadaasi kadika wi'nadaapiji kumire sinna tika wida'daasi diraginna maadithiwi'nya ye'. ⁵⁵ Diraginna maadithiwi'nya kye' kiri' Sitiveni Kurya Tewaanyai yunebanna wilamwaaidi'nyiyai Sigunyavi maranganaka dara wanganake! "Gotiyare byaannyabwi tinna wangamanige. Gotiyare aangasimagi Jizaazai dathaavika!" ⁵⁶ Mi'na daka widina "Yithaanyi, Sigunya' baasinikevi wangamwa. Gotiyare aangasimagi A'mweraavine Kaimiraayai daavikeri wangamwa." ⁵⁷ Widina kya' sinna tika wida'daasi jaka naanga deva kadika mu'nya'na asa kadikengi tilavalimwaga'nyina yeva gaminyawinna avaazimunyasiya yuyara yarai kaanyave'na bina. ⁵⁸ Kaanyave'na bina yeva Sitivenimi galalimwanna yina yeva makuna yina yeva anga naangeba mwasilaa wasi'na yina yeva silyaji gaminyi liwakina. Kotiyavi kwaasi yagaala wijalikurakesara kunnya yivita taapainyina yeva Miginya Soli wo'nikeryaba yarai wakina yeva silyaji gaminyi liwakina. ⁵⁹ Yarai liwakina yadaapiji Sitiveni Naangeri jaka widina "Naanga Jizaazaigi,

nimire kuryari dimaaka!”⁶⁰ Widina yaka kwadaai gilina yaka jaka naanga widina “Naangeigi, kuminyine kayaa'na nyivanigasa'na myawi'dinnera!” Widina yaka se balina ya'.

8 ¹Sitivenimi tamakina kye' Soli yawira! “Yo. Tewaanyasira.”

Soli Jizaazareraavi kayaa'na yake'nesi.

Sitivenimi tamakesagaa' yirika sagaa' Anga Jeruzaalemi Kiraazitiyare kusilaanyaviyara mwaalesaraavi pwara kayaa'na kayaa'na yina. Kayaa'na kayaa'na yina yadaapiji Jeruzaalemi Widaasadera gavera kuna mwaaidapi Jizaazare pwara yuyara Kwaaka Juthiyaji Kwaaka Sameriyaji piwinna piwinna yiwinama'na ye'.² A'mwera Sitivenimi karamake' Gotiyari yilaaya yadivisara kale kwia' Sitivenimi makuna yeva likyirakina yeva yikwaraamaya yadivi' kinna naanga dina ye'.

³Soli dina “Jizaazarebwi kayaaka yigalima!” dina yaka kayaa'na yina. Angengi wilina yaka Jizaazare kusilaanyaviya a'mweraaviji a'mwengiji wilamwagi'nyina yaka kalavuzangevi marimwaaihina yaka sara kayaa'na yina ya'.

Kwaaka Sameriya yagaala tewaanya' wijiwaakake'nesi.

⁴Jizaazari wi'nadivisara yiwinama'na yevevidaa'nyi gazabazaba mwaalina yadivi' Gotiyare yagaala tewaanya' wijiwakamarina ye'.⁵ Anga Sameriya sawinna Pilipi wina yaka Kiraazitiyari Gotiyai dahilakakerina a'mweraavi widina.⁶ Widina yadaa'nyi kwala bwa'naanya kadika nayaa wi'nyina. Nayaa wi'nyina yadivi' Pilipi diraginya wijiwaainya'neji yada yuyara wanganna.⁷ Sare' dare'nesi. Wanganna yadaapiji a'mwe kwalaalyara yimakera kininnakeraavire munyikaavi yimakera bwalyuna yadivi' jaka naange' widina yeva kaanna wina. A'mwera kunnya kilaakejika kwaayakwaaya myadivisaraaviji yaginya bainikeraaviji sara a'mwe kwalaalyaraavi yavada'gaina kya' tewaanyara mwaalina.⁸ Tewaanyara mwaalina yesa' Sameriya mwaalyara yilaaya naanga yadivi' mwaalina ye'.

⁹Anga saba a'mwe pwai Saaimoni wo'nikei mwaalina. Sai kulakei gannya kwalya yaderina anga naanga simaginya Sameriya mwaalyara atika maru'na'na yesalyi. Saaimoni widina “A'mwe naangeinyi. Sidu'nakeinyi,” widina yada¹⁰ anga saba mwaalyara yuyara a'mwe naangeraji a'mwe maalikeraji sa kadika nayaa wi'nyina yeva widina “Gotiyare diraginyasiyalyira. ‘Yi diraginya sa' naangesi,’ dadaanyasi,” sara widesalyi.¹¹ Naangegaa' kwalyaji giri'nyaji yada atika maru'na'na yadivisangina yuyara kadika nayaa wi'nyina yesalyira.¹² Saaimoni sai mwaalina yada sara yada kiri' Pilipi Kiraazitiyai Jizaazarinaji Gotiyai nemaremwaalya'naji sawaarina yagaala tewaanya' widina kya' kumi wi'nyina yeva “Sabwi nemi midinaana!” dinyina yadivi' Kiraazitiyari

limwanna kye! Pilipi aalyavi bavitaaziya yina a'mweraaviji a'mwengiji sangi. ¹³Bavitaaziya yina kya' Saaimoni sahwei limwanna kya' Pilipi bavitaaziya' kya' Pilipinyaba mwaaida Pilipi wijiwaainya naangeji diraginyaji yina yadaa'nyi Saaimoni atika maru'na'na ya'.

¹⁴Anga Jeruzaalemi apozeliyara Jizaazai Widaasadera dara wi'nesa' "Sameriya mwaalyara Gotiyare yagaalya' dama'mwaava!" Deva kuminyawinna wigaimwange'na Pitariji Jonimiji saraari yaasina.

¹⁵Yaasina yesaraai Sameriya sabanna yi'mavaawina yagila Jizaazari wi'nadivisaraavina Gotiyari widina "Gotiyaigi, a'mwe yuya dara ginnya Kurya Tewaanyari maapika!" ¹⁶Sare' dare'nesi. Sagaa' Pilipi Naanga Jizaazari yayavina bavitaaziya' yakegaa' Kurya Tewaanyai yuyaraavina mabwalawiminaawi yakerera. ¹⁷Pitalyi Joniji saraai Gotiyari widina yagila kumire minyaginyangi ata dathiwanna kyagi Kurya Tewaanyari maarina ye'.

¹⁸Saaimoni dara wanganake' "Niwaava, widaasadisaraai ata kadathiwamwaai Kurya Tewaanyari kumi maarina jiwaava!" Sara daka gannya nigwia maaraka Pitariji Jonimiji widina "Nimire nigwia yihimubima! ¹⁹Niminyina 'Sai a'mwe pwai kwari ata kadathiwagozi sahwei Kurya Tewaanyari maarana!' dakiri sare diraginya' dinyijaayila!" ²⁰Widina kya' kiri' Pitai widina " 'Ninnya nigwianna Gotiyare yange' mubima!' yawi'mwaanya'na gimiji ginnya nigwiji Dikebanna diwodeiginyira. Yawita sa' kayaa'nanaangesira. ²¹Yiwolya'na nemire wawinya' gimire' daaka! Sare' dare'nesi. Gotiyai gimire simunya yawisavi gwangamwa'. Simunya kayaa'nanyavi gwangamwakeiginyi. ²²Sarevidaa'nyi ginnyabwi kayaa'nanyabwi dasika! Mudikebwi jawiramaaka! Wasi'na'gizi Naangeri duthana! 'Nimi simunya yawi'mwe'na nimire kayaa'nanya' dimarasi'na! Nayaa mwaalima!' ²³Sare' dare'nesi. Giminyina dara wanganawe' 'O, a'mwe dai wabarinna diraginna yadei daaka! A'mwe simunya kayaa'na yawi'dei daaka!' Dena githiwa," widina. ²⁴Pitai widina kya' Saaimoni saraari widina " 'Nyidiwaala aane piri' kiri' niminyina nanyima'nadika!' dena yihithiwe'na dakilyi Naangeri duzila!" widina ya' Saaimoni.

²⁵Jizaazai yake'na tinna wanganagilya'na Pitalyi Joniji saraai yuyaraavi wijalikurakina, yi, Naangere yagaalya' widina yagila dinyina "Jeruzaalemi sawinna ayina wawakadera," dinyina yagila kaanna wina. Kaanna wina yadi' Kwaaka Sameriya anga mannikeba yagaala tewaanya' damarina yagila Jeruzaalemina wawagi.

Pilipi Murija naangeri wida' Kwaaka Yithiyopiya mwaalyari.

²⁶Naangere mamaayai ejeliyai Pilipimi widina "Yovirava'gizi tusa' Jeruzaalemidasi Anga Gaazanevi dalaawa!" Tuta sa' a'mwe maayaba makwalaawinikesira. Sara widina kya' Pilipi sara yina. ²⁷Sara yina

yadaasi, yithaa, Kwaaka Yithiyopiya mwaalyai a'mwe naangei gannya angewinna wina. Kwaaka Yithiyopiya a'mwe naange! Kaadeziya! maremwaaidesi Kwiniya!. A'mwe sai Kaadeziya! kwiniya savire nigwiaji nigwilalaakaji yuya sa maremwaaidelyi a'mwe naangei. Anga Jeruzaalemi Gotiyari yilaaya'na wiakei gannya kaariziyavi ayina wina. 28 Ayina wina yada Gotiyari wi'nawijiwakyaakei Piropetiya Aazaayai pikarya yida'nike! tinna wanganna. 29 Tinna wanganna yadaasi Kurya Tewaanyai Pilipimi widina “Kaariziya savina wirata'na'gizi avaina diwila!” 30 Widina kya! sawinna Pilipi kaanyave'na wina yaka dara dina “Piropetiya Aazaayai yida'nike! bukuya! wanganaka divanika.” Sara dina yaka yiwaara'na “A'mweigi, yagaala sa' dangamaniginya' jawi'mwaana?” 31 Yiwaara'na kya! “Aawa, pwai mujiwaainyi nyaja' gara yawirijiwana?” A'mwe naangei sara widaka Pilipimi widina “Davina yilaaba'gizi niminyaba mwaala'gizi sarevina dinyijiwaakya!” Widina kya! kaariziyavi wilamwaaina. 32 Gotiyare bukuya! wanganake! dare! dinikesi.

Sipizipiya pwari tamyana makwodivitabaabi!

A'mwera tamakya'na makuna yesalyi.

Diwinyare arila wiri'deryaba jaka majadevaabi!

Kayaa'na kye! sai yagaala majake'nanyira.

33 Birala wideva kotiyavi sarina kwaasi widesalyi.

Karame! Kwaaka davaki gamire gaalyabwi maaresa!

Gamireba sara yesaraavire kayaa'nanyabwi aai wi'nadelaka?

Piropetiya Aazaayai sara dinikesi. 34 Dinike'na a'mwe naangei Pilipimi widina “Piropetiya dinike! aarina dinikavaka? Gami sahwarina dingaka? A'mwe pwarina dingaka? Dinyidana!” 35 Sara widina kya! Pilipi Aazaayare yagaala savidaa'nyi nayaa widaka Jizaazarina yuya yagaala tewaanya! nayaa widina. 36 Widina kya! tuta piba wina yadi aalibunya maalike! di'nikewinna yi'mavaawina kyagi a'mwe naangei widina ya! “Yithaa, dava aalya! di'ni!. Aalyavi bavitaaziya dinyajiwaana? Nimi wi'na daaka?” 37 Pilipi widina “Ginnya simunya yuya! Jizaazarina kalimwaga'gizi bavitaaziya gyideiginyi.” Widina kya! wida! “Sara limwamanige. ‘Kiraazitiyai Jizaazai Gotiyare Gawaalivaangelyira,’ sara yawi'mweinyi.” 38 Widina yaka a'mwe naangei gannya widaayaderi widina “Kaariziya! muda'na yana!” Widina kya! aalyavi a'mwe naangelyi Pilipiji saraai bwalaawina kyagi Pilipi bavitaaziya wina. 39 Bavitaaziya wina kya! aalyavidaasi wilaabina kyagi Kurya Tewaanyai Pilipimi yarai galamakuna. A'mwe naangei Pilipimi tinna ayina mwanganyi yada yilaaya naanga yada gannya angewinna wina yakelyi. 40 Kurya Tewaanyai Pilipimi makuna kya! Pilipi dara wanganake! “O, Anga Aazithothi damwaaiheni!” Daka anga yuyangi kaanya yamaryada yagaala tewaanya! Jizaazarina widada kaanna wina yada anga Sizaariyana yi'mavaawina yakegaa'nanyi.

Soli Jizaazari wi'nake'nesi.
(Apozeliyara 22:4-16; 26:9-18)

9 ¹Sagaa' Soli Naangere mididivisaraavina sinna tika naanga kuna wida'daasi dinyina “Jizaazari mididivisaraavi tamakima!” ²Dinyina yaka Gotiyarina Mubithika Yira'de Naangeri widina “Anga Damaazikazi Juyainaavire lotuangengi maremwaaidivisaraavi niminyine pikarya jithaka! ‘A'mwe Soli Jizaazarebwi limwadivisaraavi biramaaraja' asangi wila pwiyoji Jeruzaalemi davanna a'mweraaviji a'mwengiji sangi ayina makabana!’ da'gizi pikarya sara kanyidaya'gizi kotiya'na maraawideinyira,” sara widina ya' Soli.

³Anga Damaazikazi sawinnei tutaanyavi kaanya woda ange' aya kiba mannadi'nyi Sigunyavidaasi baaka naange' gaminyabanna yarai yime'nya'bi' wannaabina ya'. ⁴Yarai wannaabina yadaa'nyi kwaakewinna Soli wala'na yaka maanguraaya' kadika wi'nyina “Soli, Soli, kayaa'na be'na nyivanigina?” ⁵“Naangeigi, aaihwaiginaka?” kyiwaarava' widina “Jizaazainyi kayaa'na nyivaniginyainyira. ⁶Sahwainyi kiri' daava'gizi anga naanga davina kulaawa'gizi gimiminnenna pwai githathe'nanyira.” ⁷A'mwera Soliji wawesara daaveva yagaala majara maanguraaya' kadika wi'neva kiri' pwari tinna mwanganyesare. ⁸Naangei mena widina kya' kwaakevidaasi Soli daavaka gannya tinnyaraai yenaka dara yawirake' “We', nimi tibaryainyi daaka!” Sara daka aane piri' kiri' tinna mwanganyi kya' pwara gamire asiri limwanna yeva Anga Damaazikazi sawinna jiwaramakuna. ⁹Jiwaramakuna kye' saba mwaalaka yirika daryaa' dariki tinna mwanganyi yada sagaa' tika manyi yada aalya manyi ya'.

¹⁰Damaazikazi saba Jizaazare pwai Ananaayazai wo'nikelyi. Sai mwaalaka a'mabaaitinna baihana'na yadaasi Naangei widina “Ananaayazaigino!” Widina kya' sai widina “Naangeigi, yithaa, giminyi gyemwaaihena.” ¹¹Widina kya' Naangei widina “Daava'gizi Aduta Yida'nanya' wo'nikevina wawa'gizi Juthaazare angevi Soli Anga Taazazi mwaalyarina diviramaaka! Sare' dare'nesi. Yithaa, Gotiyari dada ¹²a'mabaaitinna dara wangamwake' ‘Nimire tinnyaraarina “Tewaanyaraai yima'nana!” dozi a'mwei Ananaayazai wo'nikei wilaabaka gannya asiraai nimire minyaginyavi dathathiwamanika!” ¹³Naangei sara widina kya' Ananaayazai widina “Ai, Naangeigi, a'mwe darina a'mwe kwalaalyara mena nyidiwaa'. Anga Jeruzaalemi mwaalyara gimire tewaanyaraavi kayaa'nanya yina yina yawalyaadikerina nyidiwaa'. ¹⁴Sara yada Damaazikazi dawinna giminyi yagaala githadaanyainaavi wila pwiya'na biwakelyi. Gotiyarina mubithika yira'divita naangera pikarya kalavuzana sara yidaveva kujawa'daa' biwakelyira.” ¹⁵Mi'na widina kya' Naangei widina “Sai nyidaayaderi dahilakiweryawinna

diwona! Sai niminyine yaya' ajimya yuyangiyaraaviji a'mwe naanga Kingiyaraaviji Yizireliya yisavaakiyaraaviji wijiwaakade'na dahilakiwana. ¹⁶Sare' dare'nesi. Sai niminyine yaya'na naange' sara yade'na gaminyi daanga wivinaja'na wijiwaainidelyira.”

¹⁷Ananaayazai kaanna wina yaka angevi wilina yaka Solimire minyaginyavi ata dathiwanna yaka widina “Nya'mweigi, Soligi, giminyawinna Naangei nyidasiwaabikeinyi. Tusavi kaanya badi Jizaazai sahwari tinna wangamwa'dinyai nyidasiwaabi'. 'Gannya tinnyaraai tewaanyaraai wanganna yana! Gamire munyiki yunebanna Kurya Tewaanyai wilamwaalana!' daka nyidasiwaabi'.” ¹⁸Widina kya' sagaa' yime'nya'bi' Solimire tinnyaraaridaasi jawipadasa'bisa bwala'na kya' gamire tinnyaraai tewaanyaraai yenyina ya'. Tewaanya yenyina kya' Soli daavina kya' Ananaayazai bavitaaziya yina ya'. ¹⁹Bavitaaziya yina yaka Soli wapaaya nyina yaka gannya kilaaka diraginya' ayina maarina ya'.

Anga Damaazikazi Soli wijiwaakake'nesi.

Yirika piningi wavila'daa'nyi Anga Damaazikazi mwaalyara Jizaazari mididivisaraayaba Soli mwaalina. ²⁰Mwaalina yaka yime'nya'bi' Juyaraavire lotuangengi wina yaka Jizaazarina wijiwaakina “Sahwai Gotiyare Gawaalivaangelyira.” ²¹Wijiwaakina kya' yuyara kadika wi'nyina yeva ni'nika yeva dinyina “Jeruzaalemi saba a'mwe dai yaya davina yagaala widadivisaraavi kayaa'na yakei daaka! 'Kuminyi wila pwiya'muji Gotiyarina mubithika yira'divisaraayawinna makwima!' daka dava daviwaka? A'mwe dale!” sara dinyina ye'.

²²Soli kuna wijiwaakina yaka diraginna wijiwaakina yada Gotiyare bukuyavidaasi diraginaanga widina “Kigaakuna Jizaazari Gotiyai dahilakyaakei Kiraazitilyira.” Diraginaanga sara widina kya' yagaala nebulya'nanya Juyara Damaazikazi mwaalyara yagaala pini murivikiri ye'.

²³Sawita pijaakuna kwavilava' Juyara yikabina yeva jamungajakina “Solimi tamakya'na nemi dara yaadera.” ²⁴Mena jamungajakina kye' pwai Solimi sare'na widina kya' nayaa wanganna yada mwaalina. Sara mwaalina kya' Juyara dinyina “Solimi tamakaana!” dinyina yeva sawisagaasi yirikegaasi adikuryangi damera tinna baihanarya'neraavi wimwaaahina. ²⁵Sahwara baihana'na yina yadivi' sawita pigaa' Solimirera gaminyi makuna yeva amaangebaari sikurika saaminyavi daavina yeva soigilyavi Solimi yilawimwaaahina yeva sikurika lo'masavi kavena marala'mwagaasina kye' Soli kaanna wina ya'.

Jeruzaalemina Soli ayina bake'nesi.

²⁶Anga Jeruzaalemina Soli yi'mavaawina yaka yawi'na “Naangere mididivisaraji ye'mwannamwalaana!” Yawi'na yaka yaamiji yina

kya', aawano. Kumi “Soli mididelyi,” yawi'na myeva yuyara lika yina kye' Soliji mye'mwannamwaalyi ye'. ²⁷Mye'mwannamwaalyi kye' kiri' A'mwe Baanavaazai Widaasaderaayawinna makuna yaka widina “Tusavi Soli Naangeri kwangana' Naangei gannya yagaalya' wida'. Sai Naangerelyira. Nebulyasira. Damaazikazi saba Soli Jizaazari yaya'na diraginna wijiwaakina. Diraginna wijiwaakina yada lika myakelyi Soli.” ²⁸Baanavaazai widina kya' Soli nayaa mwaalina yaka Jeruzaalemi yuneba kaanya yamaryada Naangere yaya'na diraginna wijiwaakina. ²⁹Jizaazarina wijiwaakina yada Juyara Girikiyagaala dadivisaraji dinyina. Dinyina yadivi' Soli nayaa widina kya' Juya sahwaru yawi'na “Soli kayaa'nanyabwi nediwakelyi. Sari tamakaana!” ³⁰Yawi'na kye' gya'mwera kadika dara wi'nesa' “O, Juyara sara dathimanigava!” Deva Anga Sizaariya saalaalyavi manikebanna Solimi makwalyuna yeva gamire anga Taazazina yaasina ye'.

³¹Sarevidaa'nyi sagaa' Jizaazare kusilaanyangiyara Juthiya yuyabaji Galili yuyabaji Sameriya yuyabaji saba kwaamu'na mwaalina ye'. Pwara kayaa'na myi kye' tewaanna mwaalina ye'. Naangeri nayaa wi'nadivi' Kurya Tewaanyai gannya diraginya' wijaavada sahwaru diraginyara yima'nyina ye'. Tewaanna mwaalina yadivi' diraginyara yima'nadivi' a'mwe pwara kwala naangera ye'mwannamwaaina ye'.

Anga Litha, Anga Jopa Pitai yake'nesi.

³²Gazabazaba Pitai kaanya yamaryada Anga Litha mwaalesara Gotiyare tewaanyaraavi angyiri'maata yina. ³³Saba a'mwe pwai Aniyaazai wo'nikei mwaalakelyi. Sai yaginya bainikei nalabwaryavi mwaaidi'nyi kwarama pijaakuna (8) wavila'na yakelyi. ³⁴Pitai angyiri'maata yada Aniyaazari wanganaka widina ya' “Aniyaazaigi, Kiraazitiya Jizaazai giminyi gyavada'gaimanika! Dikaava'gizi ginnya nalabwarya' nayaa javada'galakya?” Sara widina kya' Aniyaazai dikaa'na. ³⁵Wi'na dikaa'na yaka tewaanyai mwaaida Anga Litha mwaalyaraji Waraata Seroni mwaalyaraji yuyara gaminyi wanganeva Naangeri limwageva gamirera yima'nyina ye'.

³⁶Anga Jopa saba a'mwe' Taavita' wo'nike' Naangeri midinaka mwaalina. Gannya yaya' Girikiyagaala Dokaaza' dinikesi. A'mwe sa' tewaanyanna yada nigwimaayaraavina wigaimwadesi. ³⁷A'mwe' mwaalina yaka sagaa' nabalina' yima'naka balina. Mena balina kya' gilaayavi aalya' yeva ku'dike' munyabanna gilaaya' makilaawina yeva kave wakina. ³⁸Anga Litha sabadaasi Anga Jopa etabera. Maalikeba warike'na Jopa mwaalyara mididivisara kale wiadaa'nyi dara wi'nesa' “O, Anga Litha Pitai damwaalika!” Sara deva a'mweraari widina “Pitari duzila! ‘Myemwaaidinnera! Yarai, neminyawinna divama!’ ” Widina yeva widaasina. ³⁹Mi'na widaasina kye' savi Pitai kadika wi'nyina

yaka yovirawakina yaka saraalyi kaanna wina. Kaanna wina yaka sabanna yi'ma'na kye' munyaba ku'dikevina jivwaramakuna yina. Jivwaramakuna yina kye' yaanyiwaaka yuya mwaaleva kale wiadaa'nyi kinna dadivi' Dokaaza' baazi'ma'nyangiji kwaabiyivisangiji sazangi yavikaryakengi Pitari wijiwaainyina yeva "A'mwe tewaanyasi," widina. ⁴⁰Sara widina kye' ku'dikevi mwasawinna Pitai maryaasina yaka kwadaai gilaka Gotiyari widaka gilaayayabanna ginyiwanna yaka widina "Taavita', dithikaaka!" Sara widina kya' a'mwe' gannya tinnyaraai yenyina yaka Pitari tinna wanganaka dikavamwaaina. ⁴¹Wi'na dikavamwaaina kya' sai gamire asa' maarina yaka yidikaa'na yaka yaanyiwaakengiji Naangere tewaanyaraaviji jaka widina yaka a'mwe' kwaihwaainakevi wijiwaainyina. ⁴²Savina Jopa yuneba yagaala diwina yadivi' a'mwe kwala naangera Naangeri limwanna yesarera. ⁴³Pitai mena yaka Anga Jopa saba a'mwe pwai Saaimonimire angevi mwaaidi'nyi yirika pijaakuna wavila'na ya'. Saaimoni sai bulimakaawoyangire kilaake yadelyira.

Pitarinaji Koniliyaazarinaji saraarinesira.

10 ¹Anga Sizaariya a'mwe pwai Koniliyaazai mwaalina. Sai aawilata maremwaaidei Romiya aawilatara Yitaali aamiyaraavi maremwaaidelyi Romiyai. ²Sai Gotiyarina nayaa yawi'na, nabaai gamiji gamire angevi mwaaidivisaji Gotiyari yagaala widadivisangira. Juyara nigwimaayaraavi yanga wijaavadelyi. Gotiyari yagaala widadelyi. ³Koniliyaazai sai mwaalina yada pigaa' tiri kilokiyagaa' a'mabaaitinna wanganna yada Gotiyare mamaayai bwina yaka widina "Koniliyaazaigi!" Widina yake' tinna wanganna. ⁴A'mabaaitinna wanganna yada mamaayari baihana'na yada lika yada widina "A'mwe naangeigi, baa'na bahineka?" Widina kya' mamaayai widina "Gotiyari yagaala widadinya' Gotiyai kadika gu'niwa'. Nigwimaayaraavi wijaavadinya' tinna gwangamwa'. Sare'na Gotiyai giminyina gyawi'deiginyi. ⁵Dahaa' Anga Jopa sawinna a'mweraavi a'mwe pwai Saaimoni Pitai wo'nikerina duthaasa! ⁶Sai saalaalyayaba pware angevi angyiri'maata yivani'. A'mwe pwai Saaimoni giryawo'nyai bulimakaawoyangire kilaakengi yavikaryadei. Yi sare angevi mwaali'." ⁷Sara widina yaka mamaayai wina kya' Koniliyaazai gannya angevi widaayadisaraariji aawilata pwariji jaka widina. Aawilata sai Koniliyaazaryaba mwaaida Gotiyari yawi'dei. ⁸Jaka widina yaka kuminyi yuya yima'nake' widaka Anga Jopana a'mwe saraavi widaasina ya'.

⁹Yirika piriki tusavi kaanna wina yadivi' Anga Jopa aya kibanna yi'ma'na yadaapiji Pitai yawi'na "Gotiyari widima!" Daka sirigwajahaa' anga munyawu kwavita waraasavi yilamwaaina. ¹⁰Yilamwaaina kya' sagaa' Pitari mijika wiadaasi wapaaya yovira'na yadaapiji tika munnenna

yawi'da a'mabaalyavi tinna wanganna. ¹¹Tinna wanganna yada Sigunya' basinadaa'na yadaa'nyi kwaabiyivita divaniginya'bisajiki makwalaabina. Kwaakewi Pitaryawi mamaayara kwaabiyivisa'bi' kwaraka dawaai dawaalyangi limwageva makwalaabina. ¹²Mena makwalaabina kye' Pitai dara wanganake! "Ai, yikuriyaawia ge geji malakayaawarya ge geji kamaala ge geji yuta ge geji daminarika!" ¹³Sara kada' maanguraaya' widina "Pitai, daava'gizi sa diramanana!" ¹⁴Widina kya' kiri' Pitai widina "Naangeigi, arikewinyira. Juyainaavire kiwinya' dinike' 'Kimaakengi maninnera!' Sara dinike'na girika kininnaka aane piri' kiri' manyi yadinyainyira." ¹⁵Sagaa' pigasaai maanguraaya' widina "Gotiyai 'Sa tewaanyangira,' dinikengina gimi 'Sa girikita'nanyangira,' madinnera!" ¹⁶Tinna wangadaa'nyi dahasaai dahaa' kwaabiyivisa'bi' makwalaabina yeva yagaala mena widakegaa' munyaba Sigunyavina ayina makilaawina ye'.

¹⁷Pitai yawi'na "A'mabaaitinna sa' wangamwe' berivi wangamwana?" Yawi'na yaka simunya ayahi ayahi yawi'na yadaa'nyi Koniliyaazai widaasakeraavi Saaimonimire angevina jivwaridaakuna yesara tikuryaba daavina. ¹⁸Tikuryaba daavina yeva jaka widina "Angyiri'maasa'nei Saaimoni Pitai damwaalika?" ¹⁹Jaka widina yadaapiji Pitai kuna yawi'na "Berivi wangamwana?" yawi'na yadaa'nyi Kuryai widina "Kadika dinyu'nana! Dava gwangabi'de'na a'mwe daraai dalyara mwaaihava. ²⁰Daava'gizi walaawa'gizi lika myadi nimi widasiwaabe'na kumiji diwodeiginyi." ²¹Sara widina kya' Pitai walaawina yaka a'mweraavi widina "A'mwerina jaka widivanigasai niminyira. Be'na biwaataihilaka?" ²²Widina kya' sahwara widina "Aawilata maremwaaidei Koniliyaazai nedasiwaabikeinera. Sai a'mwe tewaanyai Gotiyarina yilaaya yadelyi. Anga naangengiya Juya yuyara dara jalikurakadiviki 'A'mwe tewaanyalyi.' Gotiyare ejeliya tewaanya pwai widina 'Pitai yagaala githathe'na ginnya angevina wilaabathe'na Pitarina duthaasa!' Widina yiwa'dikerina biwoinera." ²³Sarevidaa'nyi Pitai widina "Dava se wa'mwaraana!" Widina kya' se wa'mwa'na ye'.

Mwanyavi yovirawakina yina yaka kumiji wina ya'. Nabaai Jopa mwaalyara Naangere pwara gamiji kaanna wina. ²⁴Kaanna kaanna wina yaka yirika piriki Anga Sizaariyana yi'mavaawina. Koniliyaazai gamireraaviji gya'mwe pwaraaviji jaka wijivwaramaa'na kya' gamire angevi yuyara Pitarina yemwaaina. ²⁵Yemwaaina yadaapiji Pitai yi'mavaawina yaka yawi'na "Angevi wilaawima!" Yawi'na kya' Koniliyaazai wijimaa'nyina yaka "Naangelyira," yawi'na yaka gamire sivilyaaryaba walaraka kwadaai gilina. ²⁶Kwadaai gilina kya' kiri' Pitai gaminyi yiri'bwa'na yaka widina "Aawa, sarebwi minna! Nimi sahwainyi a'mwe gaveinyira." ²⁷Widina yaka angevi wilina yaka Koniliyaazari kuna widaka dara wanganake! "O, a'mwe kwalaalya

damwaaihava!”²⁸ Sara daka widina “Juyainyi. Sarimi Menyaihilyira. Sahwaihi nayaa dara yawi'mwaava 'Juyaraavirebwi dinyina “Menyaraavi angyiri'maata minnera! Sahwaraayaba tika munne maninnera!” ’ Dinike'na kiri' Gotiyai dara nyijiwaainiwa'di' 'Menyara Juyaraavirebwi myadivisaraavina “Gerera!” madinna! A'mwe yuyara kumi avaalayarera.’²⁹ Sara kanyijiwaainiwa'di' niminyina kudasiwa'daavadi yarai biweinyi. Sarevidaa'nyi yarai bena yiwaara'manige. Niminyina be'na widasiwa'daavadina?”

³⁰ Koniliyaazai widina “Mwa'niga tiri kilokiyagaa' Gotiyari wijahaa' dahaa'bisagaa' ninnya angevi Gotiyari widiwa'de. Widadaazi, yithaa, a'mwei baazi'ma'nya wiviritatabisa' baazi'ma'nikai niminyaba daavaka³¹ nyidiwa'di' 'Koniliyaazaigi, gimi Gotiyari yagaala widadinya' Gotiyai kadika gu'niwaka. Nigwimaayaraavina yanga wijaavadinya' mena gyawi'deiginyi. ³² Sarevidaa'nyi Anga Jopana a'mwe pwai Saaimoni Pitai wo'nikerina duthaasa! Saalaalya maangebaari Saaimoni pwai bulimakaawoyangire kilaaka yavikaryadere angevi angyiri'maata mwalaawaka sai.’³³ Sara widina kanyiwa'di' yarai widasiwa'daavade'na gimi biwaa. Tewaanyasi. Kaimala! Su! Sarevidaa'nyi dava neminyaba Gotiyai mwaaidi'nyi Naangei githiwaka yagaalya' kadika gu'naade'na yemwaaيمانigo.”

Pitare yagaalya'nesi.

³⁴ Pitai yarai widina “Mena nayaa yawi'mwa. Gotiyai yuyaraavi avaina wiadelyi Juyaraaviji pwaraaviji. Nebulyasi. ³⁵ Gotiyai ajimya yuyangiya gazavasavakiyari nayaa yawi'delyira. A'mwe sai Gotiyarina 'Tewaanyalyi. Naangelyi,' dada yida'maraangebwi yade'na Gotiyai maarina yivanikelyi. ³⁶ Gotiyai Yizireliyainaavi nedasaabaka yagaalya yawi'mwaava. Yagaala tewaanya sa' dini! 'Kiraazitiyai Jizaazai tewaanna yaka Gotiyarinaji a'mweraavinaji kwaamu'nanyabwi waka!.' Sahwai a'mwe yuyaraavire Naangelyira. ³⁷ Joni Bavitaaziya Yadei widakegaa'daasi Kwaaka Galilidaasi Kwaaka Juthiya yunebanne yagaala sa' dinesa'na yawi'mwaava. ³⁸ Jizaazai Naazreti mwaalyarina yawi'mwaava. Gaminyi Gotiyai dahilakaka Kurya Tewaanyariji gannya diraginyaviji wijaava!. Wijaavaka gamiji Gotiyai mwaalake'na gazabazaba sawhai tewaanna yada Kayaa'nanyai Saataani kayaa'na wiadera tewaanyaraavi wimwaaaha!. ³⁹ Sara yada Kwaaka Juthiya Anga Jeruzaalemi yuya Jizaazai yake tinna wanganona yuyaraavi wijalikurakadaanyaine. Yisaviri niliya wirameva karamake' balina. ⁴⁰ Mena balina kya' kiri' yirika daryaa' dariki Gotiyai baryari yidikaavaka gamireinaayaba wijiwaaina!. ⁴¹ Yuyara gaminyi mwanganyi ye!. Aawa. Gotiyai nedahilakakeina wijalikurakya'ne gaveinaavi nejiwaaina!. Bainikeraayawi Naangei kadikaava' gamiji aalya nona gamiji wapaaya noinera.

⁴²Diraginna widina neya' 'Nimire yagaala tewaanya' a'mweraavi duzila! Dara nebwin duzalikurakyila! "Gotiyai Jizaazari dahilaka! A'mwera mwaaihasaraavinaji a'mwera mena bainikeraavinaji kotiya' yawibwarya'neri wimwaaaha! Gotiyai." ' Sara neda! ⁴³Nabaai, Gotiyari wi'nawijiwakyaasara gaminyina jalikurakinikelyi. Sahwarina dara yida'nikesi. Gazaizai sahwaru ku'noji Gotiyai gamire kayaa'nanyangi marasi'nadelyi. Sahwarine yayavina marasi'nya'nebwi maaradelyira."

Menyara Kurya Tewaanyari maaresa'nesi.

⁴⁴Pitai kuna widadaasi Kurya Tewaanyai yuyara yagaala sa' kadika wi'nesaraavi walaabina yaka kumire munyikaavi wilamwaaina. ⁴⁵Wi'na wilamwaaina kya' Anga Jopadaasara Juyara Jizaazari limwadivisara dara wanganesa' "O, Gotiyai gannya Kurya Tewaanyari ajimya yuyangiyaraavina yanga mena duzaawaka!" Sara deva ni'nika yina ye! ⁴⁶Sare' dare'nesi. Menyara yagaala ge ge wideva Gotiyari yilaaya yina yadivi' widina "Gotiyai diraginaangelyi." Widina kye' ni'nika yina ye! ⁴⁷Ni'nika yina kye' Pitai widina "Kurya Tewaanyai neminyi wilanemwaalakabaaibi' dahwaraavi Kuryai wilamwaaimwa'. Sare'na pwara 'Aalyavi bavitaaziya myaannera!' dinipinera daaka! ⁴⁸Aawa, kuminyi Jizaazari yaya'na bavitaaziya jila!" Widina kya' sara kye' sahwaru Pitari widina "Yirika piniji neminyaba angyiri'maata ja!" Menyara sara widina kye' saba angyiri'maata ya'.

Anga Jeruzaalemi Pitai a'mwera Kiraazitiyare kusilaanyaviyaraavi wijiwaakake'nesi.

11 ¹Widaasaderaji kuya'mwera Kwaaka Juthiya yuneba mwaalyaraji dara wi'nesa' "Ajimya yuyangiyara Gotiyare yagaala wi'neva dalimwagakava!" ²Mi'na kade' Jeruzaalemina Pitai yilaawina kya' kilaakevi da'divisara Juyaraavirebwi diraginna yadivisara maanga wide' ³"A'mwera kilaakevi madayadivisaraavi angyiri'maata yiwa'dinyaiginyi. Nabaai, sahwaraji wapaaya niwa'daasaiginyi. Be'na yiwaana!" ⁴Sara kude' Pitai aayawidaasi sara yake' sara wijiwaaka'. ⁵Dara wijiwaaka' "Anga Jopa mwaalena Gotiyari widena a'mabaaitinna wanganyawalyaade. Yi daresi. Gotiyareba mwaalyara kwaabiyivita naangevaki dawaai dawaalyangi limwageva Sigunyavidaa'nyi niminyabanna makwalaabina yawalyaadaasa' wanganyawalyaade. ⁶Makwalaabina kyawalyaadaa' kwaabiyivita kusawi malakayaawaryaraji yikuriyaawiaraji kamaalyaraji yuta yihusavineraji gera geraji wilamwaaidapi nayaa yiwaryawalyaade. ⁷Mena wanganena maanguraaya' wi'nyawalyaade. Pitai, dithaaka! Saraavi tama'gizi yarai dinana! ⁸Sara wi'nena widina 'Naangeigi, arikawinyira. Miwita kimaaka aane piri' girikita'nanya aane

kiri' manyadinyainyi.' ⁹Widina kyawalyaade Sigunyavidaa'nyi maanguraaya sa' ja'nanyijawalyaadi' 'Yuya Gotiyai tewaanya wakiwake "Kayaa'nanyangira," madinnera!' ¹⁰Kanyijawalyaadi' pigasaai pigaa' sara kadinyawalyaadoi Sigunyavi ayina makilaawina yawalyaadaasa' wanganyawalyaade. ¹¹Tinna wangadaazi yithaanyi, niminyawinna a'mwe daraai dalyaraavi Sizaariya mwaalyai widasawalyaadikera angevi wilamwalyawalyaadevina yi'mayawalyaadaa'. ¹²Gotiyare Kuryai nyijawalyaadi' 'Simunya myawi'dinnera! Saraji diwona!' Mi'na kanyijawalyaadi' Anga Jopana neya'mwera a'mwe atina ata puridaasi pwalyara mwaaihasaraji wiawalyaade. Kaanna kaanna kaanna a'mwe sare angevi wilina yiwa'do. ¹³Wilina kyiwa'do sahwai nediswa'di' 'Nimi dara wangamwa'de' "Ai, nimore angevi Gotiyare mamaayai davuladaavika!" Kadiwa'de ejeliyai nyidiwa'di' "Anga Jopana duthaasa! 'Saaimoni Pitai wo'nikerina yarai dimaaryila!' ¹⁴Davanna bozi yihithathera. Yagaala sa' Gotiyai gimiji gimijiyaraji saihire kayaa'nanya marasi'noji yihivadaihasamaaradeihilyira," nyidiwa'di' ejeliyai,' a'mwe sai sara nyidiwa'di'. ¹⁵Nimi Gotiyare yagaala gaai widadaari Kurya Tewaanyai walaabaka kumire munyikaavi bulamwaa'imwa'di' sinnawi nemire munyikaavi bulanemwaalakabaaibi'. ¹⁶Sara wanganena dara yawi'mwa'de 'Naangei Jizaazai neda' "Joni aalyavi bavitaaziya yake' kiri' sariminyi munyikaavi yunebanna Gotiyare Kuryai wilayihimwaaladeihilyira." ' Naangei sara nedake' sara yawi'mwa'de. ¹⁷Sinnawi Naangei Kiraazitiyai Jizaazari limwagohaa' Gotiyai gannya Kuryari nejaavakabaa' sara Menyaraavi avaainanya' wijaawa'di'. Sa'na yawi'na 'Sarevidaa'nyi Gotiyari be'na tihi'muneinyaka! Aawa. A'mweinyira.' Sara yawirena kaanya' marihiry," wida'. ¹⁸Sahwara Pitari sara wi'neva "Yagaala wikira," deva maanga aaya' widesa' majara Gotiyari byaannyabwina yileyagaala wideva dina "Nebulya', Gotiyai ajimya yuyangiyaraavina kale wiwaka. Kumire simunyabwi mudikeburi kyawiramaarapiri Gotiyai gaalyaburi tewaanna wimwaa'hina yaderera. Tewaanna wimwaa'hina neyadevaabi' sahwaraavi tewaanna yaderera."

Angaba Aadiyoki Gotiyarera mwaalesa'nesira.

¹⁹Sitivenimi tamakesagaa' Jizaazare yagaala wi'nadivisaraavi kayaa'na yadivi' piwinna piwinna yiwinama'na. Piwinna piwinna yiwinama'na yadivi' pwara Kwaaka Piniziya menyabanna yi'mavaawina, pwara Ahu'manna Saapiraazi menyabanna yi'mavaawina, pwara Angeba Aadiyoki menyabanna yi'mavaawina yeva Juya gaveraavi Gotiyare yagaala wideva a'mwe kwara pwaraavi mujina. ²⁰Sara muji kye' pwara Saapiraazi mwaalyaraji Saairini mwaalyaraji sara Aadiyokina waweve Menyaraaviji yagaala tewaanya' Naanga Jizaazarina wijiwaake'. ²¹Sara wijiwakadaapiji Naangei gannya diraginya' kujaava' a'mwe kwalaalyara

a'mwe kwalaalya sahwari limwanna, gaminyi ginyima'nyina, midinna ye!

²² Jeruzaalemi Jizaazare kusilaanyaviyara kadika dara wi'nesa' "Ai, Menyara Jizaazari wi'nadivisara daaka!" Sara deva Aadiyokina Baanavaazari widaasina ye! ²³ Widaasina kye' Baanavaazai Aadiyokina yi'mavaawina yaka dara wanganake! "Su! Su! Gotiyai a'mwe tewaanyaraavi damwaaihivanika!" Sara daka yilaaya ya'. Yilaaya yaka yivaimwange'na wida! "Gotiyare yagaalya' nayaa jawika! Gamirebwi nayaa dilimwana! Yuyagaa' Naangeryawi dimwaala!" ²⁴ Sara widakei a'mwe tewaanyalyi. Gotiyare Kuryai gamire simunyavi diraginna wilamwaalakelyi. Naangeri diraginna limwadei wijiwaakada a'mwe kwala naangera Naangeri midine!

²⁵ Sagaa' "Solimi biramaarima!" daka Baanavaazai Angeba Tazazina wina ya'. ²⁶ Mi'na wina yaka biramaa'na yaka Aadiyokina ayahi makabina ya'. Makabina kya' kwarama piri' kwavilava' saraai kusilaanyaviyaraji mwaalagila a'mwe kwalaalyaraavi wijiwaakina yagi. Wijiwaakina yadaakilyi Aadiyoki saba pwara Jizaazari mididivisaraavina "Kiraazitiyarera," gaai widina ye'. Dividaasi pwara neminyina "Kiraazitiyarera," dadiviki.

²⁷ Yirika sarikaavi Aadiyoki sawinna Jeruzaalemidaasara Gotiyari wi'nawijiwaakadivisara bina ye'. ²⁸ Wi'na bina kye' pwai Aahavaazai wo'nikei daavina yaka Gotiyare Kuryai diraginya wijaavakei wida! "Divi Kwaaka yuyavaki mijika naange' yima'nadesira." Sara widake' divi A'mwe Kilothiyazai Romiyaraavi maremwaalakegaa' mijika yima'nyina yakesi. ²⁹ Mididivisara Aadiyoki mwaalyara yagaala sa' wi'neva dinyina ye! "Nemireba wikira. Pwaraavi wigaimwagaana! Kwaaka Juthiya mwaalyara neya'mwera mijika nuyadika! Nemi gilyivikiravinakeina nigwia naanga wijavaana! Gilyivita maalikajiyaina nigwia maalika wijavaana!" ³⁰ Sara dinyina yeva nigwia wakina yeva Baanavaazalyi Soliji saraari wide! "Nigwia da mijike'na Kiraazitiyareraavire naangeraayawinna dimakwila Jeruzaalemina!" wide!

Erotiyai pwai kayaa'na yake'nesi.

12 ¹ Sagaa' Kingiya Erotiyai Kiraazitiyare kusilaanyaviya pwaraavi kayaa'na yina ya'. ² Erotiyai gannya aawilasaraavi widaasina kya' Jemizai Jonimi gya'mweri kwaari'masiraminyasi dawakina ye'. ³ Erotiyai sara yaka dara wanganake! "Ai, savine! Juyara yilaaya jivaniga!" ⁴ Sara daka nabaai Munne Girikula liwinya pamidakina myadehaa' Pitari wila pwiya ya'. Mi'na pwiya yaka kalavuzangevi wimwaaihina yaka dameraavi wida! "Lika nawodika! Sinnawi a'mwe daraai daraalyaihi divaihanaryila! Divi daraai daraalyaihi divaihanaryila! Divi pwaihi sara jila! Divi pwaihi sara jila! Yuyagaa' sana sana jideihilyira." Erotiyai

dara yawira' "Pari'ma'munne' mena kyawaaji balya'na Juyaraayaba wimwaaihima Pitari!" ⁵Sarevidaa'nyi kalavuzangevi Pitai mwaaidi'nyi Kiraazitiyare kusilaanyaviyara Gotiyari yagaala diraginna wide' Pitarina.

Kalavuzangevidaasai Pitai wawake'nesi.

⁶Munne aaya' yima'nadaa'nyi Erotiyai yawi'na "Mwanyagaa' Pitari kotiya' yidera." Sara yawi'na kya' sagaa' sawisavi Pitari seniyabaraalyi wila pwiya yagila se warina yadisi dameraai kwaryaba mwaalina. Kwaryaba mwaalina yadakilyi kalavuzangevire kaanyavi dame pwaraai daavina yagi. ⁷Daavina kyagi, yithaa, angevi Naangere mamaayai buladaa'na yakegaa' baake' wannyina ya'. Wannyina kya' ejeliyai "Dikaavana!" daka Pitare egwevi tamina yaka wida' "Yarai, dithikaaka!" Sara kuda' seniyabaraai Pitare asiraaridaasi bwalaraawina ya'. ⁸Bwalaraawina kya' mamaayai wida' "Munnaanya' padathivaina'gizi kwaabizivila divaazi'makuna!" Sara kuda' Pitai sara yina kya' wida' "Ginnya yivisa' marabwaaya'gizi dinyimidinaama!" ⁹Kuda' kalavuzangevidaasi Pitai midinaabina ya'. Midinaabina yakegaa' Pitai dina ya' "Nebwina mika. Mamaayai yivanike'na waja ya'nivanige." ¹⁰Sara dadaa'nyi kalavuzikurita gavinyawaari wavila'na yagila kwaari'makaanavina y'i'ma'na kyagi kaanya' gami sa' kabaasina' mwasawinna walyuna yagi. Mwasawinna walyuna yagila tuta pirivi wodisagaa' yithaa, mamaayai Pitaryawidaa'nyi yimaanyina ya'.

¹¹Sagaa' Pitai yawiraka dina "Nebulya'nanyasira. Naangei gannya ejeliyai kudasiwaabi' Erotiyare kalavuzangevidaa'nyi nyimaa'mwaka. Juyaraji Erotiyalyi saraavire kayaa'nanya' niminyina myima'nyi yadesi."

¹²Nayaa yawi'na yakegaa' Maakiyai Jonimire ganaange' Maariyaavire angewinna wina ya'. Anga savi a'mwe kwalaalya mwaaleva Pitarina Gotiyari yagaala widesangira. ¹³Pitai wina yaka kaanyavi mala tamina kya' widaayade' Rotha' wo'nike' wi'naka "Kaanya baasima!" daka walyuna ya'. ¹⁴Mi'na walyuna yaka Pitare maanguraaya' wi'naka yilaaya naanga yina yaka navika yada kaanya' mabaasi yaka ayina kaanyave'na wilaabina yaka wida' "Mwasawi Pitai daavika." ¹⁵Pwara wide' "Gimire simunya kayaa'nanaangesira," Taaya' wida' "A'a. Nebulya'na mena biwaka." Pwara wide' "Pitai mamwaalyi. Gamire ejeliyai mwaali!" ¹⁶Didaapi Pitai kaanyavi mala kuna tamina ya'. Tadaa'nyi kaanyavi baasina yeva Pitari wanganewa atika maru'na'na ye'. ¹⁷Atika maru'na'na kye' Pitai daka "Kadika nyu'nipika!" gannya asa' bamakilaawina kya' yagaala mi'na kude' Pitai wijiwaakina "Naangei kalavuzangevi nyimaa'mwa!" Sana sana wijiwaakina yina yaka wida' "Yagaala da' Jemizariji neya'mwe pwaraaviji duzila!" Mi'na widaka mwasawi walyuna yaka piwinna wina ya'.

¹⁸Mwanyagaa' nyila bilyiri'daa'nyi damera dara wanganesa' "Akai, Pitai mamwaalyijika!" Sara deva lika yeva atika maru'na'na yeva dinyina

ye! “Pitai gawi mwaalika?” ¹⁹Sara dinyina kye! Erotiyai wida! “Yarai diviramaarila!” Wi'na kuda! birina birina yeva aawa. Mamaari kye! Erotiyai dameraavi kotiya! yaka saraavina wida! “Kayaa'na yiwaasara baibi'derera.” Sara kuda! yuyaraavi tamakina ye!.

Sagaa! Erotiyai Kwaaka Juthiya ya'ma'na yaka Anga Sizaariyana walaawina yaka mwaalina ya!.

Erotiyai balake'nesi

²⁰Anga Taayaa mwaalyaraavinaji Saaithoni mwaalyaraavinaji pibwina Erotiyare sinna tika naanga wida'daa'nyi sahwara dinyina ye! “Neminyina Erotiyari sinna tika wida'manike'na gamirebadaasa tika wapaaya gara mubaatheinaavaka? Erotiyaryawinna wawaaji narya! wakaana!” Dinyina yeva kaanna waweve a'mwe Bilaazitazai Erotiyare angevi maremwaideri widina kye! Bilaazitazai ye'mwanna ya! Ye'mwanna kya! yuyara Erotiyaryawinna wina yeva wide! Kude! Erotiyai widina ya! “Pigaa! yinagaavaihagaa! yihithideinyi.”

²¹Sagaa! Erotiyai widakegaa! kyima'na! kingiyaraavire baazi'ma'nya nawi'nyasi yivita nawi'nyasi bwaayaka namwaalyita tewaanyavi walamwaalaka a'mweraavi kiwinya naanga widina ya! ²²Mi'na widina kya! a'mwera jaka wide! “Nedivanikei a'mwei mika! Gotiya pwalyira.” ²³Sara jaka kude! jaahwasa'bi! Erotiyai yilaaya yaka yawi'na “Nimi Gotiyabisainyi,” yawi'na ya! “Sabwi mipinera! A'mweihi Gotiyai gaveri byaannakeri yilaaya dumaryila!” sara majarina Naangere mamaayai yarai walaabina yaka Erotiyari tamina ya! Tamina kya! gumilikera Erotiyare kilaakejiki nyina kye! Erotiyai balina ya!.

²⁴Kiri! Naangere yagaala piwinna piwnna kujiwaake! a'mwe kwalaalyaraji a'mwe kwalaalyaji sahwari limwanna ye!.

²⁵Baanavaazalyi Soliji saraai nigwia mena wijaavagila Jeruzaalemidaasi Maakiyai Jonimi ayina makabina yagi Anga Aadiyokina.

Baanavaazalyi Soliji saraari dahilakeva yaasesa'nesi.

13 ¹Aadiyoki mwaalyara Kiraazitiyare kusilaanyaviya pwara Gotiyari wi'nawijiwaakadivisara. Pwara Gotiyare yagaala wijiwaakadivisarera. Sahwara pwai Baanavaazai, pwai Simiyoni Dikwaagilyai, pwai Luziyaazai Anga Saairini mwaalyai, pwai Maanayani maalikelyiyagaa! Naanga Erotiyalyi mwaalagilyai, pwai Soli. ²Sahwara kamwaale! Kiraazitiyarera yikabeve wapaaya manyara Gotiyari yagaala widadaapiji Kuryai Tewaanyai wida! “Wawinya mudike! saraai yika! dena yihithivanige. Niminyine Baanavaazalyi Soliji saraari kadahilakapiji yikaderaalyi.” ³Sara kuda! wapaaya kuna manyeva Gotiyari wideva “Sahwaraai yikadesira,” deva saraare minyaginyawaari ata dathiwanna yeva widaasina ye!.

Ahu'manna Saaipiraazi sawinnesi.

⁴Sarevidaa'nyi Gotiyare Kuryai widaasina kya' Baanavaazalyi Soliji saraai Anga Seluziyana kaanna walyuna yagila sipiyavi yilamwaaina kyagi Ahu'manna Saaipiraazina sipiya' makuna ya'. ⁵Makuna kya' Anga Saalamizina yi'mavaawina yagila Juyaraavire lotuangengi Gotiyare yagaala wijiwaakina yagi. Saraare widaayadei Maakiyai Joni wigaimwagakelyi saraalyi kaanya yamarye'.

⁶Ahu'manna savi yuneba wijalotaveva Anga Paipozina yi'mavaawina ye'. Saba Juyai mwaalina. Baajizaazai wo'nikei mwaalina yakelyi. A'mwe sai giri'nyaji kwalyaji yunebanna limwagarikelyira. “Nimi Gotiyari wi'na'muji yagaala tewaanna yihiziwaakadinyainyi,” kwaasi dadei mwaalina yakelyira. ⁷Ahu'manna savi maremwaaidei Ga'maaniryayaba Baajizaazai mwaalina. Maremwaaidei Seziyazai Polaazai wo'nikei sidu'nakelyira. Sidu'nakei “Gotiyare yagaalya' kadika wi'nima!” daka Baanavaazalyi Soliji saraarina widasaabina ya'. ⁸Widasaabina kya' saraai wilamwaaina kyagi Kulakei Baajizaazai saraari birala yina yaka a'mwe naangeri wida' “Jizaazareburine yagaalya' mu'ninna!” Kulaka sai Girikiyagaala yaya' Elimaazai wo'nikelyi. ⁹Girikiyagaala Solimina yaya' Poli wo'nikelyi. Elimaazai kayaa'na kuda' Kurya Tewaanyai Polimi yunebanna wilamwaaida gannya diraginyasi yawita tewaanyasi sahwari wijaavina kya' Poli kulakeri baihana'na yaka ¹⁰wida' “Kotiya Maryadere kaimiraayaigi, yuya yida'maraangebawina yikamaangeiginyi. Kwaasi yagaalyasi kayaa'nanaangebulyi sazangi gyakwalaangeiginyi. 'Naangere yagaala tewaanyavina kwaasi yagaala yima'nana!' dadi kayaa'nanyabwina mamarasi'nyi be'na jitheiginaka? ¹¹Yithaa, dahaasagaa' Gotiyare asa' diraginna giramana! Tibinyaigi yima'na'gizi nyilyari tinna mwanganyi jitheiginyi. Dividaasi dangadeiginyi.” Sara widina kya' Elimaazare tinnyaraari yiraayasi jihinyasi jaahwasa'bi' bwalaraawina kya' tinna mwanganyi ya'. Tinna mwanganyi yaka “Pwai nimore asiri nyilimwagozi nyibwaramakwona!” daka kaanna kaanna yamarina ya'. ¹²Kaanna kaanna yamaryina yadaa'nyi maremwaaidei diraginya' tinna wanganna yaka Poli Naangere yagaala wijiwaakake'na ni'nika yaka Kiraazitiyari limwanna ya'.

Kwaaka Pizithiya Anga Aadiyoki sawinnesi.

¹³Poliji gamijiyaraalyi Anga Paipozi ya'ma'na yeva sipiyavi kaanna waweve kwaaka piva' Paabiliya Anga Pehaana yi'mavaawina ye'. Yi'mavaawina kye' Maakiyai Joni kiriminyi yagalya'mavaka Jeruzaalemina ayina wina ya'. ¹⁴Ayina wina kya' pwaraai Pehaadaasi Anga Aadiyoki Kwaaka Pizithiya mannikebanna kaanna wina yagila Kwazaakegaa' Juyaraavire lotuangevi wilina yagila walamwaaina yagi.

15 Walamwaaina kyagi Kiwinya Ne Mozizai yavikarinikeviji Piropetiyara Gotiyari wi'nawijiwakyasara yavikarinikeviji tinna wanganna yadivi' yagaala sa widina ye'. Widina kye' lotuangevi maremwaaidivita naangera Polimiji yagaala widaase' "Neya'mweraahi neminyine yagaala yivaimwagya'ne' waraja' a'mweraavi dujiwaakyila!" 16 Sara kudaase' Poli daavaka asa' makilaka wida' "Nya'mweihi, Yizireliyaihilyi Menyaihi Gotiyari yilaaya maryadivisaihilyi saihi dinyu'nyila! Gotiyai Yizireliyainaavire Gotiyalyira. 17 Gotiyai nemire Ne sinnawinyaraavi dahilaka Kwaaka Yizipi Mwaalyaraavireba Menyaraavireba mwalyaata Yizireliyara kwala naanga wimwaihyaa' Gotiyai. Diraginna yaka Yizipidaasi Gotiyai Ne sinnawinyaraavi makabina kya' 18 a'mwamaayaba kwarama a'mweraare atiziviliraalya wavila'daa'nyi kumi sara kayaa'na yadaapiji Gotiyari kale wia'. 19 Kale kwia' Kwaaka Kenaani anga naanga pimagingya atina ata puridaasi pwaraalya yirawaasina yaka kumire kwaaka yanga wijaavina kya' kwaakevi kwiyakwara kwarama naanga naanga 450 mwaale'. 20 Sagaa' a'mweraavina sidu'nakera yagaala yawibwa'divisaraavi dahilakaka dahilakaka kadahilaka' Gotiyari wi'nawijiwaakadei Saamyiweli mwaalina ya'. 21 Mwaalina yadi'nyi a'mwera Gotiyari wide' 'Neminyine Kingiyai nemaremwaaladeri dinejaama!' Sara kude' Gotiyai Kiziyare gawaalivaangei, Ne sinnawinya Bejaminimirei, Solimi wijaavina kya' kwarama 40 wavila'daa'nyi Soli kingiyai maremwaaina. 22 Maremwaaina kya' divi Gotiyai sari wasi'nyina yaka Kingiyai Devitimi wimwaaihina ya'. Sahwarina Gotiyai wida' 'Deviti, nimire simunyavinei Jeziyare gawaalivi yilaaya wimariwelyira. Nimi simunyavi widadaari gamizai yadelyira.' 23 Sara widaka pigaa' Devitimi wida' 'Divi Diraginyai Yizireliyaihire kayaa'nanya marasi'nadelyira.' Yune naanga nebulya'na widaka savine'na Naanga Devitimirei Jizaazai nevadaihasamaa'deri Yizireliyainaavina diraginna wimwaaihina ya' Gotiyai. 24 Sinnawi Jizaazai mabyahaa' Joni Bavitaaziya Yadei Yizireliyaraavi wijiwaaka' 'Ginnya kayaa'nanya minnera! Gotiyarinaji gamireburinaji simunya mudikebwi nayaa kyawiramaara'gizi bavitaaziya gyideiginyira.' 25 Joni gannya wawinya' aaya yakegaa' a'mweraavi wida' 'Sarimire yawisa'na bewainyaka? Yemwaaihata sainyi sahwainyi mika! Aawa. Yithaanyi, sahwai yarai bathelyi. Nimi a'mwe maalikeinyina gamire kwaabizivilyawaari myaari yideinyi. Savina maalikeinyi balideinyi dingaka?' wida' Joni.

26 Nimiraihi, Eviraamijiyaihilyi Menyaihi Gotiyari yilaaya maryadivisaihilyi saihi, neminyina Gotiyai wijaake', a'mwe pwai nevadaihasamaaraderine yagaalya' neminyinesi. 27 Sare dare'nesi. A'mwe sarina Jeruzaalemi mwaalyaraji kumire naangeraji myawiri ye'. 'Sahwai pwainaavire kayaa'nanyanna nevadaihasamaaradelyi,' myawiri yeva, nabaai, Kwazaakegaa' yuyagaa' Gotiyari wi'nawijiwaakadivisaraavire

yagaaipikarya tinna wanganeva kiri' myawiri ye'. Yagaala sa' yida'nike'na myawiryasara sahwari jida'na kye' yunebanna nebulya'na yima'naka Piropetiyaraavire yagaala sa'. ²⁸Kumire yawita 'Gamire kayaa'nanyabwi biramarawaaji tamakaana!' yawireva birina birina yeva aawa. Mabiramaari yeva Paailatimi yaasiwa'na wide' 'Yisaviri tamakya'na sahwari niliya dirama!'

²⁹Sahwarina Gotiyare bukuya' yuya yida'nike sara wina kye' sai balina kya' yisavidaasi makwalaabeva simaangevi wakina ye'. ³⁰Sara wakina kye' bainikeraayabadaa'nyi Gotiyai ayina yidikaava' baryari. ³¹Yidikaa'na kya' yirika kwalaalya Galilidaasara sahwalyi Jeruzaalemina yilaawina yesara sahwari nayaa tinna wanganna ye'. Nayaa tinna wanganna yesara dahaa' sarina a'mweraavi wijalikurakadivisare. ³²⁻³³Nabaai, naarimi yagaala tewaanya' yihithivanigo. Gotiyai Ne sinnawinyaraavi yune naanga nebulya'na wijaake' Jizaazari yidikaavake' dahaasagaa' neminyina, sinnawinyaraavireinaavina ya' Gotiyai. Savine'na Gotiyare bukuyavi Saamiya daraari Gotiyai yida'nikabaabisasi.

Gimi nyibwaalivaangeigi
Dahaa' diraginya' gizaaweigi
A'mwera yawi'na gyipi'deigi
Gotiyainyi gimaamaangeinyi.

³⁴Bainikeraayawi sahwari yidikaavake'na yuyagaa' ayina mabalyi yoji bwia maburi yaderina Gotiyai wida'

'Deviti limwaga'deri diraginna widahe
Yuya tewaanya giri'maaya gizaavima!'

³⁵Sarevi nabaai, Saamiya pirivi yida'ni' 'Widaayade nawi'nyari giri'maayari tewaanna kamaremwaala'gizi sai bwia maburi yadelyira.'

³⁶Sare' dare'nesi. Devitimina yawi'mwo. Mwalyaakegaa' Gotiyare simunya yawisaburi midinaka kabala' sinnawinyaraavire wakyaba kwake' gamire kilaakeji' bwia burake' sara yawi'mwo. ³⁷Deviti bwia kabura' kiri' Gotiyai yidikaavakei dikaavaka Naangei bwia maburya'.

³⁸Sarevidaa'nyi nya'mweihi, dara jawiryide' '“O, a'mwe dai nemire kayaa'nanyabwi marasi'nakelyi,” saraai danedivanigila! Jizaazai diraginyai widasiwaabikei daaka!' ³⁹Ne Mozizare kiwinya gimire kayaa'nanya mamarasi'nyi yinike' kiri' gazaigizaigi a'mwe dari ku'nalimwaga'gizi yuya marasi'nadelyira. A'mwe yida'maraangeiginyi gimwaaihadyira. ⁴⁰Sarevidaa'nyi mala nayaa jiwannana! Gotiyare bukuyavi wi'nawijiwakyasa' giminyina nyima'nadika! Dara wijaa'

⁴¹'Yithaanyi, birala yadivisaihi wanganapi divalyide
Mwaaidapijiyagaa' nimore wawinya naange' yivanige'nanyi.
Kwai nayaa yihiziwaakaja' kiri' mu'nalimwagi jideihilyi.' ”

Poli sara widina ya'.

⁴²Lotuangevidaasi Poliji Baanavaazalyi walyuna yadaakilyi a'mwera wide! "Kwazaakegaa' pigaa' yagalaawakilyi nediswaala yagaala piniji dinejideihilyira." ⁴³Widina kye' mwasawinna a'mwera walyaabina kye' Juyara pwaraji Menyara Juyaraavirebwi yadivita pwaraji sara "Polimire yagaalya' tewaanyasi," deva Polimiji Baanavaazariji kaanna midinna ye'. Apozeliyaraai "Diraginna mwaaibika!" dahila diraginya yivaimwange'na widina yagi "Gotiyari limwamanigasaihi dara jawirila 'Gotiyai gannya yanga gaimwangeburi tewaanna kuna nemaremwaaladelyira.' "

⁴⁴Divi Kwazaaka pirivi angeba mwaalyara kwala bwa'naanya naangevaakiyara "Poli Gotiyare yagaala nedadaawori kadika wi'naana!" deva Lotuangevi yikabina yina ye'. ⁴⁵Yikabina yina kye' Juyara pwara kwala bwa'naanyangi tinna wanganna kye' jikurya yina yeva wide! "Poli nedivanike' kayaa'nanaangesi." Wideva Polimi birala yina ye'. ⁴⁶Birala yina kye' Poliji Baanavaazalyi lika myagila diraginna widahi "Juyaihi, Gotiyai nehitha' 'Sinnawi Juyaraavi yagaala da' duziwaakyl!' Sara kanehitha' sinnawi Gotiyare yagaalya' kyihithiwa'doi 'Aalo,' dineva 'Yuyagaa' nemire kuryara tewaanna mamwaaibinera!' navika kyawi'mwaa' sariminyi yagalya'ma'na yakwoihiji ajimya yuyangiyaraavi widakadeinaalyira. ⁴⁷Sare' dare'nesi. Gotiyai kiwinya nejaa'

'Ajimya yuyangiyaraavine baakegi gimwaaishiwa.

Kwaaka yunewinyaraavine padaihasamaasabwi dimakwona!

Yuyara giminyina tewaanna mwaaibi'dera.' "

⁴⁸Sara widina kya' ajimya yuyangiyara yilaaya yeva "Naangere yagaala sa' tewaanyasi," dinyina kye' Gotiyai "Sahwara tewaanyara yima'nipika!" dahilakyaakera Naangeri limwanna ye'.

⁴⁹Kwaaka saba yunebanna Naangere yagaalya' diwina ye'. ⁵⁰Diwina kye' kiri' Juyara Menya naange Lotuangevi wodivisangiji Anga mwaalyara naangeraaviji wijiwaakina kye' Polimiji Baanavaazariji kayaa'na yeva kunnya kwaakevidaasi widaasina ye'. ⁵¹Widaasina kye' Apozeliyaraai a'mweraavi kumire kayaa'nanyabwi wijiwaainya'na tiryra sivilyangi wa'di'nyiya purakirasi'nagila Anga Aadiyokidaasi Anga Aaikoniyaamina wina yagi. ⁵²Aadiyoki mwaalyara Naangeri mididivisara Gotiyare yagaala nayaa limwanna yadivi' yilaaya yadivi' kumire munyikaavi Kuryai Tewaanyai wilamwaaidera diraginna mwaalina ye'.

Anga Aaikoniyaami sabannesi.

14 ¹Aadiyoki Poliji Baanavaazalyi sara yagilya' Anga Aaikoniyaami ayina yagi. Juyaraavire Lotuangevi wilina yagila tewaanna wijiwaakina kyagi Juyara pwaraji Girikiya pwaraji kwala bwa'naanya naange' wi'nalimwanna ye'. ²Wi'nalimwanna kye' kiri' Juyara pwara malimwagi yevera kwaasi kude' ajimya yuyangiya pwaraavi nedaa'negwaaravaavina sinna tika davina wia'. ³Sinna tika wida'daa'nyi

sarevidaa'nyi naangegaa' Aaikoniyaami saraai mwaalina yagila lika mi yagila Naangerina diraginna widina yagi. Diraginna widina kyagi Gotiyai yawi'na "A'mwera nayaa yawipika! 'Gotiyareraai "Gotiyai yange'na tewaanna yihigaimwagathe'nanyi," nejalikurakivanigilya' nebulyasi,' sara yawipika!" Gotiyai daka gannya diraginya' wijaavina kya' saraai wijiwaainya tewaanyaji atika maru'nasaji yina yagi.

⁴Sara tewaanna yina kyagi Angeba mwaalyara jaapaina yesa' pwara widaasaderaarina gaidaa'na yesa' pwara Juyaraavi gaimwanna ye'.

⁵Divi ajimya yuyangiyaraji Juyaraji kunnya a'mwe naangeraji dinyina ye' "A'mwe saraari kayaa'na yawaaji silyaji liwakaana!" ⁶Dinyina kye' sa'na Widaasaderaai kadika wi'nyina yagila Anga Lizitirraaji Anga Deviji Kwaaka Likiyoniya mannikebanyaalyi kwaaka avaalyavi angengiji likaanya wina yagi. ⁷Likaanya wina yagila yagaala tewaanya' wijiwaakina yagi.

Anga Lizitiraa sabannesi.

⁸Anga Lizitiraa a'mwei sivilyiraa bainikei mwaalina ya'. Sai mudangegaa' ganaange' sivila kayaa'nanyari kamaara' yuyagaa' kaanya myamaryadei mwaalina ya'. ⁹Mwaalina yakei Polimire yagaalya' kadika wi'nyina ya'. Kadika wi'nyina kya' Poli dara wanganake' "A'mwe sai Naangeri mena wi'nalimwamwaka savine'na Gotiyai a'mwe tewaanyari wimwaaihathei daaka!" Daka baihana'na yaka ¹⁰naanna wida' "Sivilyi dithaaka!" Mi'na kuda' a'mwei yarai yiladikwosi'naka saba kaanya yamarina ya'. ¹¹Kaanya yamaryadaa'nyi kwala bwa'naanya Poli yakevi tinna wanganeva kunnya Likiyoniyagaalyavi jaka dinyina ye' "Gotiyara mwaaihasaraavidaasi daraai a'mweraaibisaraai neminyawinna waimanaabihile!" ¹²Jaka dinyina yeva kumire gotiyaraare yaya' Baanavaazariji Polimiji yaya wide'. Baanavaazarina Suzai wideva Polimina yagaala widaderina Emizai wide' yaya'. ¹³Sara kude' Suzare yileanga angeba maangebaari madakevidaasi Suzare yileanga maremwaaidei bulimakaawoyaraaviji puriryangiji adikuryabanna makwalyuna ya'. Maremwaaide sali kwala bwa'naanyaji yawi'na "Bulimakaawoyaraavi tamawaaji gotiyaraari yikunaabudike'na wijavaana!" ¹⁴Sara yawi'na kye' savina Baanavaazalyi Poliji saraai wi'nyina yagila "Sabwi kayaa'nanaangebulyi," dahila kirinnya baazi'ma'nyawaari lihivaina yagila kwala bwa'naanyavi tinnyawinna kaanyave'na wina yagila ¹⁵jaka widahi "A'mweihi, sabwi baa'na yivanigava! Naarimi a'mweinaalyira. Sarimibisainaalyira. Yagaala tewaanya' yihiziwaakya'na biwolyainaalyira. Yihithivanigoi. Waryaanya da marasi'napi Gotiya nebulyai yuyagaa' yuyagaa' mwalibainya'neri duzila! Gotiya nebulyai sigunyasi Kwaakevasi saalaalyaji yuya sangi mwaaidivisaji wakyaakelyira Gotiyai. ¹⁶Kigaa' a'mwe ajimya

yuyangiyara kunnyabwi yadivi! Gotiyai wanganakina yaka 'Dahaa' a'mwera kunnyabwi yagalya'mavapi nimirbwi yipika!' da'. ¹⁷Kigaasi dahaasi yuna lika yulya'na myada yuyagaa' sariminyina tewaanna yadelyira. Sigunyavidaasi burika yihizaavaka tika munne tewaanya yiriya'ne wakivani!. Wapaaya sarimire munyikaavina yihizaavanike'na munya yihyidaasi sarimire siduta yilaaya yivanigasaihilyi. Yuya daza gaminyina nayaa yihizalikurakadelyira." ¹⁸Yagaalya' sara kudahi kuna yaamiji widina widina "Sahwaraahirina yikunaabudike' yiravaana!" widina kye' saraai widina widina "Aalo! Aalo!" widahi. Saaminyagaa' widina widina kyagi a'mwera navika mwaalina ye'.

¹⁹Divi Juya pwara Aadiyoki Kwaaka Pizithiya mannikebadaasaraji Anga Aaikoniyaamidasaraji bina yeva Widaasaderaarina birala widina kye' a'mweraavi sinna tika wida'daa'nyi a'mwera Polimi silaangeji liwakina ye'. Liwakina yeva "Mena baimwaka," dina yeva angeba mwasilaa mwagi'namakwalyuna yina yeva yagalya'ma'na yina ye'. ²⁰Yagalya'ma'na yina kye' Naangeri mididivisara kale wiadaa'nyi gaminyabanna yikabina kye' kiri' Poli daavina yaka angebanna ayina wilaawina ya'. Ayina wilaawina yaka sawi se wa'mwa'na yagila mwanayavi dikaa'na yagila Anga Devina kaanna wina yagi Baanavaazalyi.

Kwaaka Siriya Anga Aadiyokina ayina wawagilya'nesi.

²¹Anga Devi saraai yagaala tewaanya' wijiwaakina kyagi a'mwe kwalaalyara mididivisara yima'nyina ye'. Yima'nyina kye' Anga Lizitiraana ayina wina yagila Anga Aaikoniyaamina wina yagila, Kwaaka Pizithiya Anga Aadiyoki mannikewinna ayina wina yagi. ²²"Yuyaba mididivisaraavi nayaa mwaabika!" dahila kumire simunyangi diraginna wijiwaakina yagi "Gotiyare yagaalya' nayaa dilimwana! Naangeri kuna dilimwagaka! Gamire diraginya' nayaa dilimwagaka! Kwaaka davaki mwaaida'gizi daanga pinya'neji kale ya'neji kagyozu sare'na kiri' divi Gotiyai maremwaaidevi nawi'nyabanna dimwalaawideiginyira," sara yivaimwana yagi. ²³Yivaimwana yagila anga yuyangi a'mwe sidu'nakeraavi Kiraazitiyare kusilaanya gazasavine a'mwe naangeraavi wimwaaihina. Mi'na wimwaaihina yagila "Gotiyai yuyaraavi diraginyaraavi wimwaaihana!" dahila tika munne manyi yagila a'mweraavina Gotiyari yagaala widina yagi "Naangeigi, a'mwe dara gilimwamanigasaigi, nayaa dimaremwaala!" sara widina yagi.

²⁴Kwaaka Pizithiya kaanna yamaryadi' Kwaaka Paabilyana yi'mavaawina yagila ²⁵Anga Pehaana yi'mavagilegaa' saba mwaalyaraavi Gotiyare yagaalya' widina yagi. Wi'na widina yagila Anga Ateliyana walaawina yagi. ²⁶Walaawina yagila sipiyavi yilamwaina yagila Aadiyokina kaanna wina yagi. Kigaa' Anga Aadiyoki sawidaa'nyi Naangerera saraari dara widaase' "Neya'mweraahi Gotiyare yagaalya'

widadaakilyi Gotiyai yilaaya yadei yanga nayaa yihigaimwagana!” Sara widaasesa' sara yagi.

²⁷Aadiyokina yi'ma'na kyagi Kiraazitiyare kusilaanyaviyara yikabina kye! Gotiyai kiriminyina sara wiake! sara wijiwaakina yagi. “Gotiyai kaanya' tihini'nik'e! kabaasa' ajimya yuyangiyara Naangeri wi'nalimwagesa'nesira,” sara wijiwaakina yagi. ²⁸Wijiwaakina yagila Aadiyoki saba naangegaa' mididivisaraji mwaalina ye'.

Jeruzaalemi yagaala naanga widesa'nesi.

15 ¹A'mwe Juya pwara Kwaaka Juthiyadaasara Aadiyokina bina yeva neya'mweraavi dana wijiwaakina ye' “Ne Mozizai kilaaka daya'na kiwinya wijaakevi mi yipija! Gotiyai mavadaihasamaari yihyannelyira.” ²Sara wijiwaakina kye! Poliji Baanavaazalyi saraai maanga widina kyagi maanga widadaapiji Kiraazitiyarera dinyina ye' “Jeruzaalemina Poliji Baanavaazalyi nemire Aadiyoki mwaalya pwaraji kwawapiji Widaasaderaji a'mwe naangeraji yiwaarata da' nayaa dizavada'galyideihilyira.”

³Sarevidaa'nyi Kiraazitiyare kusilaanyaviyara kudaase' kaanna wina yeva tinnyaba Kwaaka Piniziyaji Kwaaka Sameriyaji sabanyaai neya'mweraavi widina “Piba piba ajimya yuyangiyara sinnawinyaraavirebwi bikwalyina yeva Naangeri limwamaniga!” Sara widina kye' a'mwera yilaaya naanga yina ye'. ⁴Yilaaya naanga yina yadaapiji Jeruzaalemina yi'mavaawina kye' kumiji Jeruzaalemina mwaalya Kiraazitiyare kusilaanyaviyaraji Apozeliyaraji a'mwe naangeraji yilaaya yina yeva ata bwa'nyina kye' Aadiyokidaasara “Gotiyai wigaimwanna kaneya' sana sana yoinera,” wijiwaakina ye'. ⁵Wi'na wijiwaakina kye' Periziyara Naangeri limwadivisara pwara daavina yeva widina ye' “Menyara kilaaka da'nipijaraavi 'Ne Mozizare Kiwinya' jila' duzidesira.”

⁶Savine'na pigaa' Widaasaderaji a'mwe naangeraji yagaala savi yawibwata'nera yikabina ye'. ⁷Yikabina yeva yiwaara'nyina yiwaara'nyina yeva kuna didaapi Pitai daavina yaka wida' “Nya'mweihi, sinnawi nimidaasi ajimya yuyangiyaraavi yagaala tewaanya' kude sahwaru kadika wi'neva Naangeri limwagesa'na Gotiyai nyidahilakake' yawi'mwaava. ⁸Gotiyai a'mweraavire simunyangi yawirangadei 'Ajimya yuyangiya kwaraaviji maarideinyi,' daka gannya Kurya Tewaanyari nejaavakabaalibi' Menyaraavina yanga wijaava'. ⁹Neminyina ge' myake' kuminyina ge' mya'. Aawa, kumi sara Gotiyari ku'nalimwage! Gotiyai kumire simunyangi girikita duimwagasi'na'. ¹⁰Sarevidaa'nyi sariminyina Gotiyari kale wiwaka. Sahwari yaamiji be'na yivanigava? 'Kiwinya naange jila!' dadivi' taanga Menyaraavire egweyaba wakina wakina yadivitabaabisasira. Kigaa' taanga sa' Ne sinnawinyaraji nemiji nayaa

mamakwiyi yaawoinera. Mudikeraavina be'na wakivanigava! Sa' aawa. 11 Nemi dara yawiralimwamanigo. Naangei Jizaazai nemi yuyainaavina yanga negaimwagakevi nevadaihasamaara'. Savine nayaa wi'nivanigo' Gotiyai nema'mwakeine. Nabaai Menyara yanga wigaimwanga saburina Gotiyai avaa'ina wivadaihasamaa'manikere."

12 Sagaa' kwala bwa'naanya' kave mwaaidapiji Baanavaazalyi Poliji saraai wijiwaakina, Gotiyai gannya diraginya' kujaava' wijiwaaina'neji atika maru'nasaji ajimya yuyangiyaraavireba yagilya'na wijiwaakina yagi. Wijiwaakina yadaakilyi yuyara kadika nayaa wi'nyina ye'. 13 Kadika wi'nyina kye' dividaa'nyi Jemizai yuyaraavi wida' "Nya'mweihi, nimore diwija' dinyu'nyila! 14 Sinnawi sagaa' Gotiyai ajimya yuyangiyaraavina kale kwia' sahwarraavi gamire yaya' kininnakera yima'nya'neraavi gaminyineraavi maarake'na Saaimoni Pitai mena nejiwaakiwa'. 15 Sara nejiwaakiwake' piropetiyara Gotiyari wi'nawijiwakyaasara sara yidayaa'. Savina Gotiyare bukuya' dara dinikabaabisasi.

16 Naangei nediwa' 'Divi yagalaawina ya'muji
Ne Devitimire seli angeviyaraavina diraginya wijaavideinyira.
Sahwara bwalaraawesara yima'nyina kye'
Sahwainyi nawi'nyaraavi nayaa wimwaa'hideinyira.

17 "Dahaa' a'mwe yivainera Naangeinyi nyibiramaapika!
Ajimya yuyangiya pwaraavina nimore yaya' dahilakiwera!
Sahwara nyibiramaapika!" dena nayaa wimwaa'hideinyi.
Niminyinera ajimya yuyangiyara pwara nyibiramaapi'deinyira.'

18 Sara nediwa' Naangei kigaakuna danejiwaainakela."

19 Jemizai yagaala piri' wida' "Sa' dinikevina da' yawi'manigesira. Ajimya yuyangiyara Ne sinnawinyaraavirebwi mipijara Gotiyarebwi limwagapiji sahwarra navika mwaabika! 'Juyainaavine Ne Mozizare Kiwinya jila!' madaannera! 20 Aawa. Pikariyikwiavi dara yavikaryaana! Sarimi tewaanna yivanigasaihilyi. Yagaala maalike' yihithaana! A'mwera yikunaabudike'na jilikyaawaryaraavi karamapiji miwita kimaaka sa maninna! Nabaai, Nyilyariji Laweriji yisaraaviji sazangine miwita maninnera! Ata maralimwanna minna! Jilikyaawaryaraavi giraa'diwannike tawanake maninna! Tawe maninnera! Gave'na sara yavikaryaana! 21 Sare' dare'nesi. Kigaakuna Juyaraavire Kwazaakegaa' yuyagaa' Lotuangengi Ne Mozizare Kiwinya wijiwaakina wijiwaakina yadivi' dahaasagaa' anga yuyangi gamire yagaalya' widadivisa'ne'na yavikaryaana!" wida' Jemizai.

Menyaraavi pikariyikwia' yavikaryesa'nesi.

22 Sagaa' Widaasaderaji naangeraji Kiraazitiyare kusilaanyaviya yuyaraji dinyina "Tewaanyasi. Aadiyokina nemijiyaraari dahilakawaaji Poliji Baanavaazalyi widasaana!" Dinyina yeva Juthaazai yaya piri'

Baazavaazai wo'nikelyi Saailaazalyi saraari dahilakina ye'. Dahilakina yesaraarina neya'mwera widadivi' "A'mwe nemaremwaaidisaraai tewaanyaraalyira." Dahilakina yeva pikariyikwiavi yavikarina yina yeva widaasina ye'. ²³Yikwia sa' yida'ni'

"Nedaasadeinaji a'mwe naangeinaji sirya'mweina pikariyikwia davi sariminyina yavikarivanigona. Ajimya yuyangiyaihi neya'mweihi Aadiyoki mwaalyaihilyi Kwaaka Siriya mwaalyaihilyi Kwaaka Siliziya mwaalyaihilyi yihithivanigo 'Neya'mweihi!' ²⁴Dara wi'nivanigo. Nemirera pwara kaanna waweve Menyaihiri yihitheta yagaala sanna Menyaihi simunya kwalaalya yawi'na kye' kale yihya'. Sara wi'nona yihithivanigo. Yagaala sa' yihithiwa'daasaraavi mudaasiwa'do. ²⁵Dahaasagaa' yikabina yona yagaala da' jawibwarakiwo, yuyaina. "Tewaanyasi, dona a'mwe sidu'nakeraari dahilakona sariminyawinna saraari widaasade. Saraalyi Baanavaazalyi Poliji saraavi widaasadera. Baanavaazalyi Poliji saraarina yilaaya nevu'nivanikeraalyira. ²⁶Anga yuyangi Baanavaazalyi Poliji saraai Kiraazitiyai Jizaazai Naangere yagaala wijiwaakagilyaraai balya'na lika myadisaraalyi. Saraari widaasadera. ²⁷Sarevidaa'nyi nabaai, sariminyawinna Juthaazalyi Saailaazalyi saraari, sidu'nakeraarina yihithiworaari widaasadera. Saraai yagaala avaalya' jithawakiwo' yihiziwaakikaderaalyi.

²⁸Sare' dare'nesi. Kurya Tewaanyalyi nemiji mena yawi'na yobwi taangayabwi mi'. Aawa. Daazabwi davwi dimidinyila!

²⁹A'mwera yikunaabudike'na jilikyaawaryaraavi karamapiji miwita sa maninna! Nyilyariji Laweriji yisaraaviji dazangine wapaaya maninna! Tawe maninna! Jilikyaawarya giraa'diwanna yipija maninna! Ata malimwadinna! Kayaa'nanya sangi mya'gizi tewaanya jitheiginyi.' Mi'na yihithiwo." Pikariyikwia' sara yavikarinikesi.

³⁰Sarevidaa'nyi widaasesara kaanna wina yeva Anga Aadiyokina yi'mavaawina kye' Naangerera kwala bwa'naanya yuyaraji yikabina kye' pikariyikwia' wijaavina ye'. ³¹Wi'na wijaavina kye' a'mwera paaziya' tinna maranganna yeva yagaala nawi'nya'na yilaaya yina ye'. ³²Yilaaya yina kye' Juthaazalyi Saailaazalyi saraai Gotiyari wi'nawijiwaakadisaraai kuna wijiwaakina yagila kirya'mweraavi simunya diraginya' wivaimwanna yagi. ³³Wivaimwanna yagila mwaalina mwaalina kyagi kirya'mwera kiriminyina yilaaya yeva wide' "Ayahi kwaamu'nanyaburi yihithaasesaraayawinna diwideihilyira." ³⁴Sara widina kye' Saailaazai yawiraka "Dava mwaalideinyi," mwaalina kya' Juthaazai gavei ayina wina ya'.

³⁵Anga Aadiyoki Poliji Baanavaazalyi mwaaidakilyi saraalyi pwara kwalaalyaraji Naangere yagaala wideva wijiwaakina ye'.

Poliji Baanavaazalyi yosinagilya'nesi.

³⁶Divi yirika piningi Poli Baanavaazari wida' "Anga yuya gazabazaba Naangere yagaalya' widolyabanna Neya'mweraavi angyiri'maata

yakadera. Tewaanna dahamwaaihava? Wanganakadera.” 37 Sara kuda' Baanavaazai wida' “Maakiyai Joniji wawaadera.” 38 Poli wida' “Aawa, kigaa' Maakiyai Joniji kwawo yunewinna wawinya yuya myada Kwaaka Paabiliya saba naariminyi nehyagalya'mava'. Nehyagalya'mavake'na dahaa' sahwai kaanya mwawannelyira.” 39 Sara kuda' sa'na maanga dinyina yagila yosinna yagi. Baanavaazai Maakiyai Jonimi maaraka sipiyavi Ahu'manna Saaipiraazina wina ya'. 40 Wina yadaasi Poli Saailazari dakilakina kya' kirya'mwera wide' “Gotiyai kirimiji wawoji yanga yihigaimwagori kave maremwaina yihyathelyira.” 41 Mi'na kude' Kwaaka Siriyanaji Kwaaka Siliziyana'ji wawaka Kiraazitiyare kusilaanyangi wijiwaakina yada simunya diraginya wijiwakadaasi diraginya maaresare.

Poliji Saailaazalyi saraalyi Timotilyi wawesa'nesi.

16 1 Angeba Devina'ji Angeba Lizitiraana'ji Poli yi'mavaawina ya'. Saba Kiraazitiyari mididei Timoti wo'nikei mwaalina yakelyi. Ganaange' Naangeri wi'nade' Juya' mwaalaka kiri' ganimaangei Girikiyalyira. 2 Neyamwera Lizitira' mwaalyaraji Aaikoniyaami mwaalyaraji Timotirina jalikurakina ye' “A'mwe tewaanyalyira.” 3 Poli simunyavi da' yawi'na “Nimiji Timoti wawana!” yawi'na yaka Juyaraavirebwi Timotire kilaakeji' davina ya'. Sare' dare'nesi. Juya yuyara saba mwaalyara yawire' “Timotiri ganimaangei Juyai mika. Aawa, Girikiyalyi. Gawaalivaangere kilaakeji' mada'nyikelyi.” 4 Wi'na davina kya' Poliji Saailaazalyi Timotilyi anga yuyangina wina yeva Kiraazitiyareraavi yagaalya' Jeruzaalemi Widaasaderaji a'mwe naangeraji jamungajakesa'na wijiwaakina ye'. Wijiwaakina yeva wide' “Yagaala sa' sara jideihilyi.” 5 Sarevidaa'nyi Kiraazitiyare kusilaanya sara yeva limwangebawina diraginna mwaalesa' yirika yuyagaa' a'mwe kwalaalyara Kiraazitiyarera yima'nyina ye'.

Anga Tirawaazi Poli waja' wanganake'nesi.

6 Kaanna kaanna wina yeva Kwaaka Piriziya Kwaaka Galeziya sabanyaai yamarina yadaapiji Kuryai Tewaanyai wida' “Dahaa' Piroviji Eziya Gotiyare yagaalya' mujiwaakipina!” 7 Mi'na kuda' Kwaaka Miziya maangebaarina yi'mavaawina yeva yawi'na ye' “Piroviji Bithiniya wawaana!” Sara yawi'na kye' Jizaazare Kuryai kaanya tihina yake'na “Sawinna mupinera!” widina ya'. 8 Widina kya' Kwaaka Miziya yuneba lota'na yeva Anga Tirawaazina walaabina ye'. 9 Walaabina kye' sawisavi Poli a'mabaaitinna wanganna yake' a'mwei Piroviji Maazathoniya mwaalyai daavikei naanga yidaangana' “Poligi, Kwaaka Maazathoniya ga'mava'gizi neminyina dinegaimwana!” 10 A'mabaaitinna mi'na wanganna yaka dara yawiro' “Gotiyai 'Maazathoniya mwaalyaraavi

yagaala tewaanya' duziwakaawila!' danediwaka!" Mi'na dona Maazathoniya sawinneina gilyivisa yime'nya'bi' yovirawakina yo.

Anga Pilipaai A'mwe Lithiya' Kiraazitiyare' yima'nake'nesi.

¹¹Anga Tirawaazi sipiyavi yilamwaaina kyo sipiya' Ahu'manna Saamothirezina yida'na makuna neyaka yirika piriwi Anga Niyapolizi sabanna makuna neya'. ¹²Makuna kaneya' kaanna wilaawina yona Anga Pilipaaina yi'mavaawina yo. Anga sa' Kwaaka Maazathoniya mwaalyaraavire anga naangebanyira. Anga Romidaasara kwala naange' mwaaihasabanyi. Sabanna yi'mavaawina yona yirika pijaa' mwaalina yo. ¹³Mwaalina yona Juyaraavire Kwazaakegaa' "Aalimaangebaari Juyara Gotiyari yagaala widadivisaba dingaka?" dina yona aalimaangebaarina wina yo. Wina yona dara wangano' "A'mwe damwaaihava!" Sara dona walamwaaina yina yona a'mwe yi'bwa'nemwaalesangi widina yo. ¹⁴Widina yo' a'mwe piri' Lithiya' Anga Taayataairadaasasira. A'mwe sa' gilyaji baazi'ma'nyaji kwaabihannyaji saza wangwaija'bisa' wanya'ne' divaina yada yaasadesira. Lithiya' Gotiyari yagaala widadesi. Poli yagaala tewaanya' widadaa'nyi Gotiyai siduta tewaanya wijavina kya' Lithiya' nayaa wi'nyina ya'. ¹⁵Nayaa wi'nyina yaka Naangeri limwanna kya' gaminyiji gamijiyaraaviji bavitaaziya yina yo. Bavitaaziya yina kyo neda' "Niminyina 'Naangere' sahwari nebulya'na wilimwaga'manikesi,' dinapiji nimore angevi dimwalyila!" Sara naanga kaneda' gamire angevi wilamwaaina yo.

Pilipaai kalavuzangevinesi.

¹⁶Pigaa' Gotiyari yagaala widadivisawinna wodaawoji tusavi sidiraaya' yaasiwa'wawinya yade' jimaata'na neya'. Sidiraaya sa' kamaala naanga pwai kininnake' divi yima'nadengina dadesira. Sara dada gamire maremwaaidivisara nigwia naanga maarina yesasira. ¹⁷Jimaata'na neyaka Poliji sainaavi midida jaka widadesi. "A'mwe sara Gotiya Mena Ke'mwewinyare yaasiwa'wawinyare. Gotiyai sarimire kayaa'nanyanna yihivadaihasamaaradewina yihithivanigasarera." ¹⁸A'mwe' dada yirika pijaakuna jaka dada Poli maa'na kwina' ginyima'nyina yaka yimakeri wida' "Kiraazitiyai Jizaazarine yayavina naanga githima! A'mwevire munyikidaasi dalyona!" Sara kuda' sagaasagaa' yimakei yarai bwalyuna ya'. ¹⁹Yarai bwalyuna kya' sidiraayavire maremwaaidivisara dara wanganesa' "Niwaava, divi yima'nya'nenna yagaala maji kyoji nigwia mamaari yaadeina daaka!" Deva Polimiji Saailaazariji galalimwanna yeva a'mwe naangeraayaba yikabadivisabanna mwagi'namaa'na ye'. ²⁰Sara yeva saba naangera kotiya' yawibwa'divisaraayabanna makuna yeva wide' "A'mwe daraai Juyaraalyi. Nimore anga davi kayaa'na yivanigilyaraalyi. ²¹Daraai nimorebwi kayaaka

neyigaimwaalya' mudikebwi yaasiwa'na nejiwaakivanigi. Romiyaina sabwi myaanneinera!" ²² Sara kude' kwala bwa'naanya' maanga jaka kude' naangera Poliji Saailaazalyi saraare baazi'ma'nyangi maralihivalasi'na yeva pilizimaaniyaraavi wide' "Bajingisaji diramyila!" ²³ Sara kude' tamina tamina yeva kalavuzangevi wimwaaihina yeva kalavuzangevi maremwaaideri naanga wide' "Nayaa dangana! Likaanya nabwalyuikadika!" ²⁴ Naanga mi'na kude' kalavuzangevi maremwaaidei yagaala naanga sa' maaraka ku'dika tinnyabanyavi wimwaaihina yaka kirimire sivilyiraari yisavakaari tinnyawi diraginna yagilakurakina ya'.

²⁵ Sawisavi kalawawegaa' Poliji Saailaazalyi saraai Gotiyarina yagaalyasi yiledaatasi widadaakilyi kalavuzara pwara kadika wi'nyina ye'. ²⁶ Wi'nyina yadaapiji saggaa' wininya naange' yina kya' kurikeji sidihibyaji yonyi yonyi naanna yinyina ya'. Yonyi yonyi naanna yinyina kya' kaanya yuya baasinyina yake kalavuzaraavire seniyabara pwinikebara bwalaraawina ya'. ²⁷ Bwalaraawina kya' kalavuzangevi maremwaaidei dikaa'na yaka kaanya yuya baasinike tinna wanganna yaka dara yawirake' "Aakai, kalavuzara lika mena duwaava!" Sara daka "Sare'na wagila namaa'mudika! Nimi sainyi dabira'nima," daka gannya kwaari'masiraminya' maralimwanna ya'. ²⁸ Maralimwanna kya' kiri' Poli jaka naanga wida' "Maramakininnera! Sare' dare'nesi. Nemi yuyaina tihu'na mwaaihona." ²⁹ Jaka naanga kuda' kalavuzangevi maremwaaidei yi'baake'na jaka widina yaka kaanyave'na bwina yaka lika naanga yina yaka bi'bita yada "A'mwe naangeraai nyigaimwagikaji dahayiwaai?" daka Poliji Saailaazalyi saraaryabanna bula'na ya'. ³⁰ Bula'na yakei daavina yaka mwasawinna saraari makuna yaka yiwaara'na "A'mwe naangeraaihi, nimi gara kya'muji nyivadaihasamaaradeinyaka?" ³¹ Sara yiwaara'na kya' saraai widahi "Naanga Jizaazari kalimwaga'gizi tewaanya dimwaaideiginyi. Nabaai, Naangei gimire angeviyaraaviji wivadaihasamaaradeihilyi." ³² Widahila Naangere yagaalya' gaminyiji gamire angevi mwaalesaraaviji wijiwaakina yagi. ³³ Wijiwaakina kyagi sawisavi saggaa' kalavuzangevi maremwaaidei bajingisaji tameta ga'bwaryangi aalya yina ya'. Aalya yina kya' sagaasaggaa' gaminyiji gamireraaviji aalyavi bavitaaziya yarai yina yagi. ³⁴ Bavitaaziya yina kyagi a'mwei Polimiji Saailaazariji gannya angevina makwina yaka wapaaya wijaavina ya'. Salyi gamireraji Gotiyari limwagesa'na yilaaya yeva tewaanna mwaaidivi' mwaalina ye'.

³⁵ Mwanyavi Romiyaraavi naangera pilizimaaniyaraavi widaasina kye' sahwara wina yeva kalavuzangevi maremwaaideri wide' "A'mwe saraari yi'daala'gizi duthaasa!" ³⁶ Kude' kalavuzangevi maremwaaidei Polimi wida' "Naangera giminyinaji Saailaazarinaji widasiwaa! 'Saraari duthaaso!' Sara kudasiwaa' kalavuzangevidaasi yagalya'mavakilyi kave diwila!" ³⁷ Kuda' Poli pilizimaaniyaraavi wida' "Aawa, nediwaata sabwi

kayaa'nanyabulyi. Naarimi Romiyainaalyi. Wona kayaa'na mi kyawaaihoi yuyara tinna nehwangadaapijiyaba nehiramyawaaiha'. Yagaala majidayi yeva kalavuzangevi yaasiwa'na wimwaaihina nehyawaaiha'. Dahaasagaa' nehithiwaa' 'Lika yulya'na kave diwila' Be'nana! Romiyaraavi naangera sahvara bipijara mwasawinna kanehimakwalyopiji wawakadeinaalyi.”
³⁸Naanga kuda' pilizimaaniyara ayina wina yeva Poli widake'na Romiyaraavi maremwaaaidivisaraavi wijiwaakina ye'. Poliminaji Saailaazarinaji “Saraai Romiyaraalyi,” wi'nyina yeva “ 'Amwe naangeraai mika!' dona tamyawaaihoraalyi,” deva lika naanga ye'.
³⁹Lika naanga yesara bina yeva wide' “Kayaa'na yihyawaaiho'na kale neyiwaka.” Wideva kalavuzangevidaasi kave makwalyuna yeva yiwaara'na ye' “Amweraaihi, nemire angeba yagalya'mavakilyi diwijiwaala?”
⁴⁰Yiwaara'na kye' Poliji Saailaazalyi saraai kalavuzangevidaasi yagalya'ma'na yagila Lithiyavire angevi wilina yagi. Wilina yagila neya'mwera yikabina yesagaa' kuminyi dihaa'bwabawbi yivaimwana yagila kaanna wina yagi.

Anga Tezalonaaika sabannesi.

17 ¹Kaanna wina yagila Anga Aabipolizi wavila'na yagila Anga Apoloniya wavila'na yagila Anga Tezalonaaikana yi'mavaawina yagi. Anga saba Juyaraavire lotuange' mannikeba. ²Yi'mavaawina kyagi Kwazaakegaa' lotuangengi Poli widina yadei lotuanga savi sara wilina ya'. Sara wilina yaka Kwazaaka dawaai dasangi Gotiyare bukuya'na wijiwaakina ya'. ³Aangyagaalya' wida' “Gotiyare yagaalya' nedinike' 'Kiraazitiyai Juyara yemwaaidivisai daanga naanga kuvinoji mena baloji ayina dikaavadelyira.’ Sara nedinike' Jizaazai sara ya'. Sara yakei Kiraazitiyarina yihithivanigelyira Jizaazai.” ⁴Sa'na kuda' Juya pwara Polimire yagaalya' wi'nyina yeva Poliji Saailaazalyi saraari ye'mwannyina ye'. Nabaai Girikiyara Gotiyari dadivita kwala naangeraji a'mwe simunya nayaa yadivisaji sa ye'mwannyina ye'.

⁵Juyara Kiraazitiyari malimwagesara tiganaarya yeva jikurya yeva a'mwe kayaa'nanyara adusangi kaanya' yaasiwa'na yamaryadivisaraavi makabina kye' kwala bwa'naanya jaka naanga dadivi' kayaa'na yina ye'. Kayaa'na sara yina kye' angaba mwaalyaraavi sinna tika davina kya' a'mwe kayaa'nanyara Jaizonimire angevi kaanya' yipalabaasina yeva “Polimiji Saailaazariji a'mweraayabanna kotiya'na makwalyawaana!” deva bireva bireva yina ye'. ⁶Nyinna birina yeva mabiramaari ye'. Mabiramaari yeva Jaizonimiji neya'mwe pwaraaviji angeba a'mwe naangeraayabanna diraginna mwagi'namaa'na yeva jaka wide' “Amwe Kwaaka yuneva' maraginyiwagakagileraai nemireba davanna byi'ma'mwaalyaraai. ⁷Dahaa' nemire angebanna kabahi Jaizoni gannya angevi maremwaaalika. A'mwe saraai A'mwe Naanga

Sizaare kiwinya kayaaka yigaimanigi. Dara kwaasiya' nedivanigi 'Kwaakevaki maremwaaidei Sizaai mika. Kingiya pwai Jizaazai wo'nikai maremwaaidelyira.' ” 8 Yagaala sa' kude' kwala bwa'naanyasi anga sabanya a'mwe naangeraji sinna tika naanga wida'daa'nyi “Kayaa'nanyasi,” deva jaka naanga wide'. 9 Jaka naanga sara kude' a'mwe naangera Jaizonimiji pwaraaviji saraavi kotiya'naji kwaamu'mwaalya'naji nigwia mena maareva wide' “Wawapijaihi diwila!”

Anga Beriya sabannesi.

10 Sawita kajinna' Anga Beriya neya'mwera Polimiji Saailazariji saraari lika marulyakaasina ye'. Lika marulyakaasina kye' pigaa' anga sabanna yi'mavaawina yagila Juyaraavire lotuangevi wilina yagi. 11 Anga Beriya mwaalyara sidu'nakera pwaraavire yagaalya' kadika wi'nadivisarera. Anga Tezalonaaika mwaalyarabisara mika. A'mwe sara Naangere yagaalya' kadika nayaa wi'nadivi' “Polimire yagaalya' nebulya'na dingaka?” deva Gotiyare bukuyavi tinna wangadivi' nayaa yawiresare. 12 Gotiyare bukuyavi tinna wangadivisavidaa'nyi Naangeri limwagesa', nabaai a'mwe Girikiya naangeji a'mwe Girikiyaraji limwanna ye'. 13 Nayaa limwanna kye' Anga Tezalonaaika mwaalyara Juyara dara wi'nesa' “O, Anga Beriya Poli Gotiyare yagaalya' duthiwaka!” Sara deva sabanna bina yeva kwaasi yagaalya widadaapi kwala bwa'naanya' yikabina yeva Polimivaavina sinna tika wida'daa'nyiyara jaka naanga wide'. 14 Sara kye' sagaa' yime'nya'bi' saalaalyavi maangebaarina neya'mwera Polimi waasina ye'. Waasina kye' kiri' Anga Beriya Saailaazalyi Timotilyi mwaalina yagi. 15 Saba mwaalina kyagi a'mwera Polimi makwalyuna yadaapi Anga Aathenizina wina yeva yi'mavaawina ye'. Yi'mavaawina kye' Poli widina “Saailaazai, Timoti saraaihi yihithiwa'de' mena yakilyi yarai divila!' duzideihilyira.” Sara widaasina yina kya' a'mwera Anga Beriya kunnya angebanna ayina wina yeva yagaala sa' wide'.

Anga Aathenizi yake'nesi.

16 Anga Aathenizi Poli Saailaazariji Timotiriji yemwaaida dara wanganake' “O, anga dava yuneba a'mwa'mwe a'mwera yilaaya yivanigasa daaka!” Sara kada' kale naanga naanga wia'. 17 Sarevidaa'nyi Kwazaakegaa' Juyaraavire lotuangevi wilina kya' Juyaraji Menyara Gotiyari dadivisaraji Poliji dinyina ye'. Dinyina yesa' yirika yuyagaa' a'mwera yikabadivisabanna a'mwe pwara bina kye' Poliji dinyina ye'. 18 Nabaai Epikuriyaazarebwi dadivisaraji Sitoyikiyagaala dadivisaraji sidu'nakeraji Poliji dinyina ye'. Dinyina yeva pwara maanga wide' “Sidu'maayai yagaala pijaakuna dadei be yagaala nedivanika?” Poli Jizaazarinaji dikaasavinaji wijiwaakake'na a'mwe pwara wide'

“Menyaraavire kulakeji a'mwa'mwewaalyi widivanikei dingaka?”¹⁹ Sara yawi'na yeva Aariyopahaazi sawi kaajolijara mwaaihasabanna Polimi makuna yeva Polimi wide! “Yagaala mudika da' nedivaniginya'na yawiraana!²⁰ Sare! dare'nesi. Gimire yawita mudika pini kadika wi'nona myawirivanigona. Sarevidaa'nyi sabwine dinejiwaakya!” wide!²¹ Yuyagaa' Anga Aathenizi mwaalyaraji Menyara saba mwaaidivisaraji sara yagaala ge ge kadika wi'nyina yadivi' yagaala mudika sa dinyina yadivisare. Sarera yadivi' yilaaya yadiviki.

²² Aariyopahaazi kaajolijara mwaaidapiyaba Poli daavina yaka wida' “Aathenizi mwaalyaihi, a'mwa'mwe kwalaalyangi yilaaya yadivisaihiri yihwangamwa.²³ Sare! dare'nesi. Sarimire angeba kaanya yamaryena a'mwa'mwengi yilaaya yadivisabannengi tinna wanganena dara bi'mwa'de' ‘O, kwaraanyaba pikarya “Naangeri myawirivanigo'nesira,” yida'nike' daaka!’ Sara dena Naangeri myawirivanigasari yaasiwa'na yilaaya yivanigasa'na yihiziwaakima!²⁴ Naangei Gotiyai Kwaaka davakiji yunebanna mwaaihasaraji kwaakevi yuya yi'naanya kurivaariya yuya wakakelyira. Sigunyasi Kwaakesi yuyangi maremwaaideyli Naangei. A'mwera yileange madina yadivisangi mamwaalyika. Aawa.²⁵ Naangei sahwai a'mwe yuyaraavine mwaalya'nebulyi simudinyasi yuyaji sangi wijaavade'na a'mwera gaminyine gara yapiji wijaavipi'delaka! Aawa, Naangei yuyangi wakakengira.²⁶ Yuyangi wakaka sinnawinyari yavikaryaakeridaa'nyi anga naanga pimagina gazavasava' Kwaaka yunebanna wimwaaihina ya'. A'mwera maayagaa' Naangei a'mwe yuyainaavina yawi'na ‘A'mwe gabinyaraavire kumire bwaibwalyaji kwaakeji kumiregaasi wakima!’ yawi'na yaka divi wimwaaihina ya'.²⁷ ‘A'mwera niminyi yawirapiji yaamiji nyanganapiri nyibiramaapi'deinyi daaka?’ sara daka sara wimwaaihina yaa'. Sara yaake' kiri' Gotiyai neminyi maavewi mamwaalyika. Aawa, a'mwe yuyainaayaba mwaaidelyi.²⁸ Savine'na pwai pikarya yidava'

‘Sahwarina kwaihwainakeina kurinakeina mwaaiho nemire kaavilyai.

Sai mamwaalyi yadori kwaji nemi mamwaalyi kyaadi!’

Sarimire sidu'nakera sara kyihizaa' yida'nikesi

‘Nemiji gamire kaimiraayainera.’

²⁹ Sarevidaa'nyi, gamire kaimiraayaina mwaaiho'na dara myawiraanna! ‘Gotiyai a'mwa'mwe goliya'bisalyi. A'mwa'mwe silivaaya'bisalyi. A'mwa'mwe silaange'bisalyi. A'mwa'mwengi a'mwera nayaa yawireva yavikarigasangira. Sara myawiraanner!’³⁰ Kigaa' a'mwera Gotiyarina navika mwaalesara kayaa'na kye' saggaa' Gotiyai yagaala yarai majai mwaala!. Yagaala majai mwaalake' kiri' dahaasagaa' yunebanna yuyaina mwaaihoinaavi nedivani! ‘Sarimire simunyabwi mudikebwi jawiramaaryila! (Nayaa dinyimidinyila!)’³¹ Gotiyai sara nedivanike!

a'mwe yuyainaavina kotiya naange' yida'maraangebwinaya nayaa yade yirika sagaa' wakikelyira. Nabaai, a'mwe yawibwa'deri dahilakakei kotiya'na mena wimwaaaha'. A'mwe sai mena kabala' Gotiyai ayina yidikaavakelyi. Sare' nemi tinna wanganona yawi'na 'Ai, nebulyasi. Sai kotiya' neyawibwaradelyi,' yawi'na yivanigo," Poli sara wida' Jizaazarina.

³²Sagaa' baryaraavi yidikaasabwine yagaalya'na pwara kadika wi'neva "Kwaasiya'nesi," deva birala widesa' kiri' pwara "Nebulya' dingaka?" deva wide' "Pigaa' sa'na ayawi kaneda'gizi kadika gu'naadeinera." ³³Sara kude' pwara Polimire yagaalya' ku'ne' Poli yikabesaraavi ya'ma'na ya'. ³⁴Polimi wi'nesara ye'mwannamwaina yeva Naangeri limwagevera yima'nyina ye'. A'mwe pwai Daayoniziyazai kaajoliyai Aariyopahaazi saba yadelyi a'mwe piri' Damaariza' wo'nikesi pwaraji Naangerera yima'nyina yesarera.

Anga Koridi yake'nesi.

18 ¹Dividaa'nyi Aathenizina ya'ma'na yaka Anga Koridina wina ya'. ²Koridina yi'mavaawina yaka Juyai Aakwilaa wo'nikeri wijimaa'nyina ya'. Aakwilaami ganaange' Anga Podaazi maarakelyira. Sagaa' A'mwe Naangei Kilothiyazai wida' "Juyara yuyara nimore Angeba Romidaasi wipika!" Sara kuda' Kwaaka Yitaalidaasayoi Aakwilaaji gamire balaange' Pirizilasi Anga Koridi gaai mwaalina yagi. Gaai mwaalina yagilyayori Poli tinna wanganna yaka angyiri'maata yina ya'.

³Sai kwaabiyivikange yavikaryamaryada nigwia yaasadelyira. Sayoi avaiwawinya yadisa'na Poli sayoryaba mwaalina kya' sayolyi gamiji kwaabiyivikange yavikarina ye'. ⁴Yavikarina kye' Kwazaakegaa' yuyagaa' Juyaraavire lotuangevi pwaraji dinyina ye'. Sai yawi'na "Juyaraji Girikiyaraji Jizaazari wi'nipika!" yawi'na kya' pwaraji dinyina ye'.

⁵Kwaaka Maazathoniyadaasaraai Saailaazalyi Timotilyi bamwaina yagilyagaa' gamire kuryari yibwakinaka yuyagaa' Poli Juyaraavi Gotiyare yagaalya' wijiwaakina ya'. Dara wijalikurakina "Kiraazitiyai kigaakuna Gotiyai dahilakakei Jizaazalyira." ⁶Kuna wijalikurakina yadaa'nyi Juya pwara gaminyina gidaa'na yeva Polimi birala yina kye' yawi'na yaka "Gotiyare yagaala mu'nyi kyiwaa' nimiji pwaraji yosinaade'nanyira." Sara yawi'na yaka gannya kwaabihannyavire tirya purakirasi'na yaka wida' "Sarinnya kuryaraji tawesi wasi'nivanigasa'na sarimi saihi sara yivaniga'. Nimi sainyi sara myivanige. Gotiyare yagaala nayaa yihithiwa. Dahaa' sariminyi mena yihya'mava'muji ajimya yuyangiyaraavi wijiwaakideinyira." ⁷Sara widina yaka ya'ma'na yaka Tiziyazai Jaazitazare angevina wina yaka saba wijiwaakya'na mwaalina ya'. A'mwe sare ange' Juyaraavire lotuangeyaba mannikebanyi. A'mwe sai Menyai Gotiyari yilaaya yadelyira. ⁸Gamire angevi Poli mwaalina kya' Kirizipaazai lotuangevi maremwaaidei Polimire yagaalya' wi'naka

gamijiyaraji Naangeri limwanna ye'. Wi'na limwanna kye' Koridi mwaalya kwalaalyara gaminyi kadika wi'neva sara limwanna kye' Kiraazitiyarera aalyavi bavitaaziya yina ye'.

⁹Sawita pigaa' Poli a'mabaaitinna wanganna ya'. Tinna wanganna yadaa'nyi Naangei wida' "Nimire yagaalya'na jikurya yivanigasaravina lika minnera! Aawa. Kuna duthana! Maadinna minna! ¹⁰Gimiji mwaaida' kagihaimwaga'muji a'mwera kayaa'na mi gyipi'de'nanyi. Anga dava nimirera kwalaalyara yima'nipi'de'nanyi. Sare'na yawira'gizi ginnya wawinya' diraginna kuna jitheiginyi." ¹¹Naangei sara kuda' kwarama piri' lawe atina ata puridaasi pu'na wavila'daa'nyi anga savi mwaalaka a'mweraavi Gotiyare yagaalya' wijiwaakina ya'.

¹²Romi mwaalyai Gaaliyo Kwaaka Giriza maremwaaidei Ga'maaniyai yima'nakegaa' Juyara yikabina yeva "Sari kotiya yaana!" dineva Polimi kotiangebanna makuna ye'. ¹³Makuna yeva Gaaliyomi wide' "A'mwe dai a'mweraavi widada 'Mudikebwi Gotiyari yilaaya jila!' widadelyira. Sara yaaja' nemire Kiwinya' kayaaka nyaadi'de'nanyi." ¹⁴Wi'na widina kye' Poli "Savina widima!" daka yakelyi. Gaaliyo Juyaraavi yarai wida' "Juyaihi, sai kuka yaji kwaji kayaa'nanya yaji kwaji sarimire kotiya' nimi nayaa kajawibwarakiwidika. ¹⁵Aawa, kiri' sarimire yagaalyanna, yayanna, sarimire kiwinyanna sarimi saihi dizawibwarakyila! Nimire wawinya' daaka! Sare majawibwarakiwineinyi." ¹⁶Sara widina yaka kotiangewidaasi widaasina ya'. ¹⁷Widaasina kya' a'mwera Sozithenzai Juyaraavire lotuangevi maremwaaideri galalimwanna yeva kotiangeyaba asaji mala tamina ye'. Mala tamina yadaapiji Gaaliyo Ga'maaniyai "Kumiresi," daka navika mwaalina ya'.

Anga Aadiyoki ayina wawake'nesi.

¹⁸Sawita kwalaalya jinnadaa'nyi Anga Koridi Poliji neya'mweraji mwaalina kye' sabadaasai ya'ma'na kya' Kwaaka Siriya sawinna sipiya' gamiji Pirizilaviji Aakwilaamiji makuna ya'. Gotiyari yagaalya' sara widake'na Anga Segiriya Poli gannya mijata da'nyina yakelyira. ¹⁹Kwaaka Eziya Anga Epazaazi sawinna yi'mavaawina kye' saba Pirizilaviji Aakwilaamiji mwaalina yagi. Mwaalina kyagi sai saba Juyaraavire lotuangevi wilina yaka Juyaraji Naangerina dinyina ye'. ²⁰Dinyina kye' Juyara yidaanganna "Naangegaa' gimiji mwalaadeina daaka?" Sara kye' kiri' "Aala!" widaka ²¹wida' "Gotiyai kanyidaasoji sariminyawinna ayina bideinyira." Widaka saba ya'ma'na kya' sipiya' Anga Epazaazidaasi makuna ya'.

²²Kwaaka Juthiya Anga Sizaariyana yi'mavaawina yaka Anga Jeruzaalemina yilaawina yaka Kiraazitiyare kusilaanyaviyaraavi widina yaka Anga Aadiyokina kaanna wina ya'. ²³Kaanna wina yaka saba saaminyagaa' mwaalina yaka pigaa' ya'ma'na yaka Kwaaka Galeziya

Kwaaka Piriziya kaanya yamarina yada Kiraazitiyari mididivisaraavi yagaala diraginna yivaimwanna kya' sahwara tewaanna mwaalina ye'.

Anga Epazaazi Anga Koridi a'mwe Aapolizai mwaalake'nesi.

²⁴Juya pwai Aapolizai wo'nikelyi. Anga Alekizaadiriya ganaange' mudanga maarakelyira. Gotiyare bukuyavi nayaa yawi'dei Gotiyarina yagaala nawi'nya' widadelyi. ²⁵Pwara Naangereburi wijiwaakina yesai yilaaya naanga yada Jizaazarine sara yawi'da sara nayaa wijiwaakina ya'. Nabaai Joni a'mweraavi bavitaaziya yakebwi yawi'da Jizaazarina yuyabwi myawiri yadei wijiwaakina ya'. ²⁶A'mwe sai Anga Epazaazina bina yaka Juyaraavire lotuangevi yagaala sa' diraginna widina ya'. Widina kya' Pirizilasi Aakwilaaji kadika wi'nagila kirinnya angevina a'mwe sari yibwaramakuna yagila Gotiyarebwi yuyabwi wijiwaainyina yagi.

²⁷Divi sagaa' "Kwaaka Girizana widera," dina kya' neya'mwera Epazaazi mwaalyara "Aapolizai nayaa yamaryade'nanyi," deva Kwaaka Giriza mwaalyara mididivisaraavi paaziya' yavikarina ye'. Ada' yavikarina yesa' "A'mwe dai Aapolizari duzila 'Nimire angevi angyiri'maata ja!' " Sara yavikarina kye' Aapolizai kaanna wina yaka yi'mavaawina yaka a'mwe saraavina Gotiyai yanga wigaimwagakevina Naangeri limwagesaraavi diraginna gaimwanna ya'. ²⁸Sare' dare'nesi. Diraginna gaimwanna yakelyi Juyara malimwagesaraji a'mweraayaba dinyina ye'. Sara dinyina yadaapiji Aapolizai diraginna yawiraka kumire yawita sangi wavila'na ya'. Gotiyare bukuya' wijiwaainyina yaka wida' "Bukuya' yida'nike'na Gotiyai dahilakakei Kiraazitiyai Jizaazalyira," sara diraginna wida'.

Anga Epazaazi Poli mwaalake'nesi.

19 ¹Kwaaka Giriza Anga Koridi Aapolizai mwaaidi'nyiyagaa' Eziya kwaakevaki mugunyaba Poli lo'mavamaryina yaka Anga Epazaazina yi'mavaawina ya'. Yi'mavaawina yaka Kiraazitiyari mididivita pwaraavi wijimaa'nyina yaka ²yiwaara'na ya' "Naangerina limwagesagaa' Gotiyare Kuryari damaarage'?" Yiwaara'na kya' "Aawa, Gotiyare Kuryarina nediwaanyai aaihwilaka? Kadika mu'nyadaanyainera," wide'. ³"Sahiri'na aaihwara yihyetavaka bavitaaziya sava?" yiwaara'na ya' Poli. Yiwaara'na kya' wide' "Jonimire bavitaaziyabwi neye'." ⁴Sara kude' Poli wida' "Kigaa' Joni wijiwaakina yada a'mwera mudikebwi yawiramaa'divi' bavitaaziya wiada Yizireliyareraavi wijiwaakina ya' 'Niminyi dividaa'nyi batherina jawiralimwagyila' Joni sara wijiwaakakei Jizaazalyira." ⁵A'mwera kadika sara wi'nyina kye' Naanga Jizaazare yaya'na bavitaaziya yina wia'. ⁶Bavitaaziya mena yina wiaka Poli kumire minyaginyangi ata dathiwanna kya' Kuryai Tewaanyai bulamwaaina kya' yagaala ge gengi

widina yeva, nabaai, Gotiyari wi'nawijiwaake! 7Wi'nawijiwaakesara yuyara sivilyiraai ata puridaasi pwaraalyarera yilaaya yesara.

8Juyaraavire lotuangevi Poli wilina yada lawe dikaai diki diraginna wijiwaakina yadei “Juyaraji Gotiyari widadivisaraji Gotiyai a'mweraavi maremwaaiderina wi'nipika!” daka wijiwaakina ya! 9Wijiwaakina kya' kiri' pwara myawiri yadivi' mu'nyi yeva yuyaraayaba Naangerebwina birala ye! Birala yina kye' Poli saraavire lotuangevi ya'ma'na yaka Kiraazitiyari mididivisaraavi makuna. Makuna yaka yirika yuyagaa' Tiraanazare wijiwaakiangevi Jizaazare yagaalya' wijiwaakina yakelyi. 10Wijiwaakina yada naangegaa' kwarama piriwaai wavila'daa'nyi sagaa' Kwaaka Eziya mwaalyara yuyara Juyaraji Menyaraji sara Naangere yagaalya' kadika wi'nyina ye!

A'mwe Sivaayare gawaalivaangeraavinesi.

11Gotiyai gannya diraginya' Polimina wijaavina kya' Poli nawi'nya kya' a'mwera atika maru'na'na yadiviki. 12Pwara aagizipiyaji kwaabihannyaji Polimire kilaakevi yewaa'bwa'nakengi makuna yeva nabalinakeraavi dathivalakina kye' nabalinakera tewaanya mwaalina ye! Nalaaya mena yiwina kya' nabaai pwaraavire munyikaavidaasi yimakera bwalyuna ye! 13Poli sara yadaa'nyiyagaa' Juyara kaanya yamaryadivi' yimakeraavi widaasadivisara pwara yawi'na “Naanga Jizaazare yaya'na yimakeraavi widasaana!” Sara yawi'na yesara yimakeraavi wide' “Poli wijiwaakivanikei Jizaazarine yaya'ne'na diraginna githaasima! ‘Dalyona!’ ” 14Sara widesara Juyai Gotiyarina mubithika yira'de naangei Sivaayare gawaalivaanga ata yuyi ata puridaasi pwaraalyarera. 15Sahwara sara kude' yimakei wida' “Jizaazari yawi'mwe' Polimina yawi'mwe' kiri' sarimi bewaililaka?” 16Mi'na kuda' a'mwei yimaka widei sahwaravai yarai pilawasi'naabina yaka diraginna tamina yaka kayaaka yigalaka dathiwanna ya! Dathiwanna kya' gamire angevi yarai bwalyuna yeva wa'wenakera kannyimaayara likaanya wina ye! 17Likaanya sara wina kye' sa'na Juyaraji Menyaraji Epazaazi mwaalyara yuyara kadika wi'nyina yeva lika dikwosi'na yeva “Jizaazai Naangelyira. Gamire yaya' naangesi. Gamire yaya' nayaa kavena daana!” dinyina ye! 18Nabaai savine'na Jizaazari limwagesara kayaa'nanyabwi yesa'na a'mweraayaba kunnya kayaa'nanyabwina widina ye! 19Pwara bulaasangiji kwalyangiji giri'nyangiji yadivisara kunnya pikariyikwiaji kunnya bukuyaji sanginebwi yida'nikengi makabina makabina yeva a'mweraayaba dika marira'na ye! Bukuya sangine nigwia ata gileva pwara dinyina ye! “Niwaava, kigaa' a'mwera kinaaya 50,000 mubesarera. Niwaava.” 20Kiraazitiyarera sara tewaanna kye' Naangere yagaalya' diraginya' yima'nyina kya' saba yunebanna a'mwe yuyara kadika wi'nyina yadivi' a'mwe kwalaalyara Naangerera yima'nyina ye!

Anga Epazaazi a'mwera kayaa'na yesa'nesi.

²¹ Sa yima'nakegaa' Kurya Tewaanyai Polimi nayaa kiyiwirya' Poli diraginna yawi'na “Piroviji Maazathoniya Piroviji Giriza kaanya yamarya'muji Anga Jeruzaalemina wideinyira.” Yawi'na yaka da' “Savina wawa'muji Anga Romina wanganaawidera.” ²² Mi'na daka Timotilyi Yirazitaazalyi saraai Gotiyare wawinya'na widaayadivisarajiyaraari widina “Maazathoniyana bwaanyila!” widaasina yaka Kwaaka Eziya pizi'gwa mwaalina ya'.

²³ Sagaa' Epazaazi mwaalya pwara Naangerebwina gamireraavi kayaa'na ye'. ²⁴ Sare' dare'nesi. A'mwe pwai Dimitiriyaazai silivaaya yavikarina yadelyi gamijiyaraji sara Kwaasi Naanga Aatemizavire ange'bita maalikengi yavikaryadivisarera. Pwara dara wanganesa' “Ai, silivaaya anga nawi'nya darika!” Deva nigwia naangeji mubina ye'. ²⁵ Nigwia naangeji mubadaapiji Dimitiriyaazai gamijiyaraaviji avaiiwawinya yadivisaraaviji wida' “Jikabyila!” Wi'na kuda' yikabina kye' wida' “A'mweihi, nemire wawinyavina nigwia naanga ma'daanyasira. ²⁶ Nayaa yawi'manigasaihilyi. Poli yivanike' tinna wangadivi' kadika wi'nadivisaihilyi. Dara wijiwaakivani' 'Naangeraavi sarinna asaji yavikaryesara gotiyara mika. Sabwi kwaasiyasi.' Wijiwaakada anga daviji Kwaaka Eziya yunebaji a'mwe kwala bwa'naanya naange' kadika wi'neva nemirebwi yagalya'maveva sabwi midimaniga'. ²⁷ Kwalaalyara sara yadaapiji Poli ayina widina widina kyoji a'mwe pwara nemire wawinya'na dinyina 'A'mwera sa yavikaryadivi' kayaa'nanaangesi,' dinipi'desi. Nabaai sa' gave' mika. Nemire Naanga Aatemizavire yileanga' yaasiwakanga' yima'nade' dingaka? Naangevire diraginya' waryaanya yima'nade' daaka? Naange' Kwaaka Eziya mwaalyaraji Kwaaka yuyavaki mwaalyaraji yilaaya yivanigasa' waryaanya' yima'nade' midaaka Aatemiza!”

²⁸ Kwala bwa'naanya' kadika wi'nadivi' “Aala!” didivi' sinna tika davina kwia' jaka naanga wide' “Aawa! Epazaazi mwaalyainaavire Aatemiza' diraginyasira.” ²⁹ Jaka naanga sara diwina kye' pwara anga yuneba jaka sara wide'. Jaka widadivi' Gaayaazalyi Aarizitaakazalyi saraari galalimwanna ye'. A'mwe saraai Kwaaka Maazathoniya mwaalyaraalyi. Poliji kaanya yamaryadisaraalyi. Saraari galalimwanna yeva yikabadivisabanna yarai makuna ye'. ³⁰ Makuna kye' Poli yawi'na “Kaanna wawa'muji kwala bwa'naanyavi widaawima!” Yawi'na kya' mididivisara limwanna yeva wide' “Arikawinyi. Nagirabithika! Dava mwaaidinneigi kave dimwaala!” ³¹ Nabaai, kwaaka savi maremwaaidivita pwara Polimi gya'mwera gaminyi yagaalya' widaase' “Poli, naange' githivanigo. Yikabadivisabanna mwidinnera!” ³² Kudaase' sagaa' kwala bwa'naanya sidu'maayara jaka kuna widina ye'. A'mwe kwalaalyara

“Sasare!na mwaaihosira,” majara yaasiwa'na mwaalina kye' pwara jaka ge' widadaapiji pwara jaka ge' dina dina ye'. ³³Jaka dina dina kye' Juyara Alekizaadari yagaala wijiwaakya'na wirivita'na kye' pwara kwaasi yawi'na ye' “Sarina jaka naanga divanigo.” Yawi'na yadaapiji Alekizaadai yawi'na “A'mweraavi Juyainaavina 'Nemi kayaa'na myadaanyainera,' wijiwaakima!” Yawi'na yaka a'mweraavi ata widathiwaga'. ³⁴Ata dathiwanna yadaa'nyi dara wanganesa' “Ai, a'mwe sai Juyai daaka! Saibisara nemire Naangevi kayaa'na dadivisara daaka!” Sara deva yuyara jaka naanga dina “Epazaazi mwaalyainaavire Aatemiza' Naangesira,” dina yadaapiji jaka naanga baziwawesara naange' (tu aawaaya) wavila'na ya'.

³⁵Divi a'mwe naangei Anga Epazaazi pikariyikwia yavikaryadei kwala bwa'naanyavi kuda' “Yagaala madipina!” a'mwera kave mwaaidapiji wida' “Epazaazi mwaalyaihi, a'mwe yuyara yawi'manigasa' Epazaazi mwaalyara Naanga Aatemizavire yileangesi sigunyavidaasi silaanga diraginya' bwalaryaakesi maremwaaidivisarera,' sara yawi'maniga' yuyara. ³⁶'Savi nebulya'na mika,' majivanigasare. Arikewi. Sarevidaa'nyi kave dimwaa'yila! Sidu'nakeihi kayaa'na mipinera! ³⁷Sare' dare'nesi. A'mwe daraari makabiwaasaraai Aatemizavire yileangevi kuka mipalamaryiwaala. Nemire Naangevina birala myiwaala! ³⁸Sarevidaa'nyi Dimitiriyaazalyi gamijiyaraji dinyina 'A'mwe pwari kotiya'na widaana!' dinyina yipija' kotiyagaa' a'mwe naangeraayawinna kwawapiji yagaainaka sali sahwaraji kamwaalapiji jawabwarakipi'dera. ³⁹Yagaala piri' warike' daakaji a'mwera nayaa kyikabapiji, saggaa' dizila! ⁴⁰Sare' dare'nesi. Dahaa' sara yivanigasa'na ga'maaniyara 'A'mwera kayaa'na yivanigasara daaka!' dinipi'jiwaava? Jaka naange' widivanigasaihirina naangera kanedapiji 'Baa'na divanigasaihilaka?' nemi gara widaaziwona! Aawano, nemi yagaala muji yaadeinera.” ⁴¹Sara widaka wida' “A'mweih sarinnya angengi diwila!” Kuda' kaanna wina ye'.

Kwaaka Maazathoniyana Kwaaka Girizana wawake'nesi.

20 ¹A'mwera kayaa'na yesagaa' wavila'na kya' mididivisara yikabya'na Poli pwaraavi widaasina ya'. Widaasina kya' mididivisara yikabina kye' yivaimwagya'naji dihaa'bwasa'naji yagaala widaka wida' “Kaanya widera. Tewaanya dimwaa'yila!” Mi'na widaka Maazathoniya sawinnei ya'ma'na ya'. ²Ya'ma'na yaka kwaaka sangi yagaala naanga a'mweraavi diraginya' dihaa'bwasa'na wijiwaakada kaanya yamarina ya'. Kaanya yamarina yaka Kwaaka Girizana yi'mavaawina yaka ³saba lawe dikaai disa wavila'daasi mwaalina ya'. Mwaalina yaka “Sipiya' Kwaaka Siriyana nyimakwoder,” yawiraka dara wi'nake' “O, Juyara Polinyi nyiramakipi'dera daaka!” Sara daka “Maazathoniyana ayina wilaawideinyira.” ⁴Yawi'na kya'

gamiji Sopaatai Piraazare gawaali' Beriya mwaalyalyi Tezalonaatika mwaalyaraai Arizitaakazalyi Sekaadazalyi saraalyi Devi mwaalyai Gaayaazalyi Timotilyi Kwaaka Eziya mwaalyaraai Tikikaazalyi Tiropimaazalyi saraalyi wina ye'. ⁵A'mwe ati ata puridaasi pwaralyara sinnawi waanyina yeva Anga Tirawaazi neminyina yemwaaina neye'. ⁶Yemwaaina neyadaapiji Munne Girikula liwinya pamidakina myadehaa' mena wavila'na kya' sagaa' Anga Pilipaa'i sipiyavi yilamwaaina kyo sawita atina wavila'daa'nyi sipiya' nemakwawa'. Mi'na kanemakwawa' Anga Tirawaazi yemwaalesaraavi wijima'naawina yona yirika ati ata puridaasi pirikaai kanevilava' mwaalina yo.

Aayagaa' Anga Tirawaazi Poli angyiri'maata yake'nesi.

⁷Sagaa' wikiya mudike' yima'nyina kya' Naangeri dinya'neraji yikabina yona girikula gunyina, nyina yo. Wapaaya tivi nyina kyo Poli a'mweinaavi wijiwaakina neya'. “Mwanyavi kaanya widera,” daka wijiwaakina wijiwaakina kya' kalawawe' yima'nyina ya'. ⁸Anga sa' minye dawaai dasa' laannikevi ku'dika munyabanyavi wilamwaaloba di'baaka naanga warakeba. ⁹Di'baaka naanga warake'naji Poli yagaala naanga kuna widake'naji Miginya Yutikaazai widiwaayaba yilamwaaina yaka se'na naanga winyina kya' amamaze waraka munya ke'bevadaasi kwaakevina bwalabaihi'nyina ya'. Bwalabaihi'nyina kya' pwara yarai walaawina yeva dara wanganesa' “O, baryai daaka!” ¹⁰Sara kade' kiri' Poli walaawina yina yaka gaminyi maramujire'na yaka pwaraavi wida' “Kinna madipinera! Sare' dare'nesi. Kwaihwainakei mwaali'. Mabaihi'nyiwa!” ¹¹Widaka anga munyabanyavina ayina yilaawaka wapaaya gunyina yaka nyina ya'. Mi'na nyina yaka yagaala pini widina yaka yirika mi'na purakegaa'na ya'ma'na ya'. ¹²Ya'ma'na kya' pwara miginyai balaka ayina dikaavakeri gamire angevi mare'na yeva yilaaya yina yeva mwaalina ye'.

Anga Tirawaazidaasi Anga Maalitaazi sawinnesi.

¹³Poli neda' “Sipiyavi kwawapiji kwaakaanya wawa'muji Anga Aazozina yihizima'naabideinyi.” Nedakei wina kya' sipiyavi yilamwaaina kyo Anga Aazozina sipiya' makuna neya'. ¹⁴Makuna kaneya' Anga Aazozii Poli newira'nijimaa'naka sipiyavi yilamwaaina kya' Anga Mitilina nemakwawa'. ¹⁵Sabadaa'nyi nemakwawaka yirika pirivi Ahu'manna Kaayozii wawilavaka yirika pirivi Ahu'manna Semozina nemakwawaka yirika pirivi Anga Maalitaazina yi'mavaawina ya'. ¹⁶Sare' dare'nesi. Poli neda' “Jeruzaalemi yarai wawa'muji Munne Pedikoziyagaa' saba mwaalideinyi dingaka? Piroviji Eziya naangegaa' mwaalina mwaalina myiwijainyi Anga Epazaazi wawilavaadera.” Nedakei Maalitaazina yi'mavaawina yo.

**Epazaazi mwaalyara Kiraazitiyareraavire
naangeraavi widake'nesi Poli.**

¹⁷Maalitaazidaasi Epazaazina yagaalya' widaasina ya' "Naangeihi, Kiraazitiyare kusilaanyaviyara Epazaazi mwaaihasaraavi maremwaaividivisaihi jikabyila!" ¹⁸Sari widaasina kya' a'mwe sara bina kye' wida' "Yirika aayagaa' Piroviji Eziyana gaai bena yuyagaa' saba mwaaideryagaa' sarimiji mwaalena yuya sabwi yeinyina yawi'mwaava. ¹⁹Nabaai, Naangere wawinya' widaayadinyainyi diraginna yena 'Nimi maalikeinyi,' dadi a'mwera kayaa'na kanye' nimi kinna daheinyira taanga nyadaasina. Juyara yawi'na 'Polimi tamakaana!' yawi'na yeva kayaa'na kanye' taanga naanga nyake'na yawi'mwaava. ²⁰Yuya kadika wi'nipija'na sariminyi yihigaimwanga yuya sara yihiziwaake. Yagaala pini mwarika. A'mweraayaba yihiziwaakadi sarinnya angengi yihiziwaake'na yawi'mwaava. ²¹Juyaraaviji Menyaraaviji avaina nayaa wijalikurake. Sarinnya kayaa'nanyabwi marasi'napiji Gotiyarebwi yawiramaarapiji Naanga Jizaazari dilimwagyila! Sara myi yapiji Dikevi namwaaibithika! ²²Sara kude dahaa' Kuryai Tewaanyai sara kanyidiwa'di' 'Jeruzaalemina diwona!' yithaanyi, wila nyiwiyinikeinyi sara yivanige saba niminyina pwara nyipi'de'na myawiryivanigeinyira. ²³Gave piri'na yawi'mwa. Anga yuyangi wa'mwa'dezi Kuryai Tewaanyai diraginna nyida' 'Kalavuzangevi gimwaahipi'de'nanyi. Giminyina kayaa'na yipi'de'nanyi,' sara yawi'mwa. ²⁴Dara wangamanige' 'Mwaaihe'na maalike' daaka!' Nimore kilaakeji'na myawirivanige. Naanga Jizaazai nyidaasake'naji Naangei gannya wawinya' kanyijaava' sa' yuya yide'naji yawi'manige. Wawinya sa' yagaala tewaanya' jalikurakya'ne' 'Gotiyai a'mweraavi yange'na wigaimwagathelyi,' widadinya'ne' nimore wawinya sasaresira.

²⁵Sariminyaba kaanya yamaryegaa' Gotiyai nemaremwaaide'na tewaanyabwina yihiziwaakage. Yithaanyi, dahaa' dara yawi'mwa. Dividaasi aane pwaigi kwaigi tinna manyanganyi jitheiginyi. ²⁶Sarevi dahaasagaa' nebulya'na yihizalikulakima! Ginnya kuryari marasi'naja' gimire tawevina nimore' mi'. Aawa. Gimiresi. ²⁷Sare' dare'nesi. Gotiyai yade yuyanginaji gamire simunyavinaji yihitheinyi. Yagaala piri' lika myulyakye. ²⁸Mala nayaa jiwannyila! Sarinnya kuryaraavi nayaa maremwaaaina jila! Nabaai, Kuryai Tewaanyai sarimire wawinya' kyihizaava' sare'na Naangereraavi sipizipiyaraavi nayaa dimaremwaalyila! Sipizipiyaraavi maremwaaividivisara maremwaaividitabaabi! Gotiyare kusilaanyaviyaraavi nayaa dimaremwaalyila! Jizaazai gannya gawaali' kabala' Gotiyai Kiraazitiyareraavi mubina ya'. Naangere tawesi mubina ya'. ²⁹Dara yawi'mwa. Kaanya kwawa'muji sariminyabanna a'mwera kavijilikerabisara bapiji sipizipiyaraavi kayaa'na wipi'derera. ³⁰Divi

sarimijiya pwara yawi'na 'Jizaazari mididivisara gevвина nyimidibika! Mwagi'namaarima! Yawi'na yapiji daavina yapiji kwaasi yagaala widipi'de'nanyi. ³¹Savine'na nyipidika! Mala nayaa jiwannyila! Dara jawirila! 'Kwarame dawaai dasa wavila'daasi yirikeji sawisaji Poli nimore kuryarina kinna daka nemijiya pwari kwari nayaa nejiwaaka!'

³²Dahaa! Gotiyare asirina yihimwaaihivanige. Gotiyai a'mweraavina yange'na wigaimwadere yagaalya'na tewaanya yihimwaaihivanige. Sigunyavi Gotiyai diraginyaihiri yihimwaaihade'na sarimiji pwaraavi Gotiyai dahilakakeraavi kayaa'nanyanna duimwagasi'nakeraji gannya yuya tewaanaanga yihizaavadengira. ³³Aane pware kware nigwiaji kwaabihannya baazi'ma'nya sazaji wabarinna mwanganyeinyira. ³⁴Arikewi, sarimi saihi mi'na nyawi'mwaava. Ninnya asilyi yina yina yena nigwia maarena niminyineji Gotiyare wawinya yadaanyaraavineji mube'na nyawi'mwaava. ³⁵Yuyagaa' sara ye'na yihiziwainyawaaiheinyi. Nimi sara yebwina jila! Diraginna yapiji nigwiaji asilyi a'mwe waryaanyaraavi duhaimwagyideihilyi. Savina sinnawi Naanga Jizaazai neda! 'Pwara daapina yipi'de'na yilaaya maalika yadivi' tewaanya winadere. Pwara yanga wijaavipi'de'na yilaaya naanga yadivi' tewaanaanga winade'nanyi.' Sara nedake'na nayaa jawirila!"

³⁶Poli mena widakegaa' kumiji gamiji kwadaai gilina kye! Gotiyari yagaala wida'. ³⁷Mi'na kuda' kinna deva galamuji'na yeva yilaaya marina ye!. ³⁸Gannya yagaalya' "Dividaasi tinna mwanganyi dinyideihilyi," widake'na kale wia!. Kale wiadaa'nyi sipiyavina gaminyi yenaasina yesare.

Anga Jeruzaalemina Poli wawake'nesi.

21 ¹A'mwe naangeraavi ya'ma'na yona sipiyavi yilamwaaina kyo sipiya' makuna neyaka Ahu'manna Kozina yida'na nayaa makuna neya!. Makuna neyaka yirika piriwi Anga Rozina yi'mavaawina yaka sabadaasi Anga Pataarana makuna neya!. ²Makuna kaneya' dara wangano! "Kwaaka Piniziyana sipiya piri' wawade' daaka!" Sara dona sipiya savi yilamwaaina kyo makuna neya!. ³Makuna neyadaasi Ahu'manna Saaipiraazi tinna wanganna kyo pimagi kwanaamimagi wavila'na yaka Kwaaka Siriyana makuna neya!. Anga Taayaa saba gilyivita yuya sipiyavi wa'di'nyiya wakya'na sabanna makuna neya!. Makuna kaneya' Anga Taayaa sipiyavidaasi bwalaawina yo. ⁴Bwalaawina yona Jizaazari mididivita pwaraavi birina yona kuminyaba wikiya piri' mwaalina yo. Saba mwaalina yadozi Kuryai Tewaanyai Taayaa mwaalyaraavi Polimina pwara kayaa'na yipi'de'na wijiwaainyina kya! sahwara Polimi wide! "Jeruzaalemina yilaawina minnera!" ⁵Sara kude' kiri' kaanyagaa' wikiya' mena wavila'na kya' ya'ma'na yoinera. Angaba mwasabanna Kiraazitiyarera a'mweraji kunnya a'mweji kunnya

kaimiraayaji yuya makuna neye!. Makuna kaneye' aalimaangebaari kwadaai gilona Gotiyari widina yo. ⁶Mi'na widina yona dinyina “Nemireihi tewaanna diwila!” Dinyina kyo sipiyavi yilamwaaina kyo kunnya angengina wina ye!.

⁷Anga Taayaa sipiya' ya'ma'na yaka Anga Tolimezina kuna makuna kaneya' Kiraazitiyarine neya'mweraavi ata bwa'nona kuminyawi sawita pirivi se wa'mwa'na yo. ⁸Se wa'mwa'na yona sipiyavi yilamwaaina kyo saba ya'ma'na yaka Anga Sizaariyana yi'mavaawina ya'. Yi'mavaawina kya' Jizaazarina yagaala tewaanya' widadei Pilipimire angevi wawona saba wa'mwa'na yo. Jeruzaalemi a'mwe atina ata puridaasi pwaralyaraavi dahilakesalyi Pilipi. ⁹Gamire sidiraaya dawaai dawaalyangi kwala mamaa'nya Gotiyari wi'nawijiwaakesangira. ¹⁰Saba mwaaidozi yirika pini wavila'na kya' Aahavaazai wo'nikei Kwaaka Juthiyadaasai walaabina ya'. Walaabina yakei Gotiyari wi'nawijiwaakadelyi. ¹¹Walaabina yaka neminyawinna bina yaka Polimire munnaanya' maarina yaka gannya asiraalyi gannya sivilyiraalyi sangi marayegipwiyinyina yaka wida' “Kuryai Tewaanyai kanediwakira ‘Munnaanya davire gyakwari Jeruzaalemi Juyara dara marayegipwiyapiji ajimya yuyangiyaraavire asiraavi marimwangipi'delyira.’ ” ¹²Sara kuda' kadika wi'nona nemiji saba mwaalyaraji saina kinna dona Polimi wido, “Jeruzaalemina milaawinnera!” ¹³Sara kudo sai neda' “Be'na yivanigataihilaka? Kinna sara kanyimarediwaa' kale naanga nyiwake'na be'na divanigava? Sare' dare'nesi. Jeruzaalemi kalavuzi pwiya nyipi'de'na nimi diraginna mwaihe. Sa' wikira. Nabaai Naanga Jizaazarine yayavina nyiramakipi'de'na diraginna mwaiheinyira.” ¹⁴Sara nedaka kuna diraginna yawi'na kya' yagaala pini ayina muji yona widina yo, “Gotiyai simunyavi yawirade' sara yima'nana!”

¹⁵Sizaariya saba mi'na mwaalina yona nemire gilyivisa yovirawakina yona Jeruzaalemineina ya'ma'na yo. ¹⁶Kiraazitiyare mididivisara Sizaariya mwaalya pwaraji yilaawina yona Minezonimire angevina makwina kaneye' mwaalina yo. A'mwe Minezoni Ahu'manna Saaipiraazidaasai sinnawi sagaa' Kiraazitiyari midinyaakelyira.

Poli Jemizari angyiri'maata yake'nesi.

¹⁷Jeruzaalemina yi'mavaawina kyo neya'mwera tinna wanganna neyeva yilaaya nemarye!. ¹⁸Yilaaya kanemarye' yirika pirivi Poliji nemiji Jemizari tinna wanganya'na wina kyo Jemizai mwaalakeba Kiraazitiyareraavire a'mwe naangeraji mwaalina ye!. ¹⁹Mwaalina kye' Poli “Nya'mweih!” widaka gannya wawinyavina ajimya yuyangiyaraayaba Gotiyai yake yuyanna wida'. Mi'na kuda' kadika wi'nyina yeva Gotiyarina “Byaannakeigi!” yilaaya yina ye!. ²⁰Yilaaya yina yeva Polimi wide' “Neya'mweigi, davanna nayaa

yawi'maniginyaiginyi. Juyara kwala naange' Naangeri limwadivi' nabaai, Ne Mozizare Kiwinya diraginna limwamanigasare. ²¹ Sahwaraavi pwara giminyina kwaasi wide' 'Poli ajimya yuyangiyaraavireba Juya yuyaraavi wijiwaaka' "Mozizare Kiwinya' dasi'nyila! Sarimire kaimiraayaraavire kilaakeji' madapinera! Juyaraavirebwi mipinera!" ' ²² Sara kwaasi kude' dara wi'nipi'de' 'Davanna Poli ji'ma'mwaabika!' Sara dapijiyavidaa'nyi gara yaadeinaavaka? ²³ Sarevidaa'nyi githaade' ja! Nemirera daraai daraalyara Gotiyari diraginna wija' kininnakera kigaa' widesa' sara yipi'derera. ²⁴ A'mwe saraavi makwo'gizi kumiji Juyainaavirebwina girika maayaigi yima'nya'na baaka mwadana! Kuminyine nigwia kwaka'gizi kunnya mijata da'nipi'dengira. Sara kya'gizi a'mwera tinna gwanganapiji dara yawipi'de' 'O, pwara Polimina yuya nedeta kwaasi yagaalya' daaka! Gami sahwai Ne Mozizare Kiwinya' nayaa yivanikei damwaalika!' ²⁵ Sara widipi'de' kiri' ajimya yuyangiyara limwadivisaraavina paaziya' mena widaaso. Pikarya dara yavikarinike' 'Nemi mi'na yawi'mwo' "Nyilyariji Laweriji pwaraaviji wijaavipija miwita wapaaya maninna! Yisaraavine wapaa yilaaya'ne maninna! Tawe maninna! Yikuriyaawia giraabimwannike tawanake mavireninna! Ata limwagya'nebwi minnera!" sara wido,' " wide'. ²⁶ Mi'na kude' yirika piriwi Poli a'mweraavi makuna kya' kumiji girikita'nanya wasi'nya'ne yina ye'. Mi'na kye' Gotiyare Angevi wilaka Gotiyarina mubithika yira'divisaraavi wida' "Wikiya mena kwavilavoji a'mwe dara girikita'nanya wasi'nya'ne yuna kyima'noji sagaa' pwai sipizipiya piri' wakina. Pwai piri' wakina, yuyaina Gotiyarina wakaadengira."

Gotiyare Angevi Polimi wila pwiyesa'nesi.

²⁷ Yirika atina yaka ata puridaasi piriwaalyagaa' aya kigaa' mena kwavilava' Gotiyare Angevi Juya pwara Kwaaka Eziyadaasara Polimi tinna wanganna ye'. Tinna wanganna yeva "Aakai, aakai," kude' kwala bwa'naanya' yarai yikabina yeva yuyara jaka dina yeva gaminyi asaji galalimwannana ye'. ²⁸ Gaminyi galalimwannana yeva jaka wide' "Yizireliyahi, dinegaidaayila! A'mwe dai yuyaba kaanya yamaryada yuyaraavi wijiwaakina 'Yizireliyara kayaa'nanyarera. Mozizare Kiwinya' waryaanya'nesi. Gotiyare Ange' tewaanya' mi'ka,' sara wijiwaakadelyi. Nabaai, daha' Gotiyare Angevi kayaa'nanaangei Menyara pwaraavi makulaabina yaka sara kayaa'na kyawa' nemire Anga tewaanya' girikita'nanya' yima'niwakesi." ²⁹ Widesa' dare'nesi. Pigaa' angeba Jeruzaalemi sahwaru Polimiji Tiropimaazai Anga Epazaazi mwaalyariji tinna wangesara kwaasi dara yawiresa' "O, Gotiyare Angevi Poli Menyari bamakwimwakei daaka!" ³⁰ Sara kude' Jeruzaalemi mwaalyara yuyara jaka dina yeva yarai yikabina yeva gila'mwannemwaaaina yeva gaminyi galalimwannana yeva Gotiyare Angevidaasi mwasawinna

mwagi'namaa'na ye! Mwagi'namaa'na kye' sagaa' kaanyangi yarai tih'i'na ye! ³¹Yarai tih'i'na kye' kwala bwa'naanya' tamakya'na sahwari tamina yadaapiji pwara Romiya aawilasaraavi maremwaaide naangeri yagaala widaase! "Yarala! Jeruzaalemi mwaalya yuyara jaka dina, mala tannivanigava." ³²Sara kudaase! maremwaaide naangei gannya aawilata maremwaaidivisaraji aawilata kwalaalyaraji yarai makuna yaka kwala naangeyawinna yarai walaawina ya! Walaawina kya' a'mwera gamiji gamire aawilasaraji saraavi tinna wanganna yeva sahwari ayina muramyi ye! ³³Ayina muramyi kye' aawilasaraavi maremwaaide naangei Polimyawinna wina yaka limwanna yaka gannyaraavi wida' "Seniyabaraalyi divwiyla!" Widaka kwala bwa'naanyavi wida' "A'mwe dai aihwalaka? Beri' yiwakalaka?" ³⁴Kwala bwa'naanyavi pwara yagaala piri' jaka kude' pwara yagaala ge' ge' jaka widina yesare. Avaalyagaa' jaka dina dina yadaapiji Poli yake'na naangei kadika mu'nyi yaka gannyaraavi wida' "Nemire aawilasainaavire angevina a'mwe dari dimakilaawila!" ³⁵Kuda' yitaavakulayaba makuna yeva a'mwera Polimi tamya'na besa'na aawilasara Polimi marikwawalimwanna yeva makuna ye! ³⁶Sare' dare'nesi. Kwala naanga yuya' midinaabina yeva jaka naanga wide! "Tamakaana!"

Gannyabwina Poli widake'nesi.

³⁷Aawilasaraavire angevina Polimi makwodaapiji tikuryayaba sai aawilasaraavi maremwaaide naangeri wida' "Githiwijainyi daaka?"

"O, Girikiyagaala dadinyaigi daa?" naangei yiwaaravaka ³⁸wida' " 'Kigaa' Kwaaka Yizipi mwaalya sai "A'mwera kwaaka maremwaaidivisaravi yirawasaana!" daka a'mwamaayawinna yikamaanga kwalaalyara (4,000) kili'nakeraavi makuna yakei daaka!' sara yawi'mwana." ³⁹Poli wida' "Aawa, Juyainyi sahwainyi Kwaaka Siliziya Anga Taazazi mudanga nyimaarakeinyi. Anga naangeba mwaalyainyira. Nya'mweigi, 'A'mwe daraavi duthana!' kanyida'giri widideinyira." ⁴⁰A'mwe naangei "Wikira," kuda' sahwai yitaavakulyayaba yiladaa'na yaka gannya asi a'mweraavina bathamakina kya' a'mwera yagaala majara kave mwaalina kye' Yiviruyagaalya' wida' **22** ¹"A'mweih, nya'mweihilyi nimaamaangeihilyi, yadinyainyirebwi yihithide' kadika dinyu'nyila!" ²Yiviruyagaalya' widakevi kadika wi'neva kadika nayaa wi'nabala'na yina yadaapiji piniji wida'

³"A'mweinyi Juyainyi. Kwaaka Siliziya Anga Taazazi mudanga nyinaange' nyimaarake' kiri' Jeruzaalemi davanna yilaabena giryadaaveinyira. Dava a'mwe sidu'nakei Gameliyali wo'nikei nyijiwaaka! Nyijiwaakada nemire Ne sinnawinyaraavire kiwinya diraginna wijiwaakina. Wijiwaakina kanya' dahaa' dava mwaahasaihi Gotiyare yagaalya' nayaa limwadivitabaabi' sahwainyi limwanna ye. ⁴Sareinyi a'mwera sabwi mididivisaravi kayaa'na

yina ye. Kayaa'na yina kye pwara balina ye! Pwaraaviji piningiji ata pwiya yena kalavuzangevi yarai wimarimwangina ye. ⁵Nebulya'na yihithivanige. Gotiyarina Mubithika Yira'de Naangelyi Kaajoliya yuyaraji yihithivanige! nyijalikurakyipinera. Nimi saraavi kude naangera nyigaimwagesara Juya neya'mweraavi Damaazikazi mwaalyaraavina paaziya' yavikarina yeva nyijaave!. Sara yeva nimi yebwi yihithipi'desira. Paaziya' kanyijaave! 'Sawinna a'mwe dara sabwi limwaga'divisaraavi seniyabaraji pwiya'muji "Daanga naanga wivinana!" da'muji Jeruzaalemi ayina makabideinyi,' dena sawinna wina ye."

Poli Kiraazitiyarei yima'nake'nesi.

(Apozeliyara 9:3-19; 26:12-18)

⁶Poli wida! "Kuna wodinyagaa' sirigwajahaa' Anga Damaazikazi aya kibanna badaazi sigunyavidaasi baaka naange' yarai mwadina nya'. ⁷Yarai mwadina kanya' kwaakevakina wala'na kye maanguraaya' nya' 'Soligi, Soligi, kayaa'na be'na nyivanigina?'

⁸'Naangeigi, aaihwaignaka?' 'Jizaazainyi Naazareti mwaalyainyi kayaa'na nyivaniginyainyi,' nyida'. ⁹A'mwera nimiji wawesara baaka naange' tinna wanganeva maanguraaya' nyakevi myu'nyesarera. ¹⁰Nimi yiwaara'na ye, "Naangeigi, beri' yijiwana?" Sara yiwaara'na kye Naangei nyida' 'Daava'gizi Damaazikazina diwona! Saba pwai Gotiyai giminyina gyawi'mwake' yuya' githathera.' ¹¹Kanyida' baaka naange'na tibaryainyi pwaraji wawora nimore asiri nyimaareva Damaazikazina yibwaramakuna nye!.

¹²Saba a'mwei Ananaayazai wo'nikei mwaala!. Sai nemi Juyainaavire Kiwinya mididelyira. Juyara Damaazikazi mwaalya yuyara sarina jalikurakidiviki 'A'mwe tewaanaangelyira.' ¹³Mwaalakei niminyawinna bina yaka niminyaba daavina yaka nyida' 'Nya'mwe Soligi, tinna ayina dangana!' Sara kanyida' sagaa' tinna tewaanyaraai yarai yenyina yena sari tinna wanganna ye. ¹⁴Tinna wanganna kye Ananaayazai nyida' 'Ne sinnawinyaraavire Gotiyare simunyavina jawi'de'na Gotiyai giminyi sinnawi dahilaka!. Gannya Yida'maraangeri tinna dangade'naji gannya maanguraayavi githathe' kadika du'nade'naji sinnawi githahilaka!. ¹⁵Divi gamire yagaalya' duthatheiginyi. A'mwe yuyaraavi tinna wangamwaanyaji kadika wi'niwaanyaji sa duzalikurakideiginyira. ¹⁶Sare'na dahaa' be'na jemwaaijiwaana? Gimi daava'gizi giminyi bavitaaziya gyideiginyi. Jizaazarine yaya' kuda'gizi gimire kayaa'nanyangi marasi'nadelyira,' nyida' Ananaayazai.

Gotiyai "Poli Menyaraavi widathelyi," widaasake'nesi.

¹⁷Jeruzaalemina ayina bina yena Gotiyare Angevi Gotiyari dadi a'mabaaitinna dara wangane' 'Naangeri dangamwana!' ¹⁸Sara kade

a'mabaalyavi Naangei nyida' 'Yarala, niminyina duzalikurakide' dava mwaalyara mamaari gyipi'de'na Jeruzaalemidaasi jahalya'maka!

¹⁹Nimi wide. Naangeigi, mena nyawi'mwaava. Lotuangengi wawena gilimwadivisaraavi kalavuzangevi marawimwaihena naanna wiramenna sara yawi'mwaava. ²⁰Nabaai, Sitiveni giminyina wijalikurakaderi tamakadaapiji saba nimi sainyi mwaalena tamakya'na yilaaya yadi wiramesaraavire yivisangi maredaavena. ²¹Sara kude Naangei nyida' 'Diwona! Nimore yagaalya' wijiwaakya'na githaasidera ajimya yuyangiyaraavina.' ”

²²Poli widadaasi a'mwera kadika nayaa wi'nyina kye' yagaala Menyaraavine! kadika wi'nyina yeva jaka naanga dina ye! “Tamakaana! Kwaaka davaki a'mwei sareri marasi'nannelyi. Sare' dare'nesi. Gaala mwaalannei mwaalade' tewaanya'na mi!” ²³Jaka sara dadivi! kunnya yivisaji puraki'na yeva tiryasa maarina yeva yilamarasi'naawina ye! ²⁴Yilamarasi'naawina kye' Romiyai aawilasaraavi maremwaaide naangei yawi'na “Juyara a'mwe sarine jaka kayaa'nanya' be'na divanigava? Sare'na sari tamaana!” daka gamireraavi naanga wida! “Kaavilya' be'na divanigava jakeva? Angevina yarai makwopiji wilyabaalyi duramyila sare'na!” ²⁵Kuda' aawilasara Polimi tamyana pwiya kye' sai aawilata maremwaaidei daavakeri wida! “Sarimire kiwinyabwi jivanigava? Romiyari kotiya' myivanigasari wilyabaalyi duramyide'na sarimirebwina daaka?” ²⁶Sara kuda' aawilata maremwaaidei yarai wina yaka aawilasaraavi maremwaaide naangeri yiwaarava! “Be'na yivanigina? Sare' dare'nesi. Sai a'mwemili' mika! A'mwe sai Romiyala!” ²⁷Maremwaaide naangei kadika sara wi'nyina yaka Polimiyawinna yarai wina yaka yiwaara'na ya, “Nyidana! 'Romiyai daaka?’ ” Yiwaara'na kya! “Yayo,” wida' Poli. ²⁸Sara kuda' maremwaaide naangei wida! “Nigwia naanga naanga wakena Romiyainyi yima'ne.” Sai wida! “Nimi sainyire nimaamaangei Romiyai kyima'na' nimore mudangegaa' Romiyainyi yima'nyina ye.” ²⁹Sarevidaa'nyi yime'nya'bi' a'mwera yawi'na “Polimi tamaana!” yesara gaminyawidaasi ayina sara wina kye' aawilasaraavi maremwaaide naangei yawi'na “Poli, a'mwe Romiyalyi. Sa'na myawiriwe tamyana nimi sahwari pwiyiwa. Aakai!” yawi'na yaka lika yina ya!

Kaajoliyaraayaba Poli daavake'nesi.

³⁰Aawilasaraavi maremwaaide naangei yawi'na “Juyara Polimina 'Sai kayaa'na sara yiwakelyi,' nyidipi'dewwi kayaa'nanyabwi yawirima!” Yawi'na yaka yirika pirivi Polimi seniyabaraai yaarina yaka yagaalya' Gotiyarina mubithika yira'divita naangeraji Kaajoliya yuyaraji saraavi “Jikabyila!” widaasa! Sara widaasaka gaminyi makwalaawaka kuminyabanna walamaredavaawina ya!

23 ¹Poli Kaajoliyaraavi tinna diraginna baihanaraka wida' "Nya'mweihi, kigaasi dahaasi yuyagaa' Gotiyai nyangadaasi nimire simunya padaihirakyavi dara yawi'di 'Gotiyarina nimirebwi tewaanyabulyi,' sara yawi'dinyainyi." ²Mena kuda' Gotiyarina Mubithika Yira'de Naangei Ananaayazai Polimyaba daavesaraavi wida' "Gamire maangeburi diramyila!" ³Poli wida' "Kwaasi yadinyaigi kurika kayaa'nanya pewinakeigi Gotiyai giramadeiginyi. Saba Kiwinyabwina kotiya walamwaalagina niminyina 'Diramyila!' diwaanya'na Kiwinyaburi kayaaka yigaimwaana." ⁴Sara kuda' a'mwera gaminyaba daavesara wide' "Gotiyarina Yira'de Naangei Gotiyareri birala yiwaana!" ⁵Sai wida' "Nya'mweihi, Gotiyarina Yira'de Naangei mwaalikerina myawiriwe sa'na widiwa. Dare'nesi. Gotiyare bukuya' dinike! 'Yagaala kayaa'nanya' gimire a'mweraavi maremwaaidarina madinnera!" wida'.

⁶Sahwai dara wanganake! "Ai, Kaajoliya pwara Periziyara mwaaidapiji pwara Sazuziyara damwaaihava!" Sara daka Kaajoliyaraayaba jaka wida' "Nya'mweihi, Periziyainyi. Periziyaraavi kuvibwaalivaangeinyira. A'mwe baryara divi dikaapi'dewwina yawi'dinyainyina dava kotiya' nyawibwa'manigasainyira." ⁷Sara kuda' Periziyaraji Sazuziyaraji maanga dineva Kaajoliyara jaapainyina ye'. ⁸Sare' dare'nesi. A'mwe Sazuziyara dadiviki "Baryara kwaihwainakera madikaayi yipi'derera. Ejeliyara mamwaalyiga'. Kuryara mamwaalyiga'." Sara dadivi' kiri' Periziyara dikaasa'naji ejeliyaraavinaji kuryaraavinaji widadivisarera. ⁹Sare'na maanga dinyina ye'. Maanga kuna dinyina yeva jaka naanga dinyina dinyina kye' pwara Periziyaraavi Kiwijara daavina yeva diraginna wide' "A'mwe dai kayaa'nanyai mika! Kuryai dahawidaka? Ejeliyai dahawidaka?"

¹⁰Maanga naange' yima'nyina kya' aawilasaraavi maremwaaide naangei "Akai, Polimi nagalampiripalakipidika!" daka Polimina lika yaka aawilasaraavi diraginna wida' "Yarala, a'mweraayabanna walaawapiji kuminyidaasi sawhari maarapiji aawilasaraavire angevina dimakilaawila!"

¹¹Sagaa' sawisavi Polimyaba Naangei daavaka wida' "Diraginyaigi jima'nana! Sare' dare'nesi. Jeruzaalemi dava niminyina nayaa wijalikurakaginyabaabi! Anga Romi menyaba avaaina duthatheiginyira."

"Polimi tamakaana!" widesa'nesi.

¹²Mwanyavi Juya pwara yikabeva jamungajakina yeva dine' "Gotiyarina diraginna divanigo. Poli mwaaidori nemi wapaayaji aalyasi manyi yaadeinera. A'mwe sari mi'na tamakawaaji dividaasi naadeinera. Sara mi kyawaaji Gotiyai Dikevi nemarasi'nanneinera."

¹³A'mwera sara dinesara a'mweraare ata sivilyiraalyaraji (40) pwaraji mwaalesarera. ¹⁴Mi'na dineva Gotiyarina mubithika yira'divita

naangeraji a'mwe naangeraji saraayawinna waweve wide! "A'mwe yuya daina Gotiyai kadika newi'nadaasi diwo. Wapaaya manaanneina Polimi tamakaadeinera. Sare! 'Gotiyai Dikevi nanemarasi'nadika!' diraginna dona nebulya'na yihithiwo. ¹⁵Sara dovidaa'nyi sarimiji Kaajoliya pwaraji Romiyai aawilasaraavi maremwaaide naangeri kwaasi yagaalya' duthaasila! 'Polimi yagaala pini widaathe'na neminyawinna dimakwalaabidelyira.' Kiri! makwaidavadaapiji lika yulyarawaaji sahwari karamakawaaji davanna mwalaabi yadelyira," wide!.

¹⁶Polimi gya'mwevire gawaali' kadika dara wi'nake! "O, Juyara aapyari tamakipi'dei daaka!" Daka wawaka aawilasaraavire angevi wilaka savina Polimi widithaakuna. ¹⁷Sara widithaakuna kya' sai aawilata maremwaaide pwari jaka wida' "Kaajo!" widaka wida' "Ginnya maremwaaide naangeryawinna miginya dari dimakwona! Sare! dare'nesi. Yagaala piri' widithaakwadelyira." ¹⁸Sarevidaa'nyi aawilata maremwaaide aawilasaraavi maremwaaide naangeryawinna jivwaramakuna yaka wida' "Poli, kalavuzai jaka nyidaka nyidiwa' 'Miginya dai yagaalyavi widathe'na ginnya maremwaaideryawinna dimakwona!' " ¹⁹Sara kuda' maremwaaide naangei miginyare asiri maaraka saraai gaveraai mwaaidakilyiyabanna jivwaramakuna yaka yiwaara'na ya! "Be yagaala dinyidithaakwidevaka?" ²⁰Miginyai wida' "Juyara mena yawireva mwanyagaa' yaamiji gyiwaarapi'de 'Kaajoliyara Polimi yagaala pini nayaa wi'nipi'de'na Kaajoliyaraayawinna dimakwalaawa!' ²¹Sara gyiwaarapi'de' kiri' kadika mu'ninnera! Sare! dare'nesi. A'mwera a'mweraare sivilatiraalyara lika yulyarapiji gaminyina yemwaaibi'derera. Sahwara yuyara Gotiyarina diraginna widiwa! 'Wapaayaji aalyasi manaanneina mwidaa Polimi mena tamakawaaji dividaasi naadeinera. Sara myi yaaja! Dikevi dinemarasika!' Gimi kuda'gizi 'Yo, Polimi waasima!' tusavi tamakya'nera tavaravana yemwaaimaniga." ²²Sarevidaa'nyi maremwaaide naangei wida' "Sa' nyidiwaa'na pwaraavi mudinna!" Sara daka piwinna miginyari widaasina ya!.

Ga'maaniya naangei Pilikizaryawinna Polimi waasesa'nesi.

²³Sagaa' maremwaaide naangei aawilata maremwaaideraari jaka widaka wida' "Anga Sizaariyana aawilata kwala naangesi (200) yovirawakapiji oziyaraavi yilamwaaidivita pijaakuna (70) siraminya saaminya limwadivita kwala naangesi (200) yovirawakapiji sawisavi naaini kilokiyagaa' dava ja'mayila! ²⁴Nabaai 'Oziya pwara Poli yilamwaaaladeraavi yovirawakakwoihiji Ga'maaniyai Pilikizaryawinna a'mwe sari nayaa makwalaawaka!' dakilyi sara jila!" ²⁵Sara widaka paaziya' yavikarina ya! Dara yavikarina yakesi.

²⁶Liziyaaazai Kilothiyaazainyi paaziya da' tewaanyai Ga'maaniya naangei Pilikizaiginyine' yavikarivanige. "Ninnya Pilikizai naangeigi!"

githiwa. ²⁷Juyara a'mwe dari galalimwanna yeva tamakya'na “Tamaana!” de'. Sara dadaapiji dara wi'niwa'de' “A'mwe sai Romiyai daaka!” Dena nimire aawilasara'ji walaawena kuminyi walayipalamaa'na yena padaihasamaa'na yiwa'de. ²⁸Nimi yawi'na ‘Juyara a'mwe darina be'na divanigava? Kayaa'nanya' be'na divanigava?’ Yawi'na yena Kaajoliyaraayabanna sari makwaimwa'daawade. ²⁹Makwalaawena kadika dara wi'niwa'de' “Ai, tamakya'naji kalavuzangevi wimwaa'ihya'naji kayaa'nanyabwi myawaalikei daaka! Kumire kiwinyabwina gaminyi maanga duthivanigava!” ³⁰Sara yawi'mwa'deinyi yagaala piri' pwai nyidiwaka “Juyara sari tamakipi'derera.” Saburi kadika wi'na gaminyawinna waasivanige. Gaminyi maanga widivanigasaraavi widiwa “Gamire kayaa'nanyangi Ga'maaniya naangeryabanna duzideihilyi.” Pikarya sara yavikarina ya'.

³¹Aawilasara kadika sara wi'neva sara ye'. Sawita savi Anga Adipaaturizina Polimi makwalaawina ye'. ³²Makwalaawina kye' yirikevi aawilasara kwaakaanya kunnya angevina ayina wina kye' Anga Sizaariyana oziyaraavi yilamwaa'lesara aawilata pwara gaminyi makwalaawina ye'. ³³Sizaariyana makwalaawina yeva Ga'maaniya naangeri paaziya' wijaavina yeva nabaai, Polimi gaminyabanna wimwaa'ihina ye'. ³⁴Wi'na wimwaa'ihina kye' Ga'maaniya naangei paaziya' tinna wanganaka gaminyi yiwaara'na ya' “Gimire piroviji gavanaka?” Sai wida' “Kwaaka Siliziya.” ³⁵Sara kuda' “Giminyina yagaainakera kwalyaabapiji kotiya' yihu'nideinyira.” Widaka gamijiyaraavi wida' “Erotiyare anga naangevi wimwaa'ihapiji kalavuzangevi dameihi dimwaa'yila!”

Juyara Polimi kotiya yesa'nesi.

24 ¹Sawita atina kajinna' Anga Sizaariya Gotiyarina Mubithika Yira'de Naangei Ananaayazalyi a'mwe naanga pwaraji pwai kotiyagaala dadei Tetalaazalyi walaawina ye'. Walaawina yeva Pilikizai Ga'maaniya naangeryaba daavina yeva Polimina wide'. ²Sara kude' Ga'maaniyai gaminyina jaka kuda' sai wilaabina kya' Tetalaazai Polimina kotiya' wida'

“A'mwe naangeigi Pilikizaigi, gimi nemaremwaaidinyagaa' narya tewaanyagaa' dahaakira. Gimire siduta sara yawiragina sara yadaa'gi nemire anga naanga dimaginya' tewaanya yima'nivani'. ³Yuyagaa' yunebanna sangine'na yilaaya yona yivaniginnyanna ‘Su! Su!’ diraginna divanigo'nera. ⁴Naangegaa' nadinaadika! Dahaa' kave mwaala'gizi nemire yagaala maalika kadika wi'nya'na diraginna githanganaana! ⁵Sare' dare'nesi. A'mwe dai Juyainaavina kayaa'na yadelyira. Kwaaka yuyavaki Juyara mwaa'ihabanna dai kwawa' maanga dineva mala tannyina yesalyira. Naazareti mwaalyarerajiyi naangelyi, a'mwe

dala. ⁶Nemire Yileange'na 'Girika yima'nana!' kada' saba nayaa galalimwanna yo. 'Sari nemire Kiwinyabwina kotiya' yaana!' yawi'na kyo ⁷aawilasaraavi maremwaaide naangei Liziyazai bina yaka neminyabadaasi a'mwe dari diraginna yipalamakuna ya'. ⁸Yipalamakuna yaka naanga neda! 'Yagaainakeihi Ga'maaniya naangeryabanna kotiya' jila!' neda'. A'mwe dari yiwaarava'gizi gimi saigi dara yawi'na jithesi 'Juyara sara nyidivanigasa yune nebulyangira.' ⁹Tetalaazai mi'na kuda' Juyara avaina yawireva wide! "Githiwake yuya sasarengira."

Pilikizaryaba Poli widake'nesi.

¹⁰Sagaa' Ga'maaniya naangei Poli yagaala wija'na ata yida'na kya' sai wida!

" 'Kwarame pijaakuna yawibwa'dinyaigi nemire anga naanga dimaginyainaavi yagaala jawibwarakina yadinyaiginyi,' yawi'mwe'na yagaala githide'na yilaaya yivanige. ¹¹Jeruzaalemi Gotiyari yilaaya'na gaai kyilaawe sagaa'daasi sawita atiraai sivila puridaasi piriwaalya nejinna'. Sare'na gimi saigi dara wangadiza! 'O, Poli sara nyidiwake' nebulya'na daaka!' ¹²Gotiyare Angevi pwaraji maanga madinyi yadaawoji Juyara nyangane!. Nabaai, Juyaraavire lotuangengiji Jeruzaalemi adusangiji kwala bwa'naanya mumwaaihye. ¹³Tewaanya gavebwi yeinyi Juyara nyangane!. Nimi myeinyina kwaasi yagaalya' githiwaasa' nebulya'na magiziwaa!. Aawa. ¹⁴Yagaala piri' githiwaasa' nebulyasi. Gotiyari nemire Ne sinnawinyaraavireri yilaaya yadi kumi mudikebwi kwaasiyaburi dimanigasabwi mididinyainyira. Sara yadinya' kiri! Ne Mozizare kiwinya yuya yida'nikeji Gotiyari wi'nawijiwakyaasaraavire yagaala yida'nikeji limwadinyainyira. ¹⁵Gotiyarina kumi sahwara sara yawi'manigasa' yemwaalyabwi sara yawi'manige. A'mwe yuyara a'mwe yida'maraangeraji a'mwe yida'na myadivisaraji sara baryara dikaapi'de'na sara yawi'daa yemwaaimanigo. ¹⁶Sare'na Gotiyalyi a'mweraji tinna nyangadivi' yuyagaa' tewaanna mwaaidinya'na 'Nimire simunya padaihirakya' tewaanyabwi daaka?' siduta sara yawi'di yivanigeinyira.

¹⁷Jeruzaalemi ya'ma'na yena piba piba kaanya yamaryadaazi kwarame kwalaalya kanyavilava' ninnya anga naanga dimaginyaraavine nigwia makwiya'naji Gotiyari sipizipiya wijaaya'naji Jeruzaalemina ayina yimwa'daawade. ¹⁸Yilaawena girikita'nanya wasi'nya'ne mena yena Gotiyari wijavadaazi Gotiyare Yileangevi nyangamwa'daa!. Nyangamwa'daasagaa' kwala bwa'naanya' mamwaalyiwa'daa!. Jakeji malyasi sa myiwa'do. Nimi sa myadaazi Juya pwara Kwaaka Eziya mwaalyara mwaimwa'daa!. ¹⁹Sahwara niminyina 'Yagaainakeina daaka!' yawipiji kwaji davanna mulaabi be'na yeva giminyaba madaayeva yagaala sa' manyijivaniga'? ²⁰Davanna mulaabi kiywaa' Kaajoliyaraayaba

daa'dezi Kaajoliyara niminyina 'Sai kayaa'nanya sara ya,' beriva dimwa'daava? A'mwe dara nyidipika! Nimi kayaa'na yeinyi daaka? ²¹Yagaala gave da' dingaka? Kuminyaba daa'di jaka dara widiwa'de. 'A'mwera balyaasara dikaapi'derera,' limwamanige'na dahaa' kotiya' nyijivanigasaihilyira. Sara widiwa'de'na maanga dahanyidivanigava?"

²²Sagaa' Pilikizai Kiraazitiyareraavirebwi siduta yawirakei Juyaraavi wida' "Wikira. Jemwaalyideihilyi. Aawilasaraavi maremwaaide naangei Liziyaazai kwalyaabozi sarimire yagaala jawibwarakina yideinyira."

²³Sara widaka aawilasaraavi maremwaaideri Polimina wida' "Polimi damera wangabika! Kalavuzi' diraginna nujaavipidika! Gamire gya'mwera angyiri'maata yapiji wijaavipika! Sare'na tewaanyasira."

Poli Pilikizalyi Diruzilasi sayori widake'nesi.

²⁴Sawita pini kajinna' Pilikizai gannya balaange' Diruzilasi bina ya'. A'mwe Diruzila' sa' Juyasira. Mi'na bina yaka Polimina kudaasa' a'mwera Kiraazitiyai Jizaazari limwangebwina Poli widadaasi Pilikizai kadika wi'nyina ya'. ²⁵Kadika wi'nyina kya' kiri' yida'maraangebunaji nayaa maremwaainyaburinaji Gotiyai kotiya nejidavade' yima'nadevurinaji kuda' Pilikizai lika yaka ja'nawidina "Wikira. Dahaa' ja'mavadera. Pigaa' navika kamwaala'muji yagaala pini dakadera." ²⁶Widaka yawi'na ya' "Poli dina 'Pilikizai niminyina tewaanna yana!' dina yoji nigwia yanga nyijaavadei dingaka?" Sara yawi'da kwalaalyagaa' Polimina widaasaka saraai dinyina yagi.

²⁷Kwarame piriwaa' kwavilava' Ga'maaniya naanga mudikei Pezitaazai Poziyaazai bina yaka a'mwe Pilikizare kwaakevi maremwaaideryaba maremwaaina ya'. Pilikizai wawakegaa' sai yawi'na ya' "Juyara niminyina yilaaya yipika!" Yawi'na yaka kalavuzangevi Polimi kuna wimwaihwiwina ya'.

Poli widake' "A'mwe naangei Sizaari kotiya'na widideinyi."

25 ¹Sarevidaa'nyi Kwaaka savakina Pezitaazai bi'ma'na kya' yirika dawaai dasa wavila'na kya' Sizaariyadaasi Jeruzaalemina yilaawina ya'. ²Jeruzaalemina yilaawina kya' Gotiyarina mubithika yira'divita naangeraji Juyara a'mwe naangeraji sara Polimina yagaala wide'. ³A'mwe sara yawi'na "Tusavi Polimi kiwale livaramaadera," yawi'na yesara Pezitaazari kwaasi yagaala diraginna widaangane' "Neya'mweigi, neminyina kale kagyozu Jeruzaalemina Polimina duthasaadeiginyira." ⁴Sarevidaa'nyi Pezitaazai wida' "Aalo. Anga Sizaariya kalavuzangevi Poli kamwaa'imwa' maalikegaa' nimi sainyi ayina walaawideinyira. ⁵Sarevidaa'nyi 'A'mwe sai kayaa'na yakerinera,' dipija' Sizaariyana nimiji sarimire a'mwe naangera walaawapiji kotiyaba gamire kayaa'nanya'na nyidipi'de'nanyira."

⁶Yirika pijaa' (8 dingako? 10 dingako?) Jeruzaalemi kuminyaba Pezitaazai mwaalina yaka Sizaariyana walaawina ya'. Walaawina yaka mwanya pirivi kotinamwaalisaba walamwaaina yaka wida' "Polimi dimakabyila!" ⁷Kuda' sai bi'ma'na kya' Juyara Jeruzaalemidaasara gaminyaba daavina yeva gaminyina wide' 'A'mwe sai kayaa'nanya naanga kwalaalya ya'. Sana sana yina ya'." Sara yesara yagaala nebulya'na Pezitaazari mujiwaaki ye'. ⁸Mujiwaaki kye' sahwai kumire yagaalya'na wirivikira' "Nimi kayaa'nanyabwi myadinyainyira. Juya Ne sinnawinyaraavire Kiwinya kayaaka migalye. Gotiyare Angevi girika myigalakye. Romi maremwaaidei a'mwe naanga Sizaarina kayaa'na migalye." ⁹Sara kuda' Pezitaazai yawi'na "Juyara yilaaya yipi'de'na!" Yawi'na yaka Polimi yiwaara'na ya' "Jeruzaalemina wawa'gizi saba niminyaba kotiya dinaadeigi daaka?" ¹⁰Sai wida' "Romiyaihire kotiyaba daa'manige. Kotiya da' daana! Gimi saigi nayaa yawi'mwaana 'Juyaraavina Poli kayaa'na migalyakelyira.' ¹¹Sarevidaa'nyi Romiyaraavire kiwinya kayaaka yigaimuji kwaji 'Ginnya kayaa'nanya'na giramakaanneigi,' nyidipiji kwaji yagaala mujainyi kabaimudikeinyira. Sa'na kiri' kumire yagaala niminyina kwaasi yagaala dimanigasa'na manyijaavinnera! Kwaaka yuyangi maremwaaidei Sizaai nimire yagaala wi'nana!" ¹²Sara kuda' Pezitaazalyi gamire sidu'nakeraji dinyina kye' Pezitaazai wida' " 'Sizaai nimire yagaala wi'nana!' nediwaanya'na Sizaaryawinna kagithaasa'muji diwodeiginyira."

Aahiripaaji Benaazasi sawaaryaba Poli daavake'nesi.

¹³Divi pigaa' Anga Sizaariyana Kingiya Aahiripaaji a'mwe Benaazasi Ga'maaniya Pezitaazari angyiri'maasa'na yi'ma'na yagi. ¹⁴Yi'ma'na kyagi sawita pini jinnadaasi Pezitaazai Kingiyari Polimina wijiwaakina ya' "Dava Ga'maaniya Pilikizai a'mwei kalavuzari ya'ma'na kya' sai mwaali'." ¹⁵Jeruzaalemi yilaawegaa' Juyara Gotiyarina mubithika yira'divita naangeraji a'mwe naangeraji sarina nyideva nyide' 'A'mwe kayaa'nanyari duthathera "Kayaa'na yigalaginya'na giramakaadeiginyi.'" ¹⁶Sara kanyide' kiri' wide, 'Romiyaina sara myadaanyainera. Pwara kotiya' pwarina dinapiji a'mweryaba madaayapiji kotiyagaala sa' muji kyapiji a'mwe sari yaasiwatamya myaanneinera! Aawa, a'mweraji a'mwelyi kotiya' nayaa dinapiji tewaanyabwi yima'nadevulyira'. Sara wide. ¹⁷Sarevidaa'nyi davanna walaabesagaa' myemwaalyi yena kiri' yirika gave pirivi kotinamwaalisaba yarai walamwaaina yena aawilasaraavi widiwa'de, 'A'mweri dimakabyila!' ¹⁸Sara widena 'Gamire kayaa'nanya naangenna kotiya' widipi'dera,' yawi'muneinyi kamwaaimwa'de gaminyi maanga widivanigasara daaveva kayaa'nanaange'na manyijiwa'daava. ¹⁹Aawa, kumirebwina maanga widiwa'daava. Sai kumi sahwaraavire Gotiyarina yilaaya gevwi yivani'. A'mwe pwai baryai Jizaazai

wo'nikerina maanga widiwa'daava. Sarina Poli 'Jizaazai mwaalikelyira,' dadelyira. ²⁰Yuya dangina yawi'na ye, 'Yagaala nebulya' garane' dingaka?' Yawi'na yena Polimi yiwaara'na yiwa'de, 'Jeruzaalemina kwawakwoihiji yagaala savina kotiya' yihu'nideinyi daaka?' ²¹Sara yiwaara'na kyiwade kiri' sai nyidiwa'di' 'Aalo, sawinna muwineinyi. Kwaaka yuyangi maremwaaidei Sizaai nimore kotiya' wi'nana!' Sare'na kalavuzangevi wothaayaraavi widiwa'de, 'Kalavuzangevi dari nayaa dumwaaahyila! Divi Sizaaryawinna waasidehaa'nanyira.' ²²Kuda' Aahiripaa Pezitaazari wida' "Nimore simunya' daresi. Nimi sainyi a'mwe nyidiwaanari kadika wi'nima!" Pezitaazai wida' "Mwanyavi kamakaba'muji kadika du'nadeiginyira."

²³Sarevidaa'nyi yirika pirivi Aahiripaaji Benaazasi sawaai baazi'ma'nya nawi'nya marabaazi'ma'nyina yagila nigwilalaaka nawi'nya mararinna yagila yagaala wi'nya'nebanna wina kyagi aawilasaraavi maremwaaividita naangeraji angaba mwaalya naangeraji sawaarina yilaaya marina wiewa angevina nayaa jivwaramakuna ye'. Jivwaramakuna kye' Pezitaazai sara kuda' pwara Polimi makabina ye'. ²⁴Makabina kye' Pezitaazai wida' "Kingiya Aahiripaagi, pwaihi dava mwaaihasaihi a'mwe dari dangamanigava! Juya yuyara dava mwaalyaraji Jeruzaalemi mwaalyaraji sara gaminyina kotiya' nyidiwa'daa'. Jaka naanga nyidiwa'daa' 'Sai mamwaalannera!' ²⁵Jaka sara kanyidiwa'daa' dara bi'mwa'de' 'Ai, a'mwe dai tamakya'na kayaa'na migalyawalyaadikei daaka!' Kadiwa'de sahwai nyidiwa'di' 'Kotiya' Sizaai wi'nana!' Sare'na mena yawi'mwa'de. Sizaaryawinna waasideinyira. ²⁶Sara yawi'mwa'de kiri' gaminyina Sizaari pikarya gara yavikaridelaka? Savina Kingiya Aahiripaagiji yuyaihilyi saihiryabanna sari makabina yiwana. Gamire yagaalyavi kadika wi'napiji nyijila! 'Sana sana Sizaari pikarya javikarya!' ²⁷Sare' dare'nesi. Nimi diwa 'Kalavuzarina gamire kayaa'nanyabwi myavikari yide' yaasiwa'na yaaside'na tewaanya' mika!' sara diwana," wida'.

Aahiripaamyaba Poli gannyabwi wijiwaakake'nesi.

26 ¹Aahiripaa Polimi wida' "Giminyine yagaala dinedana!" Kuda' sai gannya asi makina yaka gannya yagaala wida'

²"Kingiya Aahiripaagi, daha' ninnya yagaalya' githide'na yilaaya yivanige. Juyara niminyina kotiya' widadivisa'na githide'nanyi.

³Juyainaavirebulyi Juyainaavire yawita ge geji sangina sidu'nakeiginyi. 'Sara yawi'dinyavi nimore yagaala naanga nayaa du'nana!' diraginna githaangamanige.

⁴Maalikeinyi mwaalegaasi yuyagaasi dahaasi mwaaidinya'na Juya yuyara nyawi'mwaava. Anga Jeruzaalemi nimore anga naanga pimaginyaraayawi mwaaleinyi. ⁵Sareinyi yawi'mwaava. Nabaai

'Widaana!' dipija' dara nedipika! 'Sinnawidaa'nyi Poli Periziyaraavirebwi diragina mididelyi.' Periziyaraavirebwi naangebulyi. Pibura maalikeburera. ⁶Gotiyai Ne sinnawinyaraavi yune naanga nebulya'na wijaake'na yemwaaimanige'na dahaa' kotiya' nyidivanigasa'na daa'manige. Sarevi Juya yuyaina yemwaaimanigo. ⁷Sawitagaa' yirikagaa' Ne sinnawinya siviliraai ata puridaasi pwaraalyaraavireina Gotiyari yilaaya yadaanyainera. Yadaanya'na Gotiyai Ne sinnawinyaraavi wijaake nebulya'na yima'nya'na yemwaaimanigo. Nabaai, nimi sara yemwaaimanige'na, Kingiyaigi, Juyara kotiya be'na nyimarivanigava! Kumirebwina! ⁸Juyaihi, Gotiyai baryara yidikaavade'na be'na yivanigava myawirinanyava! (Naange! daaka!)

⁹Kigaa' dara yawi'na ye, 'Jizaazai Naazreti mwaalyare yayaviji gamireraaviji kayaa'na yuyanna wima!' Sara yawi'na yena Jeruzaalemi sara yina ye. ¹⁰Sara yina kye Gotiyarina mubithika yira'de naangera widaasina kanye' kalavuzangevi Gotiyare tewaanya kwalaalyaraavi wimwaaihina ye. Pigaa' pwara dinyina 'Jizaazarera baibizara,' dinyina kye' nabaai nimi 'Baibi'derera,' wide. ¹¹Sara widena naangegaa' Juyainaavire Lotuanga yuyangi pwara saraavina widina 'Diramyila!' Jizaazareraavi wide 'Jizaazari birala widapiji gamire limwangebwi dimarasi'nyila!' Divi sahwaravina nimore sinna tika nyida'daa'nyi Menyaraavire angebanna yiwinama'na kyapiji sabanna kuminyina kayaa'na yigalya'na kaanna wina ye."

Poli Kiraazitiyarei yima'nakei widake'nesi.

(Apozeliyara 9:3-19; 22:6-16)

¹²Poli kuna wida' " 'Jizaazareraavi kayaaka yigalima!' dena sare'na kude Gotiyarina yira'divita naangera paaziya' nyijaaveva Anga Damaazikazina kumire wawinya'na widaasina nye! ¹³Widaasina kanye' Kingiyaigi, sirigwajahaa' tusavi dara wanganage' 'O, sigunyavidaasi baaka naange' nimiji a'mwera ye'mwannigwodaanyaraji sainaayaba damwadiwaka!' Nyilyai maalikelyi. Baaka sa' naangesira. ¹⁴Sara kade kwaakevina yuyaina wala'na kyo Yiviruyagaala maanguraayavi wi'ne, 'Soligi, Soligi, kayaa'na be'na nyigaimanigina? Bulimakaawoyai "Aala!" dina yaka gyakware yita yesa yinike' sivilyasi tamina kyiwa' daanga wivimwakabaabi' gimire Gotiyari kayaa'na kyiwaa giminyina daanga givimanika.' ¹⁵Wi'nena yiwaara'na ye 'Naangeigi, aaihwaiginaka?'

'Kayaaka nyigaimaniginyainyi Jizaazainyira. ¹⁶Sahwainyi kiri' gimidi dithaaka! Sare' dare'nesi. "Niminyi nyidaayideigi nyijalikurakideigi jima'nana!" dena githahilakide'na biweinyira. Wawa'gizi dahaa' niminyine diraginya' wangamwaanya'na pwaraavi duzalikurakideiginyira. Sara ya'gizi divi pininna giziwaainide'na duthatheiginyi. ¹⁷Yizireliyaraji ajimya yuyangiyaraji saraayawinna kagithaasa'muji giminyi kayaaka kagyapi

givadaihasmaarideiginyi. ¹⁸Widaasina kagya'muji gimi wawa'gizi pwaraavire siduta mudike duzaadeiginyira. Saataanimire jihinyavi mwaaidivisaraavi nimire baaka nawi'nyavina yibwaramakuna jitheiginyira. Saataanimire kwaasidiraginya wasi'napiji Gotiyare diraginaanga limwabi'derera. Niminyi kanyilimwagapiji kumire kayaa'nanya marasi'niderera. Kamarasi'na'muji Gotiyai dahilakakeraayabanna sahwaraavi wimwaaihadelyira,' Naangei sara nyida'.

Poli gannya wawinya'na wijiwaakake'nesi.

¹⁹Sarevidaa'nyi Aahiripaa Kingiyaigi, sigunyavidaa'nyi sara wi'ne' sara midimweinyira. Sabwi mamarasi'nyiwa. ²⁰Aawa. Sinnawi Anga Damaazikaziji Anga Jeruzaalemiji sabanna wijiwaakina ye. Divi Kwaaka Juthiya yuyabaji ajimya yuyangiyaraavirebaji avaa'na wijiwaakina ye. Ayabwi wasi'nadivi' mudikebwi Gotiyarebwi jawiramaarila! Sara yapiji 'Mudikebuliyaina sare yaana!' dapiji a'mwera tinna wanganya'na nayaa sara jila! ²¹Sareinyi ye'na Gotiyare Angevi Juyara galalimwanna nyeva nyirame'. ²²Kigaa' yuyagaasi dahaasi Gotiyai nyivainadevidaa'nyi dava daavina yena a'mwe naangeihiriji a'mwe maaliikehiriji yuya sahwaihiri Gotiyare yagaalya' yihizalikurakivanige. Yagaala sa' mudike' daaka! Aawa, Ne Mozizalyi Gotiyari wi'nawijiwaakadivisaraji sara avaa'na mena nejaasasira. ²³Dara nejaa' 'Gotiyai dahilakakei Kiraazitiyari daanga naanga kuvinoji baloji sinnawinyai kwaihwainakei dikaavadelyira. Divi a'mwe yuyara dikaapi'derera. Dikaavoji a'mwe sainaavinaji ajimya yuyangiyaraavinaji sainaavina nedathe' "A'mwera Gotiyare nawi'nyaba baakeba mwaai'bi'derera." Yi sahwai baaka naange' a'mweraavina wijiwaainadelyi.' " Poli sara wida'.

²⁴Poli kotiya'na sara widadaa'nyiyagaa' Pezitaazai jaka wida' "Poligi aa'neiginyi. Bukuya naanga wanganagila naanga yawiragila sidu'maayaigi dahayima'nivanigina?" ²⁵Sai wida' "A'mwe naangeigi, Pezitaazaigi, aa'neinyi mika! Aawa. Yagaala yihithiwe nebulyasira. Yagaala sidu'nakenna yihithiwa. ²⁶Kingiya Aahiripaagi, sare' dare'nesi. Sahininna yawi'mwaanya'na diraginna githiwa. Yuya, yihithiwe dara yawi'mwaanya' 'O, sara sara daaka!' Lika myulyaryakengira. Sare' dare'nesi. A'mwera tinna wanganyaba ku'maayaba yakengira. ²⁷Kingiya Aahiripaagi, Gotiyari wi'nawijaasaraavire yagaala dilimwamanigina? Sare'na dara yawi'mwe' 'Aahiripaa kumire yagaalya' mena wi'nivanikei daaka!' " ²⁸Kujaa' Aahiripaa sahwari yarai wida' "O, nyidiwaanya'na Kiraazitiyareinyi yarai yima'nijiwana!"

²⁹Poli wida' "Gotiyari widivanige. Maalikegaa' dingaka? Naangegaa' dingaka? Aahiripaaji pwara kadika nyu'nivanigasaraji sara nimibisara yima'nipika! Sara kir' seniyabaraji nyivwiyinikeinyira. Sahwara senimaayara Kiraazitiyarera yima'nipika!"

³⁰Sagaa' Kingiyalyi Ga'maaniya naangelyi Benaazasi pwara yuyaraji daavina yeva ³¹ya'ma'na yeva dinyina ye' "Tamakya'naji kalavuzangevi mwaalya'naji a'mwe dai kayaa'na myadelyira." ³²Sara dinyina kye' Aahiripaa Pezitaazari wida' "Pezitaazaigi, a'mwe dai 'Sizaa' nimire yagaalya' wi'nana!' mujazi kwaji 'Ginnya angevina diwona!' kudithika!" wida'.

Anga Romina sipiya' Polimi makwawake'nesi.

27 ¹Ga'maaniya naangei neminyina dina "Kwaaka Yitaalina sahara wipika!" Dina yaka Juliyaazari Polimiji kalavuzaraaviji marimwangina neya'. A'mwe Juliyaazai Ohazitaazare Aawilasaraavi maremwaaidelyira. ²Wijaavina kaneya' sipiya' Anga Athiraamitiyaamidaasavi yilamwaaina yo. Yilamwaaina kyo Kwaaka Eziya maangebaarine sipiya sa' nemakwawo'. A'mwe pwai Arizitaakazai Kwaaka Maazathoniya Anga Tezalonaaika mwaalyai nemijiyalyi nemakwawo'. ³Nemakwodaasi Anga Saaithonina yi'mavaawina yo. Yi'mavaawina kyo Juliyaazai Polimina kale kwia' bwiwanna widina ya' "Dava mwaalyara gya'mweraayawi angyiri'maata ja!" Kuda' Poli kwawa' gya'mwera wapaayaji piniji wijaavina ye'. ⁴Wijaavina kye' divi sabadaasi sipiya' kaanna wina yaka Ahu'manna Saaipiraazi pimagi yihuta naange' yake'na sina mwiyi yaka Saaipiraazi pimagi yihuta maalike' yakeba wavila'na ya'. ⁵Wavila'na yaka Kwaaka Siliziya Kwaaka Paabiliya saalaalyavi ga'ma'na yaka Kwaaka Liziya Anga Maaira mannikebanna makuna neya'. ⁶Makuna kaneya' aawilasaraavi maremwaaidei dara wanganake' "Ai, sipiya piri' Anga Alekizaadiryadaasa' Kwaaka Yitaaline' daaka!" Sara daka sipiya savi yilawimwaaihina neya'.

⁷Sawita pijaa' yihuta'na sipiya sa' kave kave makuna neyaka sipiyavi wawinya yadivisara wawinya naanga yina yina kye' Anga Naaitaazi sabanna kave makuna neya'. Kave makuna neyaka simagi yihuta naanga'na mamakwiyi neyaka pimagi Ahu'manna Kiritina yihuta naanga maayaba makuna neyaka kwaaka maalika Saalimoni wavila'na ya'. ⁸Wavila'na yaka saalaalyavi maangebaari maalikeba wavila'na kya' sipiyavi wawinya yadivisara wawinya naanga yina yina kye' Sipiya Wila'de Nawi'nyaangebanna kavena yi'ma'na ya'. Sipiya Wila'de Nawi'nyaangeba Laaziya aya kiba warikebanyira.

⁹Saba yemwaaina yemwaaina kyo Juyara wapaaya manyadivisagaa' mena wavila'na kaneya' yiraaya wanangegaa' yima'nyina ya'. Wanangegaa' yima'nyina kya' sipiya yarai kayaakegaa'na Poli wida' ¹⁰"A'mweihi, dara wangamwe' 'O, dahaasagaa' sipiya kayaaka yadehaa' mena jiwaka! Nabaai, nimire sipiyasi sipiyavi gilyivisa wila'di'nyiyaji sa gave kayaaka yade mi'. Aawa. Nemi a'mweinaaviji kayaaka neyade'na daaka!' Sara dena mwawaannera!" ¹¹Sara kuda' kiri' aawilata

maremwaaidei sipiya' maremwaaide naangelyi sipiyavi gyakwalyi saraai widahilya' wi'nyina ya'. Polimire yagaalya' mu'nyi ya'. ¹²Saba burikeviji yihusaviji saggaa' sipiya' warya' kayaa'nanyasira. Sa'ne' sipiyaviyara naangevaakiyara yawi'na ye! “Kayaaka naneyigaladika! Sipiya' saalaalyavi wawaka anga nawi'nya' Pinikizina nemakwona! Saba yihusagaa' mwalaadeinera.” Anga saba yihusanna lika yulyarikebera. Nyila walakadimagi warikeba.

Saalaalyavi yihuta naange' kayaa'na yake'nesi.

¹³Divi saalaalyavidaasi yihuta maalike! yadaa'nyi a'mwera yawi'na “Tewaanyasi. Dimwo'na kaanyaana!” Yawi'na yeva wila yaarina kye! Ahu'manna Kiriti maangebaari sipiya' makuna neya'. ¹⁴Maalikegaa' makuna neyadaa'nyi saggaa' yihu'maanarya' Notizita wo'nike' ahumannyavidaasi yarai yina. ¹⁵Yarai yina yaka sipiyavi yitavamakuna kya' sipiya' sina yina mwiya kya' nemi yawi'na “Yihuta naange'na sipiya' yitavamakwawana!” Yawi'na kyo yihusa' yitavamakuna ya'. ¹⁶Yitavamakuna kya' Ahu'manna maalika Kothaa yihuta kibaweyaba a'mwera “Botiya maalike! kayaaka nyadika!” deva botiya maalike' dusimagi warake'na wawinya naange' yona yilamaarakina yo. ¹⁷Nemijiyara botiya maalike' mwagi'namaa'na yeva sipiya naangevi yilamarakina ye'. Yilamarakina yeva “Sipiya' diraginya yivaimwagaana!” deva wilyaji yunebanna pwiya ye'. Pwiya yeva “We', siwekeyaba Kwaaka Livya (Kwaaka Apirika) nemire sipiya' kayaaka nyadika!” deva sipizeliya' yivita naangeva'bisa' marapwiya kye' yihuta sa' sipiya' yitavamakuna ya'. ¹⁸Yitavamakuna yaka yirika piriki yihuta naange' kuna kya' “Sipiya' tewaanya warade'nanyi,” deva saalaalyavina sipiyavi wila'di'nyia gaai marasi'na marasi'na yeva ¹⁹yirika piriki kunnya asaji sipiyavire gilyivita taanga marasi'na ye'. ²⁰Marasi'na kye' kayaa'nanyagaa' yirika piningi nyilyalyi silingaaminarikaji saraavi tinna mwanganyi mwanganyi kyo yuyagaa' yihuta naange' kuna yina yina ya'. Kuna yina yina kya' nemi yawi'na “We', yuyaina mwalaadeina mika! Balaadeinera nemi, we'.”

²¹Sawita pijaakuna a'mwera manyadaapiji kuminyi tinnyaba Poli daavina yaka widina “Nya'mweihi, yihithiwija' wi'napiji kwaji Ahu'manna Kiriti mya'mayi kyipidika. Sara yipiji kwaji kayaaka kaneyadi' mi'. Sara yipiji kwaji sipiyaviya gilyivisa mamarasi'nyi kyaadika! ²²Sa'na kiri' naanga yihithima! Lika mipinera! A'mwe yuyaina mabalyi yaadeinera. Sipiya gave' kayaaka yinadesi. ²³Sare' dare'nesi. Nimi Gotiyareinyi Gotiyari yilaaya yadinyalyi. Sawisavi Gotiyai sare ejeliyai niminyawinna baka ²⁴nyijawaali' 'Poligi, lika minna! Kayaaka gyatheigi mi'. A'mwe naangei Sizaaryaba dithaa'deiginyira. Nabaai, Gotiyai giminyina yange'na yihigaimwamanike'na sipiyavi

wilamwaihata yuyaraji tewaanna dimwaalyideihilyira.' 25 Sara nyijawaalike'na lika mipinera! Sare' dare'nesi. 'Gotiyai nyijawaalike' nebulya'na yima'nadesira,' sara limwaga'manige. 26 Sa'na kiri' ahu'manna pirivi nemire sipiya' kayaaka yinadesira," wida' Poli.

27 Yihu'maanarya' kuna yadaasi sawita kwalaalya (14) nevilavakegaa' sawita savi saalaalya Methitiraniyani sabanna yihusa' nemire sipiya' yitavamakuna ya'. Yitavamakuna yadaa'nyi sawita kalawawegaa' sipiyavi widaayadivisara simunya dara yawiresa' "Ai, aya kiba kwaakeva' darika!" 28 Sara deva aalyavi wilyabaai taanginya pwiyinikebaai makwaasina yeva yaamiji wanganeva aalya damwineba saaminaanga mitaaya 36 tinna wanganna ye'. Tinna wanganna yeva divi maalikegaa' wilyabaai ayawi makwaasina yeva aalya damwineba saaminya kibawe mitaaya 27 tinna wanganna ye'. 29 Tinna wanganna yeva lika yina yeva "Silaangengi nemire sipiya' kayaaka nyadika! Dava sipiya' warade'nanyi. Sipiya' nawodika!" deva sipiyavi dusimagi kwaari'mayaginya nadiya dawaai dawaalyangi makwaasina ye'. Makwaasina yeva "We', yirike' yarai purana!" deva tibariyagaala dina dina ye'. 30 Tibariyagaala dina dina yeva sipiyavi wawinya yadivisara dinyina ye' "Nabalaadika! Davidaasi kaanyaana!" Dinyina yeva pwaraavi kwaasi widina "Sipiya sinnyimagi kwaari'mayaginya nadiyangi wakaana!" Kwaasi widina yeva aalyavi botiyavi lika yulya'na walakina yadivi' yadaapiji 31 Poli tinna wanganaka aawilasaraavi maremwaaidelyi aawilasara saraavi widina ya' "Sipiyavi wawinya yadivita dara milamwaalyipija' tewaanya myivainyi jideihilyira." 32 Sara widina kya' aawilasara botiya' pwiyinike wilyangi yarai yesiwi'na kye' aalyavina gami sa' wina ya' botiya'.

33 Yirikunyagaa' wapaaya tika nya'na Poli yuyaraavi naanga widaangana' "Yirika atiraa' sivila puridaasi dawaai dawaai nevila'daasi simunya kwalaalya yawi'divi' wapaaya manyadivi' mwaaimanigasaihilyira. 34 Naange'nanyabwi yihithima! Wapaaya dinyila! Sare' dare'nesi. Napiji diraginya dimwaalyidera. Yuyaihi, kayaaka jinyideihi mi'. Sare' dare'nesi. Sarimire mijata aane piri' kiri' kayaaka yade' mi'." 35 Widina yaka Poli girikula maarina yaka kuminyaba Gotiyari "Su! Su!" widina yaka girikula gunyina yaka nyina ya'. 36 Nyina yadaasi yuyara pwara Poli yakabaabi' diraginna yina yeva wapaaya nyina ye'. 37 Sipiyavi nemi yuyaina a'mwe 276 mwaaloinera. 38 Yuyara wapaaya mena neva "Sipiya taanginya' daaka!" dineva aalyavi witizila yuya marasi'na marasi'na ye'.

Sipiya' kayaaka yigalake'nesi.

39 Yirika mena purina kya' sipiyavi wawinya yadivisara kwaakeva' tinna wanganeva dinyina "Kwaaka be kwaakavakaka?" Dinyina yeva dara wanganesa' "Keiba tewaanyaba daaka! Siweka gaveba daaka!"

Deva “Maangebaari nawi'nyabanna sipiya' wilaawana!” dinyina ye!
 40 Dinyina yeva kwaari'mayaginya nadiya pwiwinikebara yesiwi'na kye'
 aalyavi wa'di'nyi palaaniya saaminyawaa'i sipiya' ginyiwannakewaai
 pwiwinikebaraavi yaarina. Mena yaarina yeva “Yihusa' nemakwawana!”
 dina yeva sinnyimagi seliya maalike' timudaakuna kye' maangebaarina
 sipiya' wina ya'. 41 Wina yadaasi aalya amwinevi ahu'manna wekejiki
 tamaka pibanna mwiyi yina ya'. Sipiya sinnya' diraginna warina yadi'nyi
 dusimaginya' aalyasi yihusasi diraginna diraginna tamina yina kya'
 sipiya dusimaginya' kayaaka yinyina yaka warina ya'.

42 Aawilasara yawi'na “Maangebaarina kalavuzara li'napiji likaanya
 nupidika! Tamakaana!” 43 Yawi'na kye' kiri' aawilasaraavi maremwaaidei
 yawi'na “Polimi yivainima!” Yawi'na yaka “Saraavi maramakipinera!”
 Widaka yuyainaavi neda' “A'mwe pwaihi li'nadivisaihi, aalyavi
 dikwosi'napiji maangebaarina dili'nigulaawila!” 44 Pwaihi, palaaniyaji
 yisaji kalimwagapiji maangebaarina yihusa' yihitawaasadera.” Sara
 widina kya' sara yona maangebaarina yuyaina tewaanna yi'ma'na yo.

Ahu'manna Molita mwaalesa'nesi.

28 1 Kwaakevaki tewaanya mwaaloga' dara yawiro' “O,
 ahu'manna da' Molita wo'nike' daaka!” 2 Burika nevadaa'nyi
 yirila nedadaa'nyi saba mwaalyara a'mwe tewaanyara neminyina kale
 maali'na muya'. Sare' dare'nesi. Sahwara dika yira'na yeva “Yuyaihi,
 dikevi jimwannyla!” nede'. 3 Kanede' dika savi kamwaalo Poli dikewaka
 marikwa'na yaka dikevi buliyira'na yadaasi naawinaanyai dika kwi'na'
 dikewakidaasi bwalyuna yaka Polimire asavi tika bwalyada'na
 ya'. 4 Tika bwalyada'daasi naawinaanyai gamire asavi lingwire'na
 kya' Maavera saba mwaalyara tinna wanganeva dine' “A'mwe dai
 a'mwe pwari tamakakei kiri' naawinaanyai kada'mwa' kayaa'nanyai
 balannelyira. Saalaalyavi balanne kwai yiwakei baladelyira.” 5 Kadine'
 Poli naawinaanyari dikevi maririkurasi'na yaka kayaa'na myima'nyi
 yaka tewaanyai mwaalina ya'. 6 Tewaanyai mwaalaka mwaalaka kya'
 “Sare asa' milamakina yade' dingaka? Yarai balina yadei dingaka?” Sara
 deva yemwaaina ye'. Yemwaaina yemwaaina yeva dara wanganesa' “Ai,
 tewaanyai kuna damwaalika!” Deva siduta pibwi yawi'na yeva dinyina
 ye' “A'mwe dai Gotiyaibisalyira.”

7 Sabadaasi aya kiba wawinya pini warina ya'. Wawinya sangi gyakwai
 Pavilaazai ahu'manna savi maremwaaidelyira. A'mwe sai kale wiadaa'nyi
 neda' “Nimire angevi angyiri'maata nyila!” Kaneda' sawita dawaai
 dasavi wa'mwa'na yo. 8 Pavilaazare ganimaangei kilaakeji' di'mudinakei
 likulya tinakei warina ya'. Gannya yi'binyavi wa'di'nyi ku'dikevi Poli
 wilaka gaminyina Gotiyari widaka asawaai kadathiwaga' nabalya yarai
 yiwina ya'. 9 Sara kya' ahu'manna savi mwaalyara nabalnakera kadika

wi'neva neminyawinna bina kye' Poli tewaanna yina ya'. ¹⁰Savidaasi yanga naanga wijaavina neyeva divi sipiya' nemakwawakegaa' sipiyavi neminyine wapaayaji aalyasi yivisaji saza wilakina ye'.

Molitadaasi Anga Rominesi.

¹¹Lawe dikaai di' ahu'manna savi mwaalona sipiya pirivi yilamwaaina kyo makuna neya'. Sipiya sa' Anga Alekizaadiriyaadaasa' burikegaa' ahu'mannyavi warakesira. Sipiya sa' yaya' Kaazitoji Polaakizalyi gira'miraalyaraalya' wo'nikesira. ¹²Makuna neyaka anga Saairakyuzina yi'mavaawina kya' saba sawita dawaai dasavi mwaalina yo. ¹³Mwaalina kyo sipiya' makuna neyaka anga Riziyaamina yi'ma'na ya'. Yi'ma'na kya' yirika pirivi dusidaasi yihusa' yina kya' sawita dawaai kajinna' anga Pyutiyoalaina sipiya' yarai makuna neya'. ¹⁴Makuna kaneya' dara wangano' "Anga davi mwaalyara pwara neya'mwera daaka!" Sara kado sahwaraya yiwaara'na neye' "Wikiya piri' dava dimwaalyideihi daaka?" Yiwaara'na kaneye' saba mwaalina yo. Mena mwaalina yona Romineina kwaakaanya wina yo. ¹⁵Kwaakaanya wina yadaawoji Romi mwaalyara neya'mwera neminyina kadika dara wi'nesa' "Poliji pwara Kirazitiyareraji jinigava!" Sara deva pwara Maaketiya Aapiyaazina wijimaa'nyina kaneye' pwara anga Se Warya Dawaai Dasabanna wijimaa'nyina neye'. Wijimaa'nyina kaneye' Poli kuminyi tinna wanganaka Gotiyari "Su! Su!" widina yaka gamire simunyavi yivaimwangebwi maaraka yilaaya yina ya'.

Anga Romi Poli mwaalake'nesi.

¹⁶Romina yi'mavaawina kyo ga'maaniyara nede' "Poli kalavuzangevi mamwaalyi yade'na ange'na biroji savi mwaaladelyira. Aawilata pwai damelyi mwaaladelyira."

¹⁷Yirika dawaai dasa kavura' Poli Juya naanga minyaginyaraavina yikabya'na yagaala widaasina ya'. Widaasina kya' a'mwera yikabina kye' wida' "Nya'mweihi, nemire Juyaraavina kayaa'na myeinyira. Nemire Ne sinnawinyaraavirebwi kayaa'na myeinyira. Sara mi kye kiri' Jeruzaalemi nyivwiyeva kalavuzainyi Romiyaraavi nyimarimwange'. ¹⁸Kanyimarimwange' Romiyara nyiwaaraveva dara yawiresa' 'O, a'mwe dai balya'na kayaa'na myakei daaka!' Sara deva dinyina 'Kalavuzangevidaasi yune'na widasaana!' ¹⁹Dinyina sara kye' Juyara wide' 'Arikawinyi.' Sara kude' nimire anga naanga simaginya sahwaravina 'Kotiya' yagaainakeinyi yiderera,' mujena 'Gave pibwina darika?' dena wide 'A'mwe Naanga Sizaai kadika nyu'nana!' ²⁰Sarevida'nyai yihwanganide'naji yihithide'naji 'Jikabyila,' sara widasaabiwa. Sare' dare'nesi. Yizireliyaina pwai sigunyavidaasarina yemwaidaanyarina seniya nyivwiyinikeinyi mwaaihe." ²¹Kumi wide'

“Giminyina Kwaaka Juthiyadaasa paaziya mamaaryona. Sabadaasara neya'mwera giminyina maneje'. Giminyine kayaa'nanyanna sahwara maneje'. ²²Manejasaina gimire yawisa' kadika wi'naanainera. Sare' dare'nesi. Yuyaba a'mwera gimire Kiraazitiyaraavina kayaa'na widadivi', nabaai, kaneda'gizi kadika wi'naadeinera.”

²³Pigaa' Poliji Juyaraji dahilakesagaa' yima'nyina kya' gaminyawinna a'mwe kwala naangera bina ye'. Mena bina kye' sagaa' mwanayidaa'nyi sawitirinyagaa'na Gotiyai diraginna nemaremwaaide'na Poli wijalikurakina wijalikurakina ya'. Sana yada Ne Mozizare kiwinyangiji Gotiyari wi'nawijiwakyasaraavire yagaalyangiji Jizaazari nayaa limwagasa'na wijiwaaka'. ²⁴Kujiwaaka' pwara gamire yagaalya' wi'nesa' kiri' pwara mu'nye'. ²⁵Sara yeva yagaala kwalaalya dinyina kye' yagaala piri' Poli wida' “Kigaakuna Kuryai Tewaanyai Gotiyari wi'nawijiwakyaa'kei Piropetiya Aazaayari nebwinna kujaa' sarimire Ne sinnawinyaraavina Aazaayai sara wijaa'. ²⁶Wijaake' dara dinike'

‘Wawa'gizi a'mwe daraavi duthathera

“Kadike'na wi'nyina yapiji
myawiramaari jideihilyira.

Tinna wanganna wanganna yapiji myawiranganyi jideihilyira.”

²⁷A'mwe daraavire siduta kayaaka yinike'na

Kunnya kadika taanga tila'nyina yesara

Kunnya tinnya tibarya ya'na yesarera.

Sara myesa' kunnya tinna kwangabithika!

Sara myesa' kunnya kadika ku'nipidika!

Sara myesa' kunnya siduta kyawipidika!'

Gotiyai dinika

‘Kunnyabwi yagalya'mapiji kwaji

Niminyawinna ginyiwannipiji kwaji

Kuminyi nayaa kyavada'gaimudika!' ”

²⁸Yagaala piri' Poli wida' “Sarevidaa'nyi dara jawiryide' ‘O, Gotiyai a'mweraavine padaihasamaasabwine yagaala ajimya yuyangiyaraavi duthaasiwaka!' Yihithivanige. Sahwara Gotiyare yagaalya' kadika wi'nipi'derera.” ²⁹Poli sara kuda' Juyara pwara “Poli nebulya'na nediwaka,” dadivi' pwara “Sai kwaasi nediwaka,” dadivi' maanga kuna didivi' ya'ma'na ye'.

³⁰Kwarame piriwaai wavila'daasi Anga Romi Poli ange'na mubada saba mwaaida pwara angyiri'maata yadivisa'na Gotiyare yagaalya' wi'nya'ne'na Poli yilaaya yadelyira. ³¹Yilaaya yada Gotiyai a'mweraavi maremwaaide'na widada Naanga Kiraazitiya Jizaazarina wijiwaakadelyira. Diraginna widada pwara gaminyi mujadiviki “Yagaala sa madinna!” Muji yadivikira.